

劉貴陽說經殘稿 附經說  
鳳氏經說





劉貴陽說經殘稿

附經說

劉書年撰

編主五雲王

編初成集書叢

種一他其及稿殘經說陽貴劉

中華民國二十五年六月初版

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

翁



叢書集成

初編

主編者  
王雲五

商務印書館發行



劉貴陽說經殘稿

本館據滂喜齋叢  
書本排印初編各  
叢書僅有此本

# 劉貴陽說經殘稿

周時書分四代

清 獻縣劉書年撰

書備五代。唐、虞、夏、商、周也。伏生今文尚書分爲五。尚書大傳、標堯典之首曰虞夏傳、唐傳、九共之首曰虞夏傳、虞傳、禹貢之首曰虞夏傳、夏傳、帝告之首曰殷傳、太誓之首曰周傳、蓋其本經題唐書、虞書、夏書、殷書、周書、故曰其傳若是。在本經無九共帝告當以舉陶謨爲虞書、湯誓以下爲殷書、大傳、蓋伏生教授張生、歐陽生時猶記二篇殘語、兩家總撰大義、筆於虞傳、殷傳之首耳。古文尚書分爲三、馬、鄭、王本、及劉向別錄、自堯典盡夏書、皆題曰虞夏書、見堯典正義、康成書贊云、三科之條、五家之教、三科、謂虞夏一科、商一科、周一科也、古文家說也、五家、謂唐一家、虞一家、夏一家、殷一家、周一家也、今文家說也、然皆非周時之舊、左氏傳、史克以慎徽五典、至四門穆穆、爲虞書、堯典文也。今僞孔舜趙衰以賦納以言、明試以功、車服以庸、爲夏書、皐陶謨文也。今僞孔益稷本是舉陶謨、今賦作數、試作庶是古書凡題四代、曰虞書、夏書、商書、周書、堯典本紀堯、雖紀及舜之終、仍以紀堯爲主、宜歸之堯、而謂之虞書、蓋出虞史所記、故篇首加曰若稽古、皐陶謨亦紀虞廷君臣之言、宜歸之舜、而謂之夏書、蓋出夏史所記、故篇首亦加曰若稽古、然則尚書古題、猶云虞夏商周人所書云爾、非如後世史、紀某代、卽稱某代書也、古文謂之虞

夏書止統稱不別於古爲近。今文堯典係之唐皐陶謨係之虞。禹貢甘誓係之夏。失其舊矣。

周時完書堯典後有舜典。汨作九共九篇。橐飶大禹謨。皐陶謨。棄稷凡十五篇。於虞夏不知何屬。竊疑堯之事。虞史記之。謂之虞書。舜之事。當必夏史記之。謂之夏書。然則舜典以後。恐卽屬夏書。止堯典一篇爲虞書也。說文稱堯典者二十五。假于上下。平黷東作。宅堯夷。烏獸犇髦。又烏獸喪毛。帝曰鬻咨。方救僭功。又旁逖孱功。洪水浩浩。有能俾暨。方命圯族。岳曰異哉。籛類于上帝。雉嫫。明試以功。竄三苗。殛鯀于羽山。放勳乃殂。闕四門。時惟懋哉。皋咎繇。僉曰伯夷。教育子。八音克諧。龍朕聖讒。說殄行。皆言虞書。此依古文也。不同者。古文題虞夏書。乃總堯典。皐陶謨。禹貢。甘誓諸篇。說文獨稱堯典。文自不得兼云虞夏書。故云虞書。許君本尊古文者也。若稱五品不繇。作唐書。棋三百有六句。繫傳本亦作唐書。則傳寫之誤。段氏玉裁以說文凡稱虞書。皆宜改唐書。堯典紀唐事。紀舜。皆紀堯也。則謂之唐書。皐陶紀虞事。則謂之虞書。禹貢紀禹功。則謂之夏書。勝於古文家之概稱虞夏書。未得其實。古文今文家標目。皆非孔子自題。後學者爲之說。說文可擇善而從。無足異。段氏此說。蓋非古文標目。原周時舊號。許君文字既依古文。何以於標目獨見爲非。而必擇從今文也。

僞壁中古文尙書

或問。經典釋文敍錄云。尙書之字。本爲隸古。既是隸寫古文。則不全是古字。今齊宋舊本。及徐李等音。所

有古字。蓋亦無幾。穿鑿之徒。務欲立異。依傍字部。改變經文。疑惑後生。不可承用。是唐以前。有依僞孔五十九篇經文。易以奇古之字。流布人間。別爲一種尙書者。但僞孔之書。自東晉而降。遵行久矣。不容再僞。唐以前人。何以有是。答曰。此非僞孔之僞書。乃壁中書之僞書也。蓋東晉以降。羣信僞孔爲安國以隸古寫定壁中之本。妄人以隸古本傳壁中科斗古文不傳。遂造僞本以當之。元朗謂安國尙書本以隸寫。古僞本用古字改經爲非。不知妄人正造未寫以隸之本。而非用古字以當隸古本也。盤庚序正義云。孔子壁內之書。治皆作亂。宋本如是。他本譌作亂。蓋卽稱此本。又匡謬正俗云。尙書湯斲云。予則孛翬汝。自注斲。古文誓字。翬。古文戮字。亦卽此本。是孔穎達。顏師古。並認爲壁中古文也。於此可知。唐初名儒。不特信安國隸古本見存。並信壁中古文亦存也。是亦攻僞孔者所宜詳悉。

又問。孔顏信僞本爲真古文。唐人亦有知古文之亡者否。答曰。隋書經籍志云。晉世祕府所存。有古文尙書經文。今無有傳者。此古文。謂壁中本也。知晉世祕府有之者。晉祕書監荀勗。錄當代所藏書目。凡二萬九千九百餘卷。名中經簿。唐時見在。簿中必錄壁中尙書也。云今無有傳者。謂晉以後無聞。知其亡也。下文云。及永嘉之亂。歐陽大小夏侯尙書並亡。古文當亦亡於此時。志文特分言之耳。長孫無忌等不爲僞本所惑。識見高出孔顏矣。又經典釋文云。漢始立歐陽尙書。宣帝復立大小夏侯博士。平帝立古文。永嘉之亂。衆家之書並滅亡。而古文孔傳始興。立博士。旣以衆家滅亡。承上歐陽夏侯尙書並古文。而又云古

文始興。則所謂平帝立古文而亡於永嘉者。是壁中古文。古文孔傳始興者。是隸古本。其實隸古本馬鄭所不注之餘篇亦亡。唐人信僞孔。以爲不亡耳。然可以見陸氏知壁本亡於永嘉也。

又問。宋時有古文尙書。郭忠恕作汗簡。夏竦作古文四聲韻。首列之。采其文多至數百。至薛季宣。取爲書古文訓。流傳至今。宋人如說文繫傳。羣經音辯。集韻。國語補音。蔡氏書集傳。亦屢稱之。或卽唐時僞本。答曰。卽如斲字。亂字。薛氏本並無之。惟有翳字。恐是唐以後人。又因原本有所增省。

又問。僞本治作亂。於義何居。答曰。作僞者不能自造文字。必采說文所引尙書。及魏三體石經古文。衛宏古文官書。以及諸家所稱引。並字書言古文者。如張揖古今字詁之類。而後成。此亂字。本魏石經也。石經桓十七年。及齊師戰於奚。奚作亂。見隸是也。左旁卽奚字。蓋邯鄲滄傳古文壁中本有此治字。從乙。奚聲。從乙之意。如說文。亂從乙。乙治之也。因從奚聲。卽借爲奚字。石經他處必有書亂作治者。故僞本用之耳。汗簡乙部有亂。釋始注。尙書始當作治。宋時僞本。亂蓋又改作亂也。糸部又載王存又切韻。治作糸。亦譌體。

唐時尙書原本釋文原本興廢

今之尙書。非僞古文原本。乃唐開元十四年。明皇以洪範無偏無頗。聲不協。詔改爲無陂。天寶三載。又詔集賢學士衛包。改古文從今文。謂之今文尙書者。見新唐書藝文志。今之尙書釋文。非陸德明元本。又宋

開寶中詔以陸氏所釋乃古文尙書與明皇所定今文駁異令陳鄂刪定其文改從明皇隸書者見文獻通考引崇文總目其原本今並不傳言尙書家並未考其亡自何時今按册府元龜載明皇改尙書詔命以舊本仍藏之書府郡齋讀書志古文尙書十三卷漢孔安國以隸古寫定五十九篇之書也其書自漢迄唐行於學官明皇不喜古文改從今文由是古文遂絕陸德明獨存其一二於釋文而已皇朝呂大防得本於宋次道王仲至家以較陸氏釋文雖小有異同而大體相類玉海藝文類云陸德明釋文用古文後周顯德中郭忠恕定古文尙書並釋文刻板太祖命判國子監周惟簡等重修開寶五年二月詔翰林學士李昉校定上之詔名開寶新定釋文即陳鄂所刪定蓋二人並爲之咸平二年十月乙丑孫奭請摹印古文尙書音義與新定釋文並行從之天聖八年九月雕新定釋文夢溪筆談云宋太宗得古文尙書改雲夢土作又作雲土夢作又姓苑宋太宗詔郭忠恕爲國子監主簿令刊定古今尙書据此諸文是唐一代行今文而古文仍在未嘗亡也傳至後周郭氏與釋文合校之是此時猶行古文至宋太宗已行今文而忠恕入宋又命合今文尙書校之是宋初亦行古文也逮北宋之末次道仲至號多藏書天下惟其家有本則已微矣而晁公武王伯厚猶見之蓋南宋亦存其亡當在宋元之際釋文原本宋初亦與新定釋文並行其亡校古文爲早困學紀聞云釋文敍錄云尙書之字本爲隸古云云然則今所傳古文尙書未必孔安國之本宋景文筆記云楊備得古文尙書釋文讀之大喜書訊刺字皆用古文按國史藝文志唐孝明寫以今

字藏其舊本。藝文志無藏舊本之說。語見册府元龜。此記誤。開寶五年。別定今文音義。咸平二年。孫奭請摹古文音義。與新定釋文並行。今亦不傳。此漢至唐所謂古文者。孔安國以隸存古。非科斗書也。今有古文尙書。呂微仲得本於宋次道。王仲至家。郭忠恕定古文尙書及釋文。今本豈忠恕所定歟。宣和六年。詔復洪範從舊文。以陂爲頗。然監本未嘗復舊也。按伯厚此文。與玉海讀書志。互有詳略。所謂非安國本者。卽僞本古文。伯厚意主明皇未改原本。釋文原本爲真孔氏古文。以駁僞本科斗書之非。其見與陸氏認僞本爲隸古之僞同。並未得僞本之實。然自陸氏以後。羣皆尊信。至伯厚乃始疑之。可謂偉識。其云古文音義今不傳。蓋孫氏摹行後不久卽亡也。凡此皆古文並釋文原本興廢之由。段氏玉裁乃誤認讀書志玉海困學紀聞所謂古文者爲屬僞本。郭氏所定宋王兩家所藏並是此本。又認郭氏定釋文爲別撰僞本釋文。著之古文尙書撰異中大誤。

鳥獸毛毳 鳥獸毳毛

堯典。仲秋。鳥獸毛毳。仲冬。鳥獸毳毛。周禮。司裘注引。毛毳作毳。毳字。說文所無。鬣部云。鬣。羽獵章。絳。從。發。聲。發。或從衣從朕。虞書曰。鳥獸發毛。又毛部云。毳。毛盛也。從毛。隼聲。虞書曰。鳥獸發毛。並不同。惠氏周禮古義云。毳當爲鬣。字之誤也。鄭氏尙書云。仲秋。鳥獸發毛。仲冬。鳥獸發毛。涉下而誤耳。段氏尙書撰異云。惠謂涉下而誤者。涉下句作毳。又誤毳也。然鳥獸發毛。惟見說文。惠以鬣。毳。鬣。繫之。鄭氏尙書無



據周禮釋文。雉音毛。此相傳舊本舊音。雉字從佳毛。毛亦聲。蓋壁中堯典古文如是。惟雉同毛。故孔安國以今文字讀之。易爲今尙書毛字。在鄭不易爲毛。當別有見。而其說不傳。鳥獸毼毛。說文作犇。亦壁中本。今字作毼。乃別體。鬻部所引作癢。按癢訓羽獵韋袴。而虞書訓毛盛。六書之假借。蓋今文尙書也。又說文毛部作髦。鬻部作毛。似古文尙書作髦。今文尙書作毛。毛是本字。髦亦段借也。按康成所據壁中古文。令毛犇。誠作犇。何以犇犇犇髦同一壁經。而許君有犇犇字。獨無犇字耶。且毛部犇。毛盛也。從毛。隼聲。虞書曰。鳥獸犇髦。犇。仲秋鳥獸毛盛。可選取以爲器用。從毛。先聲。讀若選。又何以仲冬犇髦。仲秋毛犇。同爲毛盛。絕無別異耶。可知許君犇下所引。元是鳥獸犇髦。髦乃犇之誤。犇犇二文同訓毛盛。並屬仲秋。犇下旣稱虞書。犇下卽承上作解。康成司裘注。亦當引作犇。許鄭所據孔氏古文。蓋同是此字。釋文見禮注犇誤。因以僞孔尙書犇作毛。爲之音云。音毛非也。犇犇義爲鳥獸毛盛。此古文尙書說。康成注周禮良裘云。良善也。仲秋鳥獸犇。因其良時而用之。毛以盛時爲良。鄭君義蓋同。許作毛者。乃伏生今文。史記五帝紀。用今文尙書。云鳥獸毛犇。可證。今文蓋脫犇旁耳。僞孔乃用今文。凡僞孔經字。多同今文。而與賈馬鄭王之古文異者。據康成作犇。從可知。賈馬王之本亦犇字也。許君所引鳥獸癢毛。蓋毼毛古文。釋文引馬融云。溫柔貌。此亦古文說也。僞孔云。鳥獸皆生。更毼細毛。以自溫。是依古文說。但陸氏不云。毼馬作癢。知馬亦作毼。毼者。亦今文尙書。史記五帝紀作鳥獸毼毛。是也。馬氏古文亦作毼字者。蓋孔安國

以今文夔非本字。以氄爲正。改從今文。又從可知。賈鄭王亦作氄也。氄本伏生今文。而許君不載此字。合而言之。古文犇琫謂毛盛。夔毛謂毛溫柔。本自有別。玉篇犇而勇切。又而允切。衆也。聚也。今本譌犇與周禮注同廣韻犇而尹切。毛聚也。衆聚二義。卽許君毛盛意。蓋出於賈馬鄭王鳥獸犇琫之注。至玉篇犇下出氄。云同上。此說文譌作犇髦以後。陳彭年輩認犇氄同字而爲之者。犇止切而允而勇。乃氄字之讀。亦彭年輩增之。廣韻氄讀而隴切。與犇別字別音。蓋孫愐所見諸家尙書是犇琫。說文亦是犇琫。與氄毛判然。故不合。氄於犇。顧氏不待言矣。大徐音說文犇而尹切。又人勇切。亦誤認許君引氄毛作犇髦。而合廣韻犇氄二字之讀。此陳氏所由改玉篇也。又顧孫依古文尙書收犇字。別無犇字。則周禮注犇琫釋文音毛之誤。顧氏在梁時。固未及見孫氏。亦未之信也。至集韻毛亦作犇。則其時諸家尙書久亡。直從釋文矣。此其原委可一一推見者也。廣韻氄讀而隴切。亦非古音。古文夔從犛聲。今文氄從喬聲。犛聲在眞諄部。喬聲在術韻。術於古爲支脂部。之入眞諄。支脂二部。字多通借。故正作氄。借作夔。而不可入東冬部。讀而勇切。蓋六朝以後之音譌耳。廣韻以氄爲氄之正文。直從甬聲。則去本愈遠矣。之洞案。康成所據壁中云云以下。別是一義。前說謂仲秋毛琫。周禮注作

禽

犇琫是古文犇。依釋文讀毛。後說謂周禮注犇是犇之誤。說文犇髦當作犇琫。辨犇與氄音義不同。前後自相違異。後說爲長。依元本兩存之。

堯典。僉曰益哉。正義云。馬鄭王本皆作禹曰益哉。是字相近而彼誤。按作僉者。姚方輿本也。馬鄭王作禹

者古文尙書也。禹與兪字不相近。按詩秦譜正義引書疇若予上下草木鳥獸。禽此古闕本如他本皆誤曰益哉。禽當爲禽之誤。說文禽古文禹字。是稱馬鄭王本以證書疏所稱知禹本作禽。禽與兪形似。故云相近而誤。正義用姚方輿本。固宜左袒方輿。其實三家皆安國所傳古文也。上下文皆作兪。曰獨益是禹舉之。故作禹曰。方輿作舜典傳。改作兪。以合上下文。非也。以此知壁中古文尙書禹皆作禽。說文知禽是古文禹。是據壁經。漢藝文志。雜家者流。大令三十七篇。傳言禹所作。其文是後世語。命卽兪字。

### 鞞琫琕說

鞞琫琕之制。古說紛如。迄無定論。詩小雅瞻彼洛矣。鞞琫有琕。傳云。鞞容刀。琫上飾。琕下飾。者。天子玉琫而珧琕。諸侯盪琫而璆琕。大夫鏐琫而鏐琕。士瑒琫而瑒琕。釋文。琫佩刀削上飾。琕佩刀削下飾。說文云。鞞刀室也。琫佩刀上飾也。琕佩刀下飾也。小爾雅云。刀之削謂之室。削卽鞞室謂之鞞。句鞞琕鞞之飾也。鞞卽鞞字王莽傳。瑒琫瑒琕。孟康曰。佩刀之飾。上曰琫。下曰琕。此一說也。大雅公劉。鞞琫容刀。傳云。下曰鞞。上曰琫。釋名云。室口之飾曰琫。琫捧也。捧束口也。下末之飾曰琕。琕卑也。下末之言也。琕卽鞞字。詩音義。鞞或作琕。是也。此一說也。杜注左傳。鞞佩刀削上飾。琫下飾。字林。玉篇本之。又一說也。廣韻云。鞞下飾。琕上飾。宋咸注小爾雅本之。又一說也。此皆古說之異。後人皆宗毛說。惟以公劉傳下曰鞞。與瞻彼洛矣傳詞不同。復成聚訟。正義於瞻彼洛矣。申公劉傳曰。彼無琕文。因琫爲在上之飾。下則指鞞之體。故

言鞞下飾也。當云下曰鞞。一時文誤。公劉正義意亦同。馮氏六家詩名物疏。則認公劉傳說鞞爲下飾。謂與釋名合。指瞻彼洛矣傳爲自相矛盾。孔冲遠不得已而爲之辭。陳啓源毛詩稽古編又申孔云。瞻彼洛矣傳以琫琕對言。故言上飾下飾。公劉以鞞琫對言。故言上下而不言飾。鞞非飾也。琫在鞞上。則鞞爲下矣。古文簡質不達意耳。戴氏震毛鄭詩考亦以公劉傳與釋名合。謂瞻彼洛矣傳爲傳寫之誤。當云鞞下飾。後諸琫字皆當作鞞。鞞琫有琫。猶言鞞韎韐有奭。奭赤兒。琫文飾兒。說文云。琫佩刀下飾。蓋其所見毛傳與今本同。遂取以說字。以鞞爲刀室。殆誤會毛鞞容刀鞞也之語。凡此又宗毛之異。按瞻彼洛矣傳本定說。說文諸家本之者是也。公劉傳下曰鞞之文。誠如正義稽古編所通。惟鞞是刀室。故字從革。其從玉者。譌說爲飾以後之文也。釋名由誤會公劉傳下曰鞞之文。而以鞞當琫。不思與瞻彼洛矣傳不合。或別有師承。要非也。鞞爲下飾。則無以處琫矣。馮氏據之。良誤。戴氏更改毛傳從之。益屬武斷。考說文琫下云。禮佩刀。天子玉琫而琫。邊下云。禮佩刀。諸侯邊琫而琫。瑤下云。禮佩刀。士瑤琫而琫。禮字韻會引皆作禮記曰。禮記者。前漢藝文志所云。記百三十一篇。七十子後學者所記也。毛許並稱記文。惟說文士琫琕與毛瑤琕及盪作盪異。而金部錄下。未及引大夫句。戴氏指諸琫字並誤。豈說文亦誤乎。抑逸禮記先誤乎。琫文飾兒。義復何出乎。至段氏注說文。又別出新說。謂毛意琫在刀握。不在刀室。云琫之言奉也。奉俗作捧。刀本曰環。人所奉握也。其飾曰琫。毛傳。鞞容刀鞞也。謂刀削。其云琫上飾琫下飾者。上下自全刀言之。琫在

鞞上鞞在琫下。琫在鞞末。此尤無理。其意因說文有佩刀字。疑琫琕並在鞞。則不宜云佩刀飾。乃移琫於刀握。而牽毛傳從之。令琫琕一在刀。一在鞞。謂合許君之指。今讀毛傳鞞容刀鞞一語。已別言鞞。接云琫上飾。琕下飾。自主鞞言。毛未嘗合刀於鞞。而許君佩刀是合鞞於刀。蓋佩之則刀鞞爲一矣。但移全刀之說於說文。則琫琕同在鞞。固可云佩刀飾也。至杜征南已下諸家。則所傳聞異辭。不可據以疑毛許矣。

### 小正田鼠

夏小正。正月。田鼠出。傳。田鼠者。噉鼠也。三月。田鼠化爲鴛。八月。鴛爲鼠。近洪氏震煊疏。小正以三鼠爲一。云。三月化鴛。八月爲鼠。九月以後應蟄。至明年正月。則又將出。按此說非也。田鼠能害禾稼。儻是一鼠。自三月至八月。是鴛八月化。而九月以後卽蟄。至明年正月方出。三月又化。如此。則田鼠無能爲害。知必是二種。正月出者爲噉鼠。噉鼠卽鼯鼠。爾雅。鼯鼠。郭注云。以頰裏藏食者。說文。鼯。鼯也。鼯。鼠屬。讀若含。鼯。廣雅作鼯。按。噉者。因其頰裏能藏物名之。說文。噉。口有所銜也。爾雅。寓屬曰噉。郭注。頰裏貯食處。是也。後別製鼯字。鼯之言含也。命名之意亦同。此鼠自正月出。卽害五穀。藏於秋時。小正。九月。熊羆貉鼯。鼯則穴。傳。言蟄也。鼯。鼠屬。然則鼯鼠亦當蟄。於是時。鴛化之田鼠。鼯鼠也。淮南時則訓。田鼠化爲鴛。高注。田鼠。鼯鼠也。鼯鼠卽鼯鼠。諸字書無鼯字。蓋失收。說文。鼯。地中行鼠。伯勞所作也。一曰偃鼠。或從虫。爾雅。鼯鼠。郭注。地中行者。蘇頌本草圖經云。鼯鼠卽化爲鴛者。斯言信矣。周禮地官草人。墳壤用麋。故書。墳。

作螽。司農云。螽壤。今作墳。誤。說詳段氏。玉裁。漢讀考。多螽鼠也。然則螽之言墳。以其穿地中行。令土墳起。故名。偃亦作鼯。名繫別錄。鼯鼠土中行。陶注。俗中一名隱鼠。一名蚡鼠。形如鼠。大而無尾。黑色長鼻。甚強。常穿地中行。隱偃。皆因其伏藏地中得名。方言謂之鼯鼠。郭注。鼯鼠。蚡鼠也。鼯即犂字。謂其起土若耕犂也。此鼠三月化。駕。八月復爲鼠。秋冬間亦能害稼。小正三言田鼠。傳於田鼠。出特言鼯鼠。以別於鼠爲駕。駕爲鼠之爲鼯。鼠。高注。淮南是矣。其注。呂覽季春紀。則以田鼠爲鼯鼠。蓋因二者並是田鼠。偶誤。爾雅鼯鼠。釋文引字林。曰。即鼯鼠。以二鼠爲一。尤非。

小正雞桴粥

夏小正。二月。雞桴粥。傳云。粥也者。相粥之時也。關澮本。傳首脫粥字。大戴禮有之。相粥句。盧見曾本改作相粥粥呼也。黃叔林本改作相粥之呼也。畢沅本改作相粥粥之呼也。按此候記雞產卵。傳當作桴粥也者。相粥粥之時也。粥粥者。雞聲也。說文。粥。呼雞。重言之。讀若祝。蓋雞聲若粥粥。故就其聲呼之。是粥其本字。粥其假借也。相粥粥者。雌雄鳴相應也。凡雞產卵。必雌鳴而雄應之。蓋古人於雞產卵時。雌雄相鳴。謂之桴粥。傳意以相粥粥解桴粥。若專解粥字。則桴字無著矣。淮南時則訓作雞呼卵。高注。雞呼鳴求卵。呼卵即桴粥也。禮月令。逸周書時訓解。作雞乳。乳是產卵。說文云。乳。人及鳥生子也。生者。生出之謂。呂覽季冬紀。乳雉。雉乳上脫雞字。雞乳。雉。雉本兩候。今本誤。惟與月令先雉。雉後雞乳不同。高注。乳。卵也。經子四

處與椀粥文異義同。諸家以意增改，未得傳意。傳又云：椀，嫗伏也。粥，養也。此別一義。按凡鳥乳卵，其始也卵生，後其母從而菹之，則曰嫗伏。禮樂記：羽者嫗伏是也。亦單言嫗言伏。莊子：嫗雞搏狸，越雞不能伏鷄卵是也。嫗伏已化雛，則曰孚。說文：孚，卵孚也。一切經音義引通俗文：卵化曰孚是也。或說以小正椀爲孚字，謂已嫗伏成雛，以粥爲育字，謂成雛而養育之。此垢椀粥二字存異說，非正解也。

### 壁中古文有春秋

壁中古文之數，詳於漢藝文志。曰：魯共王壞孔子宅，欲以廣其宮，得古文尚書及禮記、論語、孝經是也。其分列諸經，尚書家首列尚書古文經四十六卷，爲五十九篇。禮家首列禮古經五十六卷，論語家首列論語古二十一篇，出孔子壁中。孝經家首列孝經古孔氏一篇，二十二章。淮記不一種。禮家有記百三十一篇。明堂陰陽三十三篇。王史氏二十一篇。樂家有樂記二十三篇。論語家有孔子三朝七篇。此五種皆古文。隋書經籍志稱：劉向考校經籍，得此五種記，共二百十四篇。而經典釋文敍錄引劉向別錄云：古文記二百十今脫此字。四篇可證。然春秋家首列春秋古經十二篇，此亦當出自孔壁。說文敍云：魯共王得禮記、尚書、春秋、論語、孝經，是壁中原有春秋。班氏總敍處少此種，或文脫耳。說文敍又云：左丘明春秋傳以古文。北平侯張蒼獻春秋左氏傳，蓋春秋古文經出壁中。古文傳出張蒼所獻。段氏注說文，謂班志春秋古經十二篇，左氏傳三十卷，皆謂蒼所獻。說文以春秋係孔壁，恐非事實。此徒見志上列春秋古經十二篇，下



列春秋經十一卷。云公羊穀梁二家。後列左氏公羊穀梁三家之傳。意十一卷之經屬公穀。十二篇之古經則屬左氏。不知孔壁之經。志皆首列。加以古文。此孟堅之特重古文也。張蒼有傳無經。卽有經亦以孔壁古文該之可耳。論衡說左氏傳出共王壁中。正見經出孔壁。卽傳亦誤歸之矣。若記五種。不加古字。文省也。

大旆說

左氏僖廿八年城濮之戰。楚右師潰。狐毛設二旆而退之。又晉中軍風於澤。亡大旆之左旆。按兩旆非旗名。設二旆。設前軍之兩隊也。中軍大旆。中軍前軍之名也。莊廿八年傳。楚子元。鬥禦疆。鬥梧。耿之。不比爲旆。鬥班。王孫游。王孫喜。殿旆。殿對文。而曰爲旆。是旆必前軍。楚前軍名旆。晉制亦然。哀二年傳。晉趙鞅禦鄭師於戚。陽虎曰。吾軍少。以兵車之旆與罕駟兵車先陳。注旆。先驅車也。以先驅車益其軍以示衆。蓋以兵車之先驅者爲一軍。故云兵車之旆。是晉前軍名旆之確證。又襄十八年傳。晉伐齊。左實右僞。以旆先輿。曳柴而從之。此旆亦是前軍。張衡東京賦。殿未出乎城闕。旆已返乎郊畛。薛綜注旆。前軍。殿。後軍。本左氏也。所以名旆者。以其載旆也。猶楚之左廣右廣。以廣車得名也。見宣三年傳中軍重之名。大旆。猶齊之有大殿也。見襄廿三年傳大旆之左旆。前軍之左旆也。杜注。兵車之旆是矣。注狐毛設二旆。云大旗。注大旆。云旗名。按旆乃以帛續旒末者。旆以通帛爲之。別是一旗。儻是旗名。則大旆之左旆。旆成旆上之物。不可通矣。

季蘭

左氏□□傳濟澤之阿。行潦之蘋藻。置諸宗室。季蘭尸之敬也。按此數句非泛語。明據詩采蘋爲言。季蘭蓋卽季女之名。或字。當時於此大夫妻。能確知其人。後失傳耳。詩但言于以采蘋。南澗之濱。于以采藻。于彼行潦。而左氏能指其地爲濟澤之阿。又可知季蘭母家居濟水之旁也。杜解季女爲服蘭之女。蔽詩指矣。

國子證誤

周語。宣王欲得國子之能導訓諸侯。樊穆仲曰。魯侯孝。王曰。何以知之。對曰。肅恭明神。云云。王曰。然則能訓治其民矣。乃命魯孝公於夷宮。韋注。賈侍中云。國子。諸侯之嗣子。或云。國子。諸侯之子。欲使導訓諸侯子也。唐尙書云。國子。謂諸侯能治國子。養百姓者。昭謂國子。同姓諸姬也。凡王之子弟。謂之國子。導訓諸侯。謂爲州伯者。按。國子者。王太子。王子。諸侯公卿大夫士之子弟。皆是。亦曰國子弟。周禮地官師氏。夏官諸子。注疏言之甚詳。唐氏以諸侯當國子。有乖名義。固非。賈景伯知諸侯無國子之稱。故以爲諸侯之嗣子。而諸侯子理不能導訓諸侯。故以爲導訓諸侯之子。然王欲得國子。而穆仲舉魯侯。語爲不類。況經文云。導訓諸侯。乃爲訓諸侯之子。更是添設矣。韋氏近是。而要與舉魯侯是諸侯不應。蓋此文有誤。當云王欲得諸侯之能導訓國子者。蓋王欲以賢諸侯立爲卿士。導訓王太子以下諸人。故穆仲舉魯侯。而王遂

命之。諸家望文立義。是以多所繆鑿也。

又按史記魯世家載此事。則云懿公九年。懿公兄括之子伯御。與魯人弑懿公而立伯御。卽位十一年。周宣王伐魯。殺伯御。而問魯公子能道順諸侯者。以爲魯後。樊穆仲曰。魯懿公弟稱。肅恭神明。云云。王曰。然能訓治其民矣。乃立稱於夷宮。是爲孝公。與國語事全背。易國子爲魯公子。如其說。則非倒文。然國語原無宣王立魯後之語。且穆仲曰魯侯孝。是孝公時已君矣。豈待宣王立之。史公采載多誤。此不可信。

論語記諸賢稱謂說

昔柳宗元謂論語所載弟子必以字。惟曾子有子不字。謂是書出於曾門。程子亦曰。論語之書。成於有子。曾子之門人。故其書獨二子以子稱。魏華父則云。字尊於子。子不得獨重。今按魏說非是。子自尊於字。論語於夫子皆稱子。或稱夫子。而罕稱仲尼。可見程子之說。似亦未安。曾子有子。不必自其門人始稱之。聖門諸賢。顏子居德行之首。曾子傳道。有子似聖人。他皆莫能及。顏子早世。夫子沒後。自是二子爲尊。二子門人及諸家門人從而子之。宜也。故禮記出於七十子之後學者所記。而於二子無不稱子者。不必是其門人所記也。然則論語一書。不能定擬出於誰手。善乎龜山先生之說曰。論語首記孔子之言。而以二子之言次之。蓋其尊亞於夫子。不主師說出其門人。斯爲當矣。若胡氏云。先進記閔子言行者四。而其一直稱閔子。龜山亦云。閔損冉求或稱子。則因其門人所記而失之。不革其或有之。又按論語記諸賢子。

至尊矣。其他稱字者，亦不一例。如仲弓、子路、子夏、子游、子張、子貢、子賤、子羔，皆獨稱字。顏淵、閔子騫、冉伯牛、漆雕開，本名啓，字開，以開爲名，誤。自孔注論語開名，俗本家語開字，子若之文，說詳閻氏四書釋地三續。公冶長、巫馬期、司馬牛、曾皙、公西華、樊遲，則皆加姓，率以爲常。又有名氏字互書者，如有子又稱有若，陳子禽又稱陳亢，原思又稱憲，宰我又稱子南，容又稱南宮适，冉有又稱冉求，亦止稱求，既氏字矣，而又名之，訖不畫一。蓋七十子之徒，記其師，固以書字爲敬，或加氏者，必七十子及三千人中更有與同字一人，則加氏以爲識別。史記仲尼弟子列傳載冉子、有子、並字子有，奚容蒧、伯虔、並字子皙，曾蒧，即點狄黑，並字皙，榮旂、縣成，並字子旗，驪駒、赤、鄭國，並字子徒，公祖句茲、秦非，並字子之，顏噲、樂刻，並字子聲，漆雕哆、邽選，並字子斂，公西輿、公西蒧，並字子上。七十二子中，同字者已九人，三千之徒，從可知矣。以有兩子有兩子皙，故記曾子冉子必加氏，斷無書子有子皙者，他皆此例也。至哀公問年饑，章稱若，對君則名，問異聞，章稱亢，問恥，章稱憲，問羿，寡章稱适，問禮之本，章稱放，大宰問子貢，章稱牢，非不說子之道，章稱求，或其自記，晝寢，章稱子，季氏富於周公，章稱求，或以夫子聲其罪，故貶而名之。又公西子例加姓，而使齊章獨稱子華，以下文有赤之適齊也，句不能移混他人也。

傳不習乎

釋文引康成云：魯讀傳爲專。按此專非專守之義，說文專訓六寸簿，謂書策也。漢以後有簿書之稱，在古

名簡牘爲簿。而字作箒。說文竹部。箒。蒨爰也。廣雅釋器。箒。箒箒也。曹憲音滿緩。玉篇竹部。箒。竹牘也。廣韻。箒。牘也。箒。箒。簡也。是其義。簿卽箒之俗。或借作薄。孟子先簿正祭器。音義云。本多作薄。漢夏承。韓勅。武榮。諸碑。主簿字皆作薄。是也。簡牘之度。鹽鐵論云。二尺四寸之律。古今一也。後漢書曹褒傳。撰次禮制。寫以二尺四寸簡。周盤傳。編二尺四寸簡。寫堯典一篇。荀勗束皙穆天子傳序云。以前所考定古尺度。其簡二尺四寸。春秋序正義。載康成論語序。引鈎命決云。春秋二尺四寸書之。孝經一尺二寸書之。故知六經之策皆長二尺四寸。儀禮疏又引序云。易書詩禮樂春秋皆二尺四寸。今譌尺二寸孝經謙半之。論語八寸。策者三分居一。又謙焉。是古人經籍率以二尺四寸之簡爲常。惟謙始用短。此專六寸。當是其廣。左傳序正義云。簡之所容。一行字耳。牘乃方版。版廣於簡。以可並容數行。似牘可廣六寸。簡則不能。然穆天子傳序言簡長二尺四寸。一簡四十字。以古尺二尺四寸甚短。令四十字作一行。其字必僅如今書小楷。決無此理。知簡亦可容數行。其闊者亦至六寸。惟漢藝文志稱尙書之中古文。簡二十五字二十二字者。則一行能容耳。專不習乎者。謂所讀之書恐不溫習。此魯義也。段氏玉裁解專爲笏。據釋名。笏。忽也。備忽忘也。君有命。則書於上。或曰。簿。可以簿疏物也。杜注左傳。玼。玉笏。若今之持簿。蜀志。秦宓見廣漢太守。以簿擊頰。裴松之云。簿。手版也。諸文爲證。按。笏以記忘。簡牘之類。故同得簿名。而非六寸簿之義。

有酒食先生饌

饌。康成本作餽。注云。食餘曰餽。按。餽與饌。字義俱異。若仍從今本。讀有酒食句。則先生餽不辭。近孔氏廣森通郊義言。有燕飲酒。則食長者之餘。如此。卽有酒句。然人子餽父母之餘。恆事也。何必定指燕飲。義仍不確。蓋先生不可以父兄言也。劉氏台拱說先生饌云。年幼者爲弟子。年長者爲先生。皆謂人子。饌。具也。有事。幼者服其勞。有酒食。長者具之。內則。男子未冠笄者。味爽而朝。問何食飲矣。若已食。則退。若未食。則佐長者視具。長者卽先生也。鄭注訓具爲饌。論語言先生者二。皆謂年長者。憲問篇見其與先生並行也。包氏曰。先生。成人者也。皇疏。先生者成人。謂先己之生也。非謂師也。愚按。內則又云。父母在。朝夕恆食。子婦佐餽。正義云。子婦佐餽者。長子及長子之婦。是父母在。具食及餽餘。皆長者之事。作先生饌者。謂長者具食。作先生餽者。謂長者餽餘。首尾本止一事。

哀公問社於宰我

康成注論語。就張包周魯論篇章。考之齊古。爲之注。以齊古讀正者五十事。今從齊讀者不可知。而從古讀者凡二十四事。並載經典釋文。其讀正之例。皆古魯字義俱異。康成以古爲是者。改從古字。然有古魯不同。旣從古說。不改魯字者。哀公問社於宰我。集解孔云。凡建邦立社。各以其土所宜之木。是古論作問社。而說爲田社也。春秋文二年。丁丑。作僖公主。杜注。主者。般人以柏。周人以栗。正義云。論語。哀公問主於宰我。云云。張包周等。並爲廟主。故杜所依用。是魯論作問主。而說爲廟主也。皇侃論語義疏云。鄭論本云。

問主。釋文云。問社。鄭本作主。云主。田主。謂社是康成字從魯而說從古也。在讀正之例。當改經文作問社。注云。魯讀社爲主。今從古。乃正其義。不正其字。似自紊其例者。蓋張包周等字雖作主。說亦是社主。本無廟主之義。五經異義云。論語。哀公問主於宰我。宰我答。夏后氏以松。夏人都河東。宜松也。殷人以柏。殷人都亳。宜柏也。周人以栗。周人都澧鎬。宜栗也。今春秋公羊說。孝子之當作主。繫心。夏后氏以松。殷人以柏。周人以栗。又當作古。周禮說。虞主用桑。練主以栗。無夏后氏以松爲主之事。謹按。從周禮說。論語所云。謂社主也。許君稱問主是魯論。其夏人都河東云云。必魯論之說。時魯說雖有多家。漢志有魯傳十九篇。魯夏侯說十一篇。魯王駿說二十篇。張包周自在其中。可見無廟主之義。唐時張侯說。包周章句不傳。孔沖遠以其本作主。妄意其說如是。以附合杜注耳。在魯。古其字雖異。而說本同。康成仍從魯論。所以不改字也。若公羊家廟主之誤。許君已駁之。而公羊文二年傳。練主周栗。何注。夏后氏以松云云。仍本之。疏云。論語鄭注云。謂社主。正以古文論氏以爲廟主。徐彥止分別古文爲社。今文爲主。鄭說從古文。何說卽主字立義。勝左氏正義。杜元凱亦本之。後世罕從其說。愚更卽本文折之。使民戰栗之云。集註疑古者戮人於社。故附會其說。若是廟主。民何與天子諸侯之廟。乃云使之戰栗耶。

言未及之而言謂之躁

康成云。躁。不安靜也。魯讀躁爲傲。按荀子勸學篇云。不問而告謂之傲。正是相傳魯讀。楊倞注云。傲。喧噪也。言與戲傲無異。或曰。讀爲嗷聲。口今本曰。嗷嗷也。按戲之義非是。後義得之。說文。誓。衆口愁也。詩。鴻雁于



飛哀鳴。愬愬。又讒口。囂囂。韓詩作愬愬。愬在鳥爲聲。衆在人爲多言。不問而告。是多言也。亦不必改讀。古愬通作敖。荀子強國篇。百姓謹敖。是也。古無傲字。傲卽敖之俗。魯論。荀子本宜作敖。敖爲多言。與下隱爲藏言反對。較躁義尤切。

### 宗國

魯稱宗國。孟子。滕世子曰。吾宗國魯先君。一見左氏定十二年傳。魯叔孫輒奔吳。哀八年。吳伐魯。輒以爲可伐。公山不狃謂輒以小惡欲覆宗國。十五年。成宰公孫宿叛入於齊。子貢謂宿利不可得。而喪宗國。又再見。按三宗字不可合解。嘗考春秋姬姓之國稱宗者亦有二。足以證之。襄十二年傳。吳子壽夢卒。臨於周廟。禮也。周廟。文王廟也。周公出文王。凡諸侯之喪。異姓臨於外。同姓於宗廟。所出。王廟。同宗於祖廟。始封君。同族於禰廟。父廟也。同族。是故魯爲諸姬臨於周廟。爲邢凡蔣茅胙祭臨於周公之廟。卽祖廟也。按魯爲諸姬。卽吳子等。卽所謂同姓也。据太伯仲雍於周公爲從祖祖父。於伯禽爲族曾祖父。而謂之同姓。是魯視始封君高祖以下之親所封之國皆同姓也。高祖以下之親。本爲同族。不同高祖之親。始謂之親同姓。然自周公伯禽視之爲同族。自子孫視之。則爲同姓。左氏固爲春秋時言之。爲邢凡等。卽所謂同宗。邢凡等皆出周公。與伯禽爲兄弟。是兄弟之國爲同宗也。宗字。說文訓祖廟也。魯與邢凡等皆立周公爲始祖廟。故其子孫爲同宗之國。亦自春秋時言之。若同族於禰廟。令魯當伯禽時。視高祖之子孫族曾祖以下皆同族。時有吳子

卒則應臨於周公之廟而不於文王廟。此惟周初封國時有之。春秋時君無同族受封之國。故左氏舉其禮而不舉其證。此兄弟之國謂之同宗。爲稱宗之一義。又僖五年傳。虞公曰。晉吾宗也。虞始封君爲仲雍。曾孫周章之弟虞仲。於唐叔爲族昆弟。在子孫相視。本屬同姓。而謂之宗。蓋對文則同姓同宗有別。散文則宗字亦止作同姓解。此又稱宗之一義。滕稱魯宗國。是同宗之義。滕魯俱出文王。自邢凡等視伯禽爲兄弟。俱立周公廟。其子孫爲宗。自滕叔繡視周公爲兄弟。俱立文王廟。其子孫亦爲宗也。諸侯得立所出王廟。皆以有功德。王命立之。非也。凡諸侯皆得立出王廟。不以有功。孔氏廣森云。郊特性言諸侯不敢祖天子。大夫不敢祖諸侯者。謂不敢以太祖非謂不敢祭之喪服傳曰。公子不得禘先君。公孫不敢祖諸侯者。亦謂不得以爲祖廟。廟諸侯必以始祖爲祖。大夫必以別子爲祖。其所自出之君則別立廟。而不與私廟齒。此說最合。今卽左氏文斷之。凡諸侯之喪。同姓於宗廟。杜注云。所出王之廟。旣云凡諸侯則出王廟。無國不有矣。故知滕得立文王廟。輒與宿稱魯宗國。則同姓爲宗云爾。此義自趙注。滕魯俱出文王。敬聖人。故宗魯。就宗主爲說。已失之。至集注云。魯祖周公爲長。兄弟宗之。直據大宗立義。乃從前所未有。於輒與宿以大夫宗君推不去。且漢書梅福傳。諸侯尊宗。如瀆曰。尊宗始封之君。尊爲諸侯。則奪其舊爲宗子之事也。是大小宗之法爲大夫士而設。諸侯無之。唯杜注左傳云。輒魯公族。故謂魯宗國。得之。至晉語舟之僑說。虢之將亡曰。宗國旣卑。諸侯遠已。內外無親。其誰云救之。韋注。宗國公族也。韋知宗國是公族者。以下文內外無親。外指諸侯。內必指公族也。公族而謂之宗國者。言爲國之宗支也。

洵龕也

釋言洵龕也。郭注未詳。按洵訓信。詩洵訐且樂。洵有情兮。洵直且侯之類。皆是爲恂之假借。龕者勝也。任也。文選謝靈運述祖德詩。注引尚書孔傳云。龕勝也。謝元暉和伏武昌登孫權故城詩。西龕收組練。龕亦訓勝。逸周公蔡公解云。周克龕紹成康之業。言能任繼續成康也。通作堪。晉語口弗堪也。列子仲尼篇。堪秋蟬之翼。韋昭張湛注並云。堪勝也。廣韻云。任堪也。周禮大司馬。司貢分職。以任邦國。注事以其力之所堪。以堪訓任。信與勝任之義同。釋詁允任同義。允卽信。詩燕燕箋。任以恩相親。信周禮大司徒注。信任於友道。史記季布變布列傳。爲氣任俠。集解引如淳曰。相與信爲任是也。龕訓任。因得訓受。方言龕受也。揚越曰龕也。玉篇亦云。龕受也。任受一義。信受亦一義。

囂閑也

爾雅釋言。囂閑也。郭注。囂然。閑暇兒。按郭據孟子爲說也。萬章云。囂囂然曰。我何以湯之幣聘爲哉。趙注。囂囂然。自得之意。無欲之兒也。盡心人之知。亦囂囂。人不知。亦囂囂。注。囂囂。自得無欲之兒。此皆閑暇之義也。今考囂閑義。有並與閑暇相反者。詩魏風。十畝之間兮。桑者閑閑兮。傳。閑閑然。男女無別。往來之兒。箋。古者一夫百畝。今十畝。往來者閑閑然。削小之甚。然則詩意謂地狹而人稠。以閑閑狀往來者之多。傳云。男女往來無別。而多意見。下章。十畝之外兮。桑者泄泄兮。傳。泄泄。多人之兒。下不言往來。上不言多人。

文互見也。荀子修身篇多聞曰博，多見曰閑，閑亦多義。囂者，詩小雅十月之交無罪無辜，讒口囂囂，箋囂衆多也。時人非有辜罪，其被讒口見，椽囂囂然。淮南修務訓莫囂大心，高注莫大也。囂衆也。主大衆之官是。又左氏成十六年傳在陳而囂，合而加囂，又甚囂，且塵上矣。昭三年傳景公欲更晏子之宅，曰子之宅近市，湫隘囂塵，囂並是人衆喧闐不安之兒，通作磬。詩讒口囂囂，釋文引韓詩作磬磬，說文磬衆口愁也。又通作敖。荀子強國篇百姓謹敖，楊倞注謹喧譁也。敖喧噪也。敖卽嗷之省借。爾雅囂閑，蓋兼閑暇衆多兩義。

俾職也

爾雅釋言俾職也。郭云使供職。按俾虛職實於義不治。俾者比之假借也。詩克順克比，禮樂記作克順克俾，是俾比通。比者釋詁云弼、棐、備，比輔也。易亦云比輔也。輔弼皆職官之義。比亦通庀。周禮春官大胥比樂官，鄭大夫讀比爲庀。廣韻比通作庀，是庀者左襄十九年傳官庀其司，庀府庫，庀刑器，十年傳庀羣司。杜注並云具也。周禮大胥比樂官，鄭大夫云具錄樂器，庀亦訓具。又左襄二十五年傳子木使庀賦，注庀治也。具治皆主職之義。

梅柶注

釋木梅柶注云似杏實酢，說者非之。按此非原注也。文選西都賦樅栝櫻柶，李注引爾雅曰梅柶，郭璞曰

枿木似水楊。唐時郭注如此。郭又注南山經云。枿。大木。葉似桑。音南。今作楠。爾雅以爲梅。今本誤枿是郭不以爲似杏實酢矣。今本係淺人所改。

### 孔惠藏書

孔子壁中經。其藏之者。諸說不一家。語云。孔騰。字子襄。畏秦法峻極。藏尙書孝經論語於夫子舊堂壁中。漢紀尹敏傳云。孔鮒所藏。釋文敍錄云。書凡百篇。及秦禁學。孔子未孫惠壁藏之。魯共王壞孔子宅。於壁中得之。並禮論語孝經。隋書經籍志同。愚按。家語漢紀之言恐誤。漢書孔光傳。孔子之後。七傳至順。順生鮒。鮒爲陳涉博士。死。陳下鮒弟子襄。爲孝惠博士。長沙太傅。襄生忠。忠生武。及安國。武生延年。安國。延年。皆以治尙書爲武帝博士。若壁經爲襄所藏。襄旣入漢。及爲孝惠博士。孝惠三年。已除挾書之律。未有不出而獻之者。卽是孔鮒。襄與鮒爲兄弟。雖未入漢。而鮒藏書。襄宜知之。亦未有不出而獻之者。卽未獻之。安國。襄之孫耳。豈有不知其祖之所爲。而待其王壞宅然後從而得之哉。於情事頗不合。釋文隋志屬諸孔惠。當出劉向別錄。康成六藝論等書。是爲得之。惠與鮒騰並世。其所爲二子不及知也。

### 室中有竈說

古人之竈。有在庖廚者。亦有在室中者。庖廚之竈。所以炊爨具食也。室中之竈。則設火以禦寒。說苑刺奢篇云。靈公天寒鑿池。宛春諫曰。天寒起役。恐傷民。公曰。天寒乎。宛春曰。公衣狐裘。坐熊席。隩隅有竈。是以

不寒。隩卽奧字。爾雅西南隅謂之奧。釋文奧或作隩。按孫炎作隩。堯典正義引孫炎注云室中隱隩之處也。古奧隩多通用。堯典厥民隩。文選赭白馬賦注引鄭注云奧內也。禹貢四隩既宅。前漢地理志作奧。呂覽分職篇亦載其事。隩隅作陬隅。陬隅卽指隩隅也。是古人天寒時於室之西南隅設竈置火以禦寒矣。以此準之。他書尙多可據。衛策云衛人迎新婦車至門。扶教送母。曰滅竈將失火。入室見曰。曰徙之牖下。妨往來者。主人笑之。昏禮新婦至壻家大門外卽下車入。升自階西入室。此新婦方至門下車扶以入。庖廚遠在北堂之後。無由見之。是必室中之竈。入門望見火盛。故使滅竈。恐將失火焚屋。夫婦禮成室中。未有曰竈尙存不遷他處者。其文係當時說士設辭取譬。不必實有其事。然足見平時室內有之也。又莊子寓言陽子居南之沛。至於梁。其往也。其家公執席。妻執巾櫛。舍者遜席。煬者遜竈。未有君子舍於逆旅主人而入其爨下者。困學紀聞卷十引莊子逸篇。仲尼讀春秋。老子据竈觚而聽。庖廚非讀書之地。孔老豈相率入廚而肄業乎。是必皆室中之竈矣。置之奧隅者。室中惟此至深密而不向風。又尊者所常居耳。但此竈必可常施。亦可常徹。非如廚竈一定不移。說文。炷。行竈也。炷。炷也。爾雅。炷。炷也。惟可施可徹。故竈能行。炷。炷卽此竈之名也。小雅白華。樵彼桑薪。叩烘于煇。箋。人之樵取彼桑薪。宜以炊饜。饜之饜以養食人。桑薪之善者也。我友以燎於煇。竈用燎事物而已。按古人夜居於室。不用膏燈。燎薪於竈。取明以燎物事。與用燭同。是確爲室中有竈之証。而此竈可以禦寒。亦以取明。則不僅於嚴冬用之。四時並可常設也。其制据白華正義云。炷者。無釜之竈。此竈上燃火。

照物。若今之火爐。按炊爨之竈。爲上穿以置釜。爲旁穿以納火。無釜之竈。則恣其上以置火。而不爲旁穿。形卑於竈。以炤室。則四壁皆明。以煖身。則四旁皆可坐人。孔說當矣。就竈煖身。則謂之煬。玉篇煬對火也。廣韻煬向也。

### 武王母弟

武王母弟八人。首管叔。次周公。次蔡叔。次曹叔。次成叔。次霍叔。次康叔。次冉季。史記管蔡世家之次也。杜元凱注左氏。據襄二十四年傳。富辰數文昭之國。管、蔡、郟、霍、魯、衛、毛、郟、雍、曹、滕、畢、原、鄆、郇。而認前八國爲武王母弟人數。與長幼之次。於定四年傳。蔡叔康叔之兄也。云。蔡叔周公兄。於五叔無官云。五叔管叔鮮、蔡叔度、郟叔武、霍叔處、毛叔聃。二說不同。近毛西河全謝山主史記閻百詩孔驪軒主富辰所數。而要無的證。愚謂史公蓋據世本。當以爲定。富辰不過隨口臚列。有何倫次。如毛叔必非太姒嫡出。左氏言五叔無官。承上周公爲太宰。康叔爲司寇。邾季爲司空而言。謂五叔不爲卿也。毛叔卽顧命之毛公。以司空居三公之一。非無官者。故王肅注云。畢公毛公皆文王庶子。可知五叔中是曹叔。又下文數周公之胤。云凡蔣、邢、茅、胙、祭。而襄十二年傳。則云邢、凡、蔣、茅、胙、祭。此不拘先後之明證。又坊記注云。君陳。周公子。正義引詩譜云。元子伯禽。封魯。次子君陳。世守采地。采地者。周公次子封周。與凡祭並爲內諸侯。春秋時。周公與凡伯祭伯屢見經傳。其爵是上公。而富辰又不數周。閻孔據之。誤矣。至先秦兩漢人書。又多指管



叔爲周公弟者。如鄧析子無厚篇云。周公誅管蔡。此於弟無厚也。列女傳母儀篇。白虎通姓名篇引詩傳。數文王十子。並先周公。次管叔。後漢樊條傳。周公誅弟。注云。周公之弟。管蔡二叔。張衡傳。且獲譴於羣弟。注。成王立。周公攝政。其弟管叔蔡叔謗言。傅子通玄篇云。管叔蔡叔弟也。爲惡。周公誅之。凡此皆是。然孟子云。周公弟管叔兄。足以斷之。趙注云。周公惟管叔弟也。故愛之。管叔念周公兄也。故望之。此漢氏相傳之說。朱子注已改從史記。又高誘注呂氏春秋察微篇云。管叔周公弟。蔡叔周公兄。如此。則蔡叔並兄管叔矣。書云。管叔及其羣弟之謂何。此尤刺謬。惟列子楊朱篇云。周公誅兄放弟。兄謂管弟。謂蔡與史記合。

宰我不死田常

史記仲尼弟子列傳。載宰我與田常作亂。以夷其族。孔子耻之。小司馬謂左氏無其事。有關止。字子我。田闕爭寵。子我爲陳恒所殺。字與宰我相涉。因誤。蘇子瞻據李斯之言。田常陰取齊國。殺宰子於庭。遂殺簡公。尤與左傳陳闕事合。本譌闕止爲宰我。至史公。其事並誤。楊用修則謂斯去宰子未遠。當得其實。宰子之死。仇牧之類。惟史公誣以作亂。爲非。閻百詩又據洪容齋說。孟子載三子論聖人賢於堯舜等語。似是夫子沒後所談。未有師在。而各出意見。議之。無復質正者。宰我不死於田常。更可見。愚按。淮南人間訓云。諸御鞅復於簡公曰。陳成常宰子。二子甚相憎也。君不如去一人。簡公不聽。居無幾何。陳成常果攻宰子於庭。而弑簡公於朝。全是左傳陳闕事。宰我爲闕子我之誤。更無可疑。然韓非子云。宰我不免於田常。韓

非李斯同學。其事之誤屬宰子久矣。史公亦誤據諸子耳。因慨宰子生平以短喪晝寢諸事爲後世口實。史公復以大節誣之。聖門高弟。乃遭此不幸。愚謂卽短喪晝寢。亦未足爲宰子詬病。當時七十子受裁於孔子者。不知幾入歧途。幾經指斥。而後能無乖大義。特其事不具傳耳。其能循序漸進。不涉障礙者。惟顏閔冉庶幾焉。宰子之學。孟子稱其知足以知聖人。較游夏顛孫。於夫子沒後。乃欲重事有子。爲知聖人有不到處。其造就出三子上可知。孟子已論定矣。後人更何所置喙哉。

### 曾子不出妻

孔子三世出妻。檀弓之誣。先正已言之矣。家語又載曾子以其妻藜烝不熟。因出之。人曰。非七出也。答曰。藜烝小物。吾欲使熟。而不用吾命。況大事乎。終身不娶。其子元請焉。曰。高宗以後。妻殺孝己。尹吉甫以後。妻放伯奇。吾上不及高宗。中不比吉甫。庸知其得免於非乎。此說亦誣之甚。不熟小事。亦常事。本不應出。曾子儻虞其後。奚不可待大事。不用命而後出之。焉有大賢。身自廢禮。而踰七出之條如是。乃更以強辭對人者。據漢書王吉傳。子駿妻死。因不復娶。或問之曰。德非曾參。子非華元。亦何敢娶。如淳引韓詩外傳曰。曾參喪妻不再娶。人問其故。曾子曰。以華元善入也。今外傳逸此文。然則曾子早喪妻不再娶耳。漢人說因有傳會爲出妻不再娶者。王子雍僞撰家語。采獲之過。不宜輕信。以誣大賢。

### 讀孫淵如魏三體石經遺字考



訂正。訂正則當作𠄎。下非德于民之中。隸續作𠄎。依說文訂作𠄎。是也。此仍不改。考翼不可征。征。隸續作  
徑。延字也。說文。延。正字。征。或體。孫注云。汗簡引作徑。小異。而正文乃書作徑。並由寫誤。淵如此考。寄顧氏  
廣圻刊板。或誤在顧氏耳。大校石經古文。半與說文同。半與說文異。卽異者。意俱不遠。故凡有誤字。可舉  
說文正之。此足見邯鄲淳與許君同傳古文。淵源莫二。視汗簡已下言古文学家。雜采漢魏而降。臆造俗體  
野書。以炫耀於世。而強誣爲出於三代已前。比考其形於六書。多莫從究詰者。其真僞不可同年語矣。雖  
三體僅存八百餘文。而古文尙居三之一。汗簡所載。又頗溢於隸續數十百文。合而觀之。猶幸可得其萬  
一也。

舅

妻之昆弟爲甥。見爾雅。妻之昆弟曰外甥。見釋名。按楚筴載春申君進李園之女弟於考烈王。王以李園  
女弟立爲王后。朱英謂春申君曰。李園王之舅也。則妻之昆弟古亦稱舅。

環沂邑大半皆山。其大者卽周禮之東鎮沂山也。巍然峙於邑之北。其東北西北西南一帶。皆層巒疊嶺。山石确礧。鮮有沃土。又沂沭兩大水皆出邑境。沭水經沂境百餘里。卽入莒州境。沂水自沂河頭發源起。至邑之葛溝莊止。曲折經行於邑境者。幾四百里焉。每遇夏秋之間。濱兩水之左右岸居者。歲歲苦澇。甚且漂溺畜產室廬。人有其魚之慮。以故沂境雖遼闊。則壤成賦之地甚少。其風俗又富者連阡陌。貧者無立錫。又不善治生產。於是富者亦貧。貧者乃益貧。夫禮義生於富足。民無恆產。因無恆心。無怪地方日以多事而風俗亦因之不古也。余於癸丑春攝邑事。凡七閱月而得代。簿書鞅掌。足跡遍於四鄉。余旣憫邑人之不善謀生。而又慮風俗之不能還淳。因於足之所經。必召其秀者與其父老。勤勤諮詢。邑人旣喜余之質。又樂余之寬。故問無不言。言無不詳。余皆心焉誌之。回憶鄉居時。好讀農桑書。亦時有所得。大要不外生之者衆。食之者寡。爲之者疾。用之者舒。四語。沂之民往往與是四語相反。余旣與沂民習。因以目之所見。耳之所聞。證之載籍。考之沂邑之風土人情。有可以藥其困而厚其俗者。輒筆之於冊。顏曰沂水桑麻話。蓋在沂言沂也。若泛論農桑。則農家者流其書亦何嘗不汗牛充棟。又何俟余之捭拾也哉。

沂多山。山必有場。種梓櫛以養山蠶。歲出山繭。山綢無算。西客皆來販賣。設經紀以抽稅。歲入數千金焉。東門外山綢會館。爲山綢客公會之所。頗壯麗可觀。可想見當日綢行之盛。近則小民貪目前之利。伐其樹以助薪。創其根以爲炭。無山不童。而山蠶之利。在官在民。皆不及昔之十一二。沂在羣山中。糧粒不能致遠。惟賴此項爲生財之大宗。今此項一廢。非復昔日之殷富矣。

沂既多山。山必有水。有源者十之五六。皆冬春不斷流。無源者十之四五。惟夏秋之間。承受山水。其有源者。類在山中。誠能屈曲引之。使勿遽就下。凡山麓原隰之地。皆可做南方開水田。以種稻。既可以得水之利。又可以免山水驟發時沖淤低地之患。計不出此。任其勢若建瓴。一洩無餘。殊爲可惜。

兩山之間。謂之峪。峪必有平地。數頃或數十頃不等。又有山泉溪澗。以資灌溉。其風景與南方無殊。誠得留心民事者。爲之修水利。講農事。沂民之生計。不患其不饒。

邑民多種蘋果。成熟時。正直沂河水漲。可以由水路直往南。販賣獲利者不少。

近日山陽梓櫛樹。幾伐盡。育蠶者甚少。亦間有種桑者。惟不知種植之法。只有樹桑。並無田桑。又北地較寒。樹桑發葉甚遲。往往蠶出無桑。故育蠶者。率同兒戲。以柳筐盛之。甚不如法。利益亦微。然亦間有收絲一二百兩者。有雙絲絹。其佳者類紡綢。價亦不廉。惜業此者尙少耳。綢行雖壞。繭行尙可觀。每至繭成時。各集賣繭。堆積如阜。間有貴州客來販買。然亦祇有昔之十二三矣。

邑民不知種桑。近有種植者。皆自臨朐倩人來種。亦不甚如法。予以南方田桑之法。詳細告之。其父老甚喜。求以所告者刊本。會瓜代。不果。

蠶初出。桑葉苦不足。地內出一種草。葉長而厚。一草四五葉。皆貼地生。名曰地桑。三月杪采之。云可以飼蠶。此予在莒州目擊者。莒沂接壤。想亦有此草也。北方寒。桑葉甚遲。此草大有益於蠶事。

秋後。桑葉經微霜。甚肥嫩。土人采以爲茹。據云可以攪小豆腐。柳樹初發嫩芽。亦掇以爲茹。榆錢榆葉。食者尤多。亦可見業園圃者甚少矣。種豆者。豆將熟時。必盡掇其葉以攪小豆腐。

沂河入夏水勢平。槽數百石糧食船。可以直入運河。每年皆有糧客自南來販買。沂邑木植甚賤。若廣造船隻。不惟糧食可運往南方販賣。一切土產如柿餅、核桃、梨、棗、落花生、靛、酒、豆油、豆餅之類。皆可販運。每年頻果皆運往南方。可以類推。其船回頭又載南貨回沂。此無窮之利。惜北人不知水利。有此名水。徒受其漲溢之害。不獲其利濟之功。良可嘆也。誠能修舟楫之利。葛溝集爲第一。馬頭界湖第二。縣城第三。葛莊第四。東里店第五。中莊第六。燕子崖第七。南麻第八。每歲四月開運。九月底歸埠。以冬春兩季處處有橋梁。恐有阻滯也。如此辦理。則沂將爲一都會。西通蒙陰。北通臨朐博山。百貨流通。利濟良非淺鮮也。沂邑木植甚賤。嘗見柏樹長丈餘。粗一兩圍者。不過值錢六七百文。若於近河之地置木廠收買。於夏秋之時編筏南運。卽近在蘭郟。售賣獲利亦不少也。

東里店北有水碾一座。碾榆皮爲業。用爲線香者土名榆皮。疑卽地榆也。歲入租價不貲。工費亦鉅。宜於有源山水處所。多設水碾水磑。可省人工不少。

沂邑地非不足。特苦礮瘠。其俗又廣種薄收。北方大抵皆廣種薄收。沂爲尤甚。窮戶恆苦無牛。一夫轍耕四五十畝。人力既不能精。糞力又薄。就使歲歲豐稔。不過畝收數斗。僅敷食用。一遇旱澇。則流離死亡。不堪言狀。每一念及。不禁惻然。種植之法。宜精不宜多。一人之工夫有限。與其枉用於不毛之地。收成亦屬有限。曷若專注於數畝恆產中。耕耨耘穫皆及時從事。一無苟且。又勤勤積糞。所收必倍。就使家有餘田。甯可少種一季。倣古人易田之法。以舒地力。

山場旣壞。小民不知大計。有山必開。地卽礮确坡陀。亦必多方開種。最爲害事。山水甚驟。賴有草根護持。不致淤刷。一經開種。則木山之沙土隨水而下。近山之地。先受其害。久而山河盡淤。山水暴漲。勢不能容。必將橫決平原。近河之地。無不受其害。官私皆宜設厲禁。斷不可姑容。保全當不少也。

沂邑集場甚多。著名者三十餘處。尙有義集小集。不計其數。通工易事。莫便於趕集。若無事趕集。微論易滋事也。一人入集。必不能枵腹終朝。數日一集。亦不能徒手而歸。爲家長者。各宜約束其子弟。總以少趕集爲要。每集必到者。除工商買賣人外。其人可想而知矣。

沂之燒鍋約有二百餘口。每口約有糧粒百餘石。計歲耗糧粒數萬石。他屬燒鍋尙有多於是者。而地方



不受其害。以其酒能行遠。或在通都大邑。雖曰耗糧。獲利尙厚也。沂則以數萬石糧粒。徒供本地之人。一醉於朝夕。兩餐仍不能稍減。大可惜也。且鄉愚無知。往往大案。皆由於酒後。尤爲可嘆。是在長民者。無貪小利。若驟行嚴禁。勢必不能。宜仿都中戲樓法。准其日減。不准日增。亦去火抽薪之一說也。

民間好種菸葉。必擇肥地。用十成糞。一畝之入。值數十千焉。次年種麥。其糞之餘。力猶可倍收。夫糞多而力勤者。爲上農。但使不惜工本。皆可倍收。豈第種菸然哉。種菸之利。沂民胥知。一時誠難驟更。凡種地者。皆能如種菸。則穀不可勝食。雖遇歉年。不致爲災矣。民間有地百十畝。必招佃種。名曰覓漢。多係南縣流民。俗謂闢費爲南縣。臨博爲北縣。流民無以爲生。土著者喜其勤謹。撥田與種。久而流民之室家亦來就食。通工易事。雖有古人任卹之風。無如生聚日多。地土日狹。種山開荒。大抵皆此輩階之厲也。又中人之家。必有飯婦針工。家人安坐而食。旣不能各盡其力。外僱之人。除身工食用外。侵漁走漏。皆所不免。懈怠成風。勿怪貧者益貧。而富者亦日貧也。

民間不善積糞。故膏腴之地。水旱時若。猶可豐收。至於瘠壤。雖收亦僅矣。積糞之法。養生口爲上。老幼勤勤。檢拾爲次。若有坑汪。尤宜瀉糞。惟北方多用乾糞。若將所瀉之糞。攙土曝乾。上地亦佳。總之。勤儉爲居家要法。勤則有餘力。儉則有餘財。好處不可殫述。積糞特其一端耳。

沂俗家有地數十畝。往往無牛。以不善積穀。歲稍歉。卽賣牛。盜竊又多。其弊皆由於不禁殺牛。夫殺牛者。

盜牛者之窩也。賣牛者亦取其易於成交。性畜例不能質當。上集賣。又須經紀牙行。故願賣於屠。夫中人之產。買一牛甚難。賣一牛甚易。必待官司設厲禁。則盤查實爲利藪。是在民間自行禁止。有犯則告官嚴究。無人殺牛。則竊者無處銷贖。賣者亦難於售主矣。

南鄉做泉莊。居民數百戶。盡以績麻爲業。合莊無一窮戶。東里店居民善種菸葉。地方亦頗殷富。可見自然之利本屬無窮。苟善於謀生。無不足之民也。

沂境遼闊。地土不少。跬步皆山。成熟之地。不能一則。除膏腴平壤種植如法外。其餘類不得法。茲特爲一拈出。

坡地。俗謂平壤爲坡地。兩年三收。初次種麥。麥後種豆。豆後種蜀黍。穀子黍稷等。穀皆與他處無異。惟鋤芸欠工。

夫糞力又少。故收成較薄。不知多鋤一次。多糞一次。即可多收數分。地土決不負人。蜀黍地尤爲蕪穢。禾苗尙未成熟。草萊已叢生其間。雖有肥地。如何能望豐收。

澇地。俗謂污下之地爲澇地。二年三收。亦如坡地。惟大秋概種稭子。形如稗子。莖沂最多。此禾性耐水。且易熟。不費工本。民間

食穀大半皆此。甚合土宜。麥後亦種豆。雨水微多。顆粒無收。徒費工本。沂俗有種稻者。原係秋禾。然南方

有晚稻。夏至始種。似此等澇地。麥後亦可播種。收成雖薄。較之種豆。終可望收也。稻皆旱種。其種植之法與北方種他穀同。非南方

方水也。

窪地較潑地尤下常有積水。遇旱年涸出。始可播種。不過種麥一季或蜀黍一季耳。此等地全賴人力。與其十

年九荒。莫如擇最下之區。挑深爲塘。以洩積水。近塘皆種葦。葦之人處最多。一穗值一二文不等。挑出之士。就以培稍窪之

地。地既墊高。水又有所歸。年年可種矣。特小民不知大計。難於謀始。是在有心人善爲督勸也。

汪坑。冬春皆有水。可種蓮蕩。花實根葉。無一不可得厚值。城東北有莊名沂杭。蓮塘彌望。雜以蘆葦。此莊

最爲殷富。南鄉之蘇村。亦有稱蓮蕩者。類皆小康之家。其餘汪坑甚多。棄而不種。甚爲可惜。

園畦。有水之地始種園畦。沂俗競種菸葉。業園圃者甚少。勸民多種園圃。民間菜蔬自多。且業園圃者終日勤劬。可

戢游惰之風。有水處宜種靛。卽大藍。畝可獲錢數十千。近城市處種蔬。瓜瓠茄豆。如扁豆刀豆之類。不惟可蔬。且可

代糧也。

沙地宜種長生果。蒙陰種者甚多。沂水尙少。此物雖不可以爲飯。用以打油。不次於豆也。又宜種薯蕷。俗名

瓜。地民間亦有種者。藏以地窖。不能過二月。不知此物可切作小塊。曬乾收藏。次年和糧食爲粥。可以省穀。

且甚宜人。種之亦不費工本。不可以不多種也。此物易種易生。水旱冰雹均不能傷。南人有曬乾築牆以

備荒者。常年充民食。亦與米麥同功。非尋常瓜果比也。沙地亦有宜木棉者。沂不務紡織。布疋甚貴。以種

棉者甚少也。宜相地多種。教以紡織布疋。自可足用也。

石田地內盡小石子。雖出糧食。收成甚薄。宜於耕地後。效種長生果法。以竹篩篩之。一畝不過費三四工。

以後永食其利。何憚而不爲也。

嶺地本屬荒山。不宜五穀。近來貪利愚民。沿山開墾。法宜嚴禁。其稍稍能蓄留水澤。遇山水漲發。亦不甚壞事者。亦只宜種包穀。東省名棒子。沂邑名玉米。取其易於成熟。亦不大需糞力也。

山場從前皆種梓櫟。近已創空淨盡。雖種雜穀。一遇旱年。顆粒不收。雨水稍多之年。又冲刷爲患。不若仍舊種樹。不惟梓櫟山桑。可益蠶事。凡松柏楸栗。相其土宜。在在可種。既可以落實取材。又可以保護山脈。不致冲淤田地。其利甚溥。是在良有司實力勸戒。

以上各條。皆目見耳聞。訪之賢父老。雖未必盡合機宜。可探者當亦不少。余攝篆數月。正值多事之秋。加以才力淺劣。雖心知其故。不能爲邑人謀興除之方。余負邑人多矣。爰以所記憶者。隨筆書之。以俟諸異日焉。



# 獻犧

周禮司尊彝曰：春祠夏禴，其朝踐用兩獻尊，其再獻用兩象尊。鄭氏注曰：獻讀爲犧，犧尊飾以翡翠，象尊以象鳳皇。陸德明音義曰：獻犧同，素何反。司尊彝又曰：凡六彝六尊之酌鬱齊獻酌。鄭氏注曰：獻讀爲摩莎之莎，摩莎，莎之出其香汁也。陸德明音義曰：獻，素何反。案：獻尊卽犧尊，與象尊相須爲用。舉其事，則謂之獻尊，舉其名，則謂之犧尊。本一物而二名。春秋傳曰：犧象不出門。禮記曰：君西酌犧象。又曰：尊用犧象。又曰：犧象，周尊也。是二尊相須爲用之驗。蓋犧尊爲牛形，象尊爲象形，犧音義，獻音憲，各讀如本字，其義自明。司尊彝變犧爲獻者，以朝踐乃始獻之禮，祀事之始，獻言之，故謂之獻尊。若舉其形與名言之，實卽犧尊也。鄭氏讀獻爲犧，又以二字皆音莎，是不知二者固是一物，其本字則各有音義，無庸牽混。陸氏沿鄭氏之說，以犧獻二字並音莎，而於他經凡言獻言犧處，悉音以爲莎，不能訂正其義，而反據以改他經音訓，是二字始誤於鄭氏之穿鑿，繼又誤於陸氏之因襲，而經文因之愈晦矣。

考詩頌毛傳說：犧尊用沙羽以飾尊，是鄭氏讀犧爲莎之所本。意謂刻鳳皇之象於尊，其形婆娑然。又考詩傳疏引王肅注禮：以犧象二尊並全刻牛象之形，鑿背爲尊，此說甚確。南史劉杳傳：杳嘗於沈約坐語及犧尊，約云：鄭康成答張逸謂畫鳳皇尾婆娑然，杳對以此言未必可安。古者尊彝皆刻木爲鳥獸，鑿頂

及背以出內酒。魏時魯郡地中得齊大夫子尾送女器。犧尊作犧牛形。晉永嘉中。賊曹嶷于青州發齊景公冢。得二尊。形亦爲牛象。二處皆古之遺器也。約以爲然。是犧象皆刻木爲形。灼然無疑。乃聶崇義三禮圖。既采阮氏義。于犧象尊皆作一器。繪牛象形。并云。諸侯飾口以象骨。天子飾以玉。又采鄭氏義。犧尊飾以翡翠。象尊以象鳳皇。因仍譌誤。誠有如沈括趙彥衛林光朝諸人所譏者。其殆未考劉杳之說乎。

矜

徐華野太守。偶語及爲諸生時。應經古試策問。矜字從矛。何以訓爲矜憐。且從今得聲。何以收入蒸登部。爾時茫無以應也。請申其說。予按。矜。矜。判然兩字。一從矛。今。一從予。今。不容相溷。華嚴音義上卷云。矜。毛詩傳曰。矜。憐也。說文字統。林罕小說敘所謂李陽冰就說文刊正。作三十卷。其時復於篆。矜。矜。俗憐也。皆字下便以隸書照之名之字統者是也。非後魏楊承慶字統。矜。矜。俗憐也。皆

從予。今。若從矛。今者。音巨斤反。矛柄也。玉篇二字皆從予。今。無矛。今者。是慧苑在唐時所見。毛詩經傳並作矜。而玉篇則有矜而無矜。此古本未經竄改之據也。今考詩之矜。憐字爲韻者。苑柳以叶天。臻。桑柔以叶句。民。填。天。皆真諄部中字。古矜。憐通用。論衡引書。予。惟。率。肆。矜。爾。引論語。則哀。矜。而。勿。喜。並作憐字。憐亦真諄部中字也。故矜與從矛。今聲。訓。矛。柄。入蒸登部之矜。斷是兩字。詩戰戰兢兢。左傳引作矜。矜。說文。蒸韻。之。兢兢。自漢人以二形相似。隸體雜書。如東海廟碑。矜。閱。費。鳳。別。碑。恤。憂。矜。厄。又。矜。此。黔。首。石。經。論。語。則。哀。矜。而。勿。喜。辛。李。造。橋。碑。哀。矜。下。民。左。雖。從。矛。右。仍。從。令。至。孫。叔。敖。碑。鰥。寡。是。矜。右。雖。從。今。左。仍。從。予。石。經。

尙書。惠于矜寡。乃直從矛今矣。於古從令聲之字。皆入眞諄部。其從今聲者。則入侵覃部。自晉潘岳哀永逝文。用矜憐之矜叶興承升。從令聲者。乃混入蒸登部。而矛柄之矜俗別從堇聲。郭注方言云。矜今字作矜。巨巾反。於是從今聲者。又混入眞諄部。降及唐時玉篇。乃概作一矜字。今本作矜。宋陳彭年等所改。廣韻十七眞云。矜。矛柄也。古作矜。巨巾切。十六蒸云。矜本矛柄也。巨巾切。字樣借爲矜憐字。居陵切。又概作一矜字。而分予柄義入蒸。互易二字古讀。此古今音義之大變也。廣韻已後。矜獨行而矜遂亡。說文亦因以刪削矣。顏籛由爲子路妻兄。

孟子言孔子於衛主顏籛由。彌子之妻與子路之妻兄弟也。孫疏云。彌子之妻與子路之妻是兄弟也。與上文顏籛由截然若不相涉。後人相承此讀不改。考史記云。孔子適衛。主子路妻兄顏濁鄒家。索隱謂所云妻兄與孟子說不同。全謝山答問從孫疏。以籛由卽濁鄒。而引孔叢子籛由善事親。其後有非罪之執子路哀金以贖之。或疑其私於所昵。因舉此爲史公指作妻兄之證。閻氏釋地云。籛由爲子路妻兄。則亦彌子瑕妻兄也。余案史公以顏濁鄒爲子路妻兄。正據孟子此文。非別采自他書。古蓋讀彌子之妻與子路之妻兄弟也爲一句。言籛由爲二妻之兄弟也。觀小司馬云云。知後世誤讀自唐已然。至孫疏始明見讀法。閻全亦相沿俗讀習慣不悟。多方推揣。以求其合。不知孟子本文明白易見。卽史公所據以立說者也。



王豹

王豹。趙注謂衛之善謳者。朱子因之。其實以豹爲衛人。並無所本。豈以淇水在衛。因處淇而卽謂是衛人耶。余案左氏哀六年傳。齊公子陽生之立。殺王甲。拘江說。囚王豹於句竇之邱。杜注。三子。景公嬖臣荼之黨。以時代考之。於淳于髡所稱似屬一人。意者豹因善謳。爲景公所嬖。悼公立。因而未殺。後遂奔衛。處淇。則豹實齊人也。此章髡對孟子語。皆盛誇本國之人能變國俗。如緜駒。華周。杞梁。皆齊人。不應羸一衛人。且其所稱如華杞輩。皆當時大夫。姓名顯著。斷不舉一他國編戶無名位者。錯出其間。知豹爲景公嬖大夫無疑也。惟緜駒無可考。或卽高唐之邑大夫耶。

裸

周禮春官大宗伯。以肆獻裸享先王。鄭注。裸之言灌。灌鬱鬯。謂始獻尸求神時也。此語殊未愜。王氏昭禹。薛氏衡諸說相承。率多牽混。余案。求神獻尸。非一時事。未可僞侗言之也。蓋祭祀以裸爲始。所以求神於陰而禮之。旣裸然後朝踐以薦腥。饋食以薦孰。記所謂報以二禮是也。旣乃舉獻酒之禮。於是有羨尸卒食之事。當始祭。先用裸鬯求神。其時尸未入廟。固不容羸及獻尸禮。祭統尸飲五節疏曰。凡祭二獻。裸用鬱鬯。尸祭奠而不飲。案疏說。乃尸旣入廟。主人裸尸之禮。卽祭統所云。君執圭瓚裸尸。大宗執璋瓚亞裸也。鄭氏謂大宗亞裸。容夫人有故。攝焉。是亞裸本屬之夫人可知。此則專據獻尸言之。與始祭時尸未入

廟先用祿鬯求神者有別。又不得兼言求神也。孔疏謂初二祿尸祭奠不飲。朝踐二獻。饋食二獻。及食畢主人酌尸。此皆尸飲之。故云尸飲五。薛氏衡亦云。二祿之後。有朝事饋食與夫卒食。所以備九獻。而二祿不與焉。夫曰二祿。固決非始祭時灌地求神之祿矣。鄭氏以求神獻尸皆朝踐饋食以前事。因舉四字並說。後儒未能分析其節次。遂致耳葛不清。若一以尸入廟之先後爲斷。則割然判爲兩事。而無所用其牽混矣。

### 臨頌

後漢書鄭康成傳。有答臨孝存周禮難。又孔融傳。爲北海相。郡人甄子然。臨孝存。知名早卒。融命配食縣社。而魏志注引續漢書。融爲北海相。郡人甄子然。孝行知名。融令配食縣社。蓋傳本寫脫臨字。淺人不知別是一人。因改存字爲行。而誤以甄子然。孝行知名爲句。漢紀云。使甄子然臨配食縣社。臨下又脫孝存二字。皆當據范書補正之。其姓俱作臨。至賈公彥序周禮廢興云。林孝存以爲武帝知周官末世瀆亂。不驗之書。故作十論七難以排弃之。鄭元徧覽羣經。知周官爲周公致太平之迹。故能答林頌之論難。使周禮義得條通。據此。則孝存名頌也。惟其姓作林。與范書異。考毛詩棫樸闕宮正義。禮記王制目錄正義。皆作臨頌。禮記王制正義。周禮女巫疏。司馬序官疏。及此廢興序。並作林頌。似當以范書爲正。作林非也。又考伏滔青楚人物論云。後漢時。鄭康成。周孟至。劉祖榮。臨孝存。侍其元矩。孫賓頌。劉公山。皆青士。有才德。


者。所舉諸人。皆是僂字。知孝存爲碩字無疑。而其姓當作臨。又無疑也。十論七難。其詳蓋不可攷。孝經序注正義。稱鄭志目錄記鄭所注五經之外等書中。有答臨孝存難禮一種。其遺文見今注疏稱答臨碩者。禮記王制內兩條。毛詩內兩條。周禮內三條。惟女巫疏義所引難答歌哭而請者一條。首尾全具。詩械樸正義。稱臨碩并引詩三處。六師之文。以難周禮。鄭釋之云云。此亦足見所難之一端。至閔宮序官三引。均是答此事。王制兩引無難義。以奩詞求之。當是持王制田祿以難周禮耳。十論更無從彷彿。蓋其人本康成弟子。又同鄉里。故得以往復辨難。然亦可見古人爲學不肯苟同如此云。

奔

奔字說文無之。而書中麟駉倂奔並從奔聲。似乎生子之文不應遺漏。大徐於倂下云。奔不成字。當從倂省。非也。其後廣韻集韻並不收奔。音義遂闕。獨玉篇五音集韻有之。均訓爲火種。正字通直以爲同。隸引管子弟子職注。折卽作折炎。今作奔。案弟子職。櫛之遠近。乃成厥火。房注但云。櫛謂燭盡。不注音切。亦并無折卽作折炎字。楊慎譚苑醍醐云。管子弟子職。櫛之遠近。左手正櫛。乃取厥櫛。舊本櫛作卽。叶音燼。櫛卽皆假借字。正作奔。從火從収。音燼。以今本管子校之。俱不合。張楊並好僞造古書以欺世。其言未必足據。或古本管子櫛作奔。讀同燼。亦未可知。然究屬揣測之見。未敢信爲確證也。子友苗仙麓言。幼讀說文。熊從炎省聲。思之不得其故。夢中見有人兩手曰火。擲之。驚而寤。因恍然於炎。乃奔之譌。蓋六朝人書多

變升爲大。如奔奕弊獎弊弊之類。率溷雜不分。因升而誤大。又因大而誤火。於是奔省聲遂成炎省聲矣。予謂奔字若讀同燼。則與熊聲相去甚遠。其說仍不可通。不知奔既從収。則収亦聲也。證以鬻字奔聲。讀作乳恐反。與鳥獸鬻毛之鬻同。則奔字決爲東冬部中字無疑。必如是讀。熊從奔省聲。方爲諦當。至韓道昭別作士戀切。音僕。其去収字本音益遠矣。





鳳氏經說

鳳韶著

本館據粵雅堂叢  
書本排印初編各  
叢書僅有此本

# 鳳氏經說

卷一 宗法 大夫祭四親 九族無外兄弟有外 天子諸侯即位以殯明日 中月而禫當從鄭

父兄子弟 饋主言米殮饗主言飯 居處 下管金奏笙奏聲詩 大夫妻不稱世婦 皮弁

服 拜主手言 文章主采帛言 車制 車前馬 車上器

卷二 非以君命使則不稱寡大夫士則曰寡君之老 饋之以其禮上賓太牢積惟芻禾 賓皮弁

聘至于朝賓入于次乃陳幣公皮弁迎賓于大門內賓入門左 公一拜送賓以几辟北面設几不

降階上答再拜稽首 公側受醴賓不降一拜進筵前受醴 擯者執上幣以出禮請受賓固辭公

答再拜 設殮歸饗饋 腳臚臚蓋陪牛羊豕 醯醢百饗夾碑 門外米三十車禾三十車薪芻

倍禾 賓朝服卽位于大門外如聘 公如賓服迎賓于大門內 嗇夫承命告于天子 侯氏升

致命 君視大斂主人六出 君出門廟中哭主人不哭辟 卜人及執燹席者在塾西 爲燎于

門內之右 其二廟則饌于禰如小斂 荐車荐馬 側亨于廟門外之右設洗于西階西南陳鼎

于門外之右 饋饗在東壁 饌兩豆菹醢于西楹之東醢在西一鏹亞之從獻豆兩亞之四籩亞

之 匱水在西階之南 尸左執爵右取肝濡鹽振鬯祭之加于俎 漉酒 舉肺脊以授尸尸受

振祭鬯之左執之乃食食舉主人羞斝俎于腊北 尸食舉于菹豆 長兄弟及宗人折衆賓及衆



兄弟內賓宗婦若有公有司私臣皆殺齊 少牢尸食 主婦取籩于房中執棗糗坐設之棗在棗南糗在棗南婦贊者執粟脯主婦受設之糗在糗東脯在棗東 祭祀共大羹餽羹賓客亦如之 條狼氏 上公五積 上公飧五牢 坐如尸立如齊 四十日強而仕七十日老而傳 下卿位

介者不拜 載鞭策 于外曰子 季武子成寢 孔子蚤作 朝不坐燕不與 大飲烝

卷三 關雎 麟之趾 采蘩 墉牆 在前上處 將仲子 叔于田 羔裘 著 猗嗟 十畝

之間 伐檀 椒聊 羔裘 小戎 終南 無衣 宛邱 七月 四牡 皇皇者華 常棣

蓼蕭 湛露 彤弓 菁莪 采芣 正月 雨無正 小弁 大東 甫田 頍弁 車牽 賓

筵 魚藻 采芣 隰桑 郁人土 緜 棫樸 皇矣 靈臺 生民 行葦 假樂 泂酌

卷阿 板 崧高 常武 載芟 閟宮 元鳥 濬哲 春秋討賊

右經說三卷凡百有餘條江陰鳳先生之所著也先生名詔字德隆江陰縣歲貢生所居濱江邨巷僻陋聚生徒謀精以活城邑中無知之者獨守一經矻矻白首困而不感年七十卒嘉慶之十有六年也國朝治經之家獨盛于前代而于三禮尤爲粹深如長洲惠氏四明萬氏婺源江氏桐城方氏休寧戴氏歙金氏類能鉤稽故訓探索隱誤辨名當物往往有疑辭奧旨前人說之而愈晦一經解駁卽羣然當于人心者先生生窮僻之壤旣與諸先生闊絕其所著書亦不能遍見而窮思獨造所得殆不相讓以是知志致卓越者固無所待而道術之明自有時也然而諸先生盛時聲望翕然當宁興歎公卿

側席承學之士。無不就而請業焉。而先生之居。去予居不十里。而未嘗相聞。比予友王君瑤舟爲予言。思欲一見先生已歿。歿而其子不能世其業。及門之士亦無有能傳之者。可慨也。瑤舟又言。先生經說盈筭。皆隨手條記。麇雜無次第。釐訂逾月始成此編。其缺落差訛不能辨識者。尙十倍于此。精力疲薾。未能周稽。約予歸而盡以畀予。當更綜比而續刊之。以成一家之學也。先是有四書補考。其門人輯先生之說。涉四子書者爲之。松江吳氏刻于藝海珠塵中者。曰讀書瑣記。僅數條。其名皆非先生所自定。今所編凡已見于四書補考者略之。瑣記則并入焉。瑤舟名熾。陽湖縣學生。工文詞而邃于學。以沈思致病。所著學易五種說。亦有裨說經者。嘉慶廿有五年七月。刻于粵東。武進李兆洛鈔。



# 鳳氏經說卷一

江陰鳳詔著

## 宗法

先王爲大夫士立有宗法。義取尊祖收族也。大傳曰：別子爲祖，繼別爲宗。繼禰者爲小宗，以魯事方之。如桓公子季友爲大夫，是爲別子，別於正適莊公，繼世君國也。爲祖，大夫不得祖諸侯，別子之適子孫，世世祖此始爲大夫者爲太祖也。繼別，別子之適子孫也。爲宗，自別子之適子始。雖歷百世，族人咸奉其適爲宗也。繼禰，如季友庶子之適，祭庶子者也。亦曰宗，同庶子出之兄弟宗焉。曰小宗之者，但兄弟也。繼禰者，之適庶子，乃其祖。主祖之祭，從兄弟宗焉。則爲繼祖之宗。繼祖者，之適庶子，乃其曾祖。主曾祖之祭，再從兄弟宗焉。則爲繼曾祖之宗。繼曾祖者，之適庶子，乃其高祖。主祭高祖，三從兄弟宗焉。則爲繼高祖之宗。繼高祖者，之適於庶子親盡不祭，四從兄弟，亦不復宗。此適焉，如季友更有庶子三四人，宗法皆然。繼祖，繼曾高祖，亦統謂之小宗。大宗惟一，小宗無數。故大傳又曰：有百世不遷之宗，有五世則遷之宗。宗其繼別子者，百世不遷。宗其繼高祖者，五世則遷。此大小宗法。季氏如是，孟氏、叔氏，亦如是。故呂藍田曰：魯三桓爲三大宗，鄭七穆爲七大宗，其由他國來，特起爲大夫士，亦如是。宗法如是止矣。而大傳又曰：有小宗而無大宗者，有大宗而無小宗者，有無宗亦莫之宗者，公子是也。講家皆謂假如國君有兄弟四人，皆庶

公子不得宗君。則君爲之立一庶長爲小宗以統之。是有小宗無大宗。國君若有同母弟。則立爲大宗以統之。是有大宗無小宗。國君之弟止一人。是無宗亦莫之宗。愚按此說不可曉。文王世子曰。公與族燕。以齒。族食。世降一等。五廟之孫。雖爲庶人冠。取妻必告。死必赴。練祥則告。以宗法之尊祖言。則諸侯祭五廟。公子公姓。公族皆從祭矣。以收族言。則族燕。族食。冠昏凶喪同之者五世矣。是諸侯方且五世公族宗之。公子兄弟身爲別子。復有何事當統。而君或立同母弟爲大宗。或立庶兄弟長爲小宗乎。別子之適祭別子。羣子統焉。故稱宗。當別子身。何謂宗乎。先儒有謂爲公子立小大宗。權攝祭事。傳至其子。而身爲宗矣。吾不知權攝之祭。是何祭也。周官大宗伯職曰。以飲食之禮親宗族兄弟。圖宗人嘉事。王特爲之集同姓。臣。眠。燕。朝。睦。族。之。政。天子以諸子官領之。諸侯以庶子官領之。故呂藍田曰。天子者王族大宗。諸侯者公族大宗。愚謂但無宗名。義實具之。抑此禮但祖廟未毀者然。五世之外。不可無統。故先王立之宗。使大夫傳一世。卽各有宗。其義密矣。何嘗別子卽有宗也。自大傳謂君爲公子立大小宗。講家遂謂魯季友乃莊公母弟爲大宗。而統孟叔矣。并以例之王子。而謂周公爲大宗。統諸姬矣。宗之首重者祭。有周公。季氏。大宗之說。遂謂魯得立出王廟。祭文王。季氏得立桓公廟。如毛奇齡輩矣。噫。諸侯不敢祖天子。大夫不敢祖諸侯。後人講大傳曰。公子不得宗君。本此兩言意也。祖宗二字。既有所不辨。而蔓衍公子有小大宗之說。轉謂魯得祭文王。季氏得祭桓公。其迷謬不足深論。愚獨謂大傳此條。推之于義。一無所處。稽之于典。他未有聞。姑闕疑可耳。萬氏亦云不知何義。既又推之以爲公子助祭當有統。故立宗。且繪圖以說之曰。

適公子爲士。則爲小宗。以統庶公子爲大夫士者。此爲有小宗無大宗。適公子爲大夫。則爲大宗。以統庶公子之爲大夫士者。此爲有大宗無小宗。顧助祭之統。不出位列執事二端。廟中序爵。如適公子爲士。庶公子爲大夫。大夫序于阼階下。門東西之士。得參其列。統之耶。廟中序事。如適公子爲士。庶公子爲司徒。司徒奉牛牲。士得與其事。統之耶。萬氏又曰。此大小宗及身而止。子孫在廟。又何以可無統耶。其說尙多。大概一字不可曉。

### 大夫士祭四親

程子曰。自天子至於庶人。高祖皆有服。有服則皆有祭。大夫三廟。太祖廟祭太祖。昭穆二廟具四主。士一廟。亦祭四親。其言原本禮制。確不可易。論者則謂程子之說。於經無據。或又謂禮以義起。大夫士祭四親。雖先王之禮未之有。義自可通。或又謂大夫士祭及高祖。亦必待有大事。省于其君。干祿而然。三說皆非也。大傳干祿云云。乃誤會儀禮服傳。學士大夫則知尊祖。又引周衰大夫亦祿之失禮也。不足爲典據。夫先王立有宗法。大夫士之法也。大小宗見儀禮喪服經傳。大宗姑弗論。繼禰者爲小宗。宗其繼高祖者。五世則遷。大傳小記兩言之。繼之爲言後也。後以主祭。所云繼禰者。庶子之適子。主祭庶子。而同庶子出之。兄弟宗之者也。是爲繼禰之小宗。推之繼祖之小宗。繼曾祖之小宗。繼高祖之小宗。皆以主祭此庶子。而從兄弟。再從兄弟。三從兄弟。宗之也。故曰宗。以其所祭者庶子。又五世則于庶子親盡不祭。四從兄弟不復宗之。故曰小。大傳小記。但言繼禰者。繼高祖者。一舉小宗之始。一舉其終也。小宗尙祭高祖。乃遷則繼

別子之大宗可知。而大夫士祭及高祖。經非無據矣。古者祭必有尸。有主。士喪禮。一廟者也。其文曰。設盥于祖廟門外。又曰。遷于祖。鄭注曰。士祖禰共廟。廟曰祖。舉尊者言。夫稱祖該禰。祖禰共廟。此一廟二主之見經者也。以例大夫。昭穆二廟則四主。顯據禮經。何云先王未有而待義起耶。愚謂士祭四親。士喪禮祖廟。乃該三祖。而一廟具四主者也。天子廟祭。同堂異室。始于漢明帝。其實周家大夫士廟制已具之。抑大夫有太祖廟。別子之廟也。士喪禮曰。其二廟則饌于禰廟。如小斂奠。說者謂適士二廟。祖禰共一廟。其一廟則亦別子也。大宗繼別子。百世不遷。則百世祭。此別子。此亦祭始祖之例。況四親而有不祭乎。論者漫與程子爲是非。何也。

後見萬氏經學五書。亦據宗法疏明程子之說。然萬氏說尙有未安。大小宗法。大夫士一也。宗法之立。本于親親。一以人道有統。不立宗則派繁而渙。一以人本乎祖。不立宗則世遠而忘。宗法親上親下。以恩立也。萬氏則曰。先王使以德爵以功。公子爲大夫。有功德焉。故後世得有大宗。而百世不遷。公子爲士。但五世則遷。然則先王之於士。不論德責功者耶。同爲先君之裔。士五世後。獨可渙可忘者耶。祭法。適士曾祖祭于壇。若終身無禱事。則終身不祭。而大夫高祖亦祭于壇。此正與宗法大背。萬氏乃引之以證士不祭始祖。此治絲而棼之也。

九族無外。兄弟有外。

鄭康成注虞書九族曰。高祖至元孫。此古尙書說也。儀禮注曰。族。屬也。皆同姓有服之親。九族之三。見周

官小宗伯職曰。掌三族之別。以辨親疏。是也。儀禮喪服總麻章曰。族曾祖父母。族祖父母。族父母。族昆弟。爾雅釋親宗族章。亦有族曾王父母。族昆弟。有族祖母而無族祖父。有族父而無族母。蓋舉此見彼。麟趾詩。承公子公姓言公族。黃鳥詩。統言邦族。分言諸父諸兄。二詩所言族。皆總麻同高祖。此九族之四。見之儀禮。爾雅者。族之義爲屬。先儒又申之曰。骨肉相連屬也。是九族乃由己骨肉連屬。而上親下親各四。外此則疏遠而屬。類聚而借義。釋親宗族章。又曰。男子先生爲兄。後生爲弟。此謂同父也。亦該從父之子。及再從三從及同姓之同行輩者焉。儀禮特牲。少牢。兩饋食禮。皆有兄弟。此則不論父祖子孫輩行。凡在廟助祭之主黨。則以兄弟目之。小宗之祭。皆有服者。大宗之祭。兼無服。不論行輩稱兄弟者。鄭康成曰。兄弟服名是也。然據喪服傳。當之以小功。則未盡。特牲饋食禮曰。洗獻內兄弟。注曰。內兄弟。卽記所云內賓宗婦。內賓宗婦。注曰。內賓。姑姊妹宗婦。族人之婦。夫主人于族人之婦。無服者多。曰兄弟。本其夫而言。主人于姑姊妹之夫。無服。曰兄弟。據姑姊妹大功言。是大功以下爲兄弟也。喪服經文。曾祖父母齊衰三月。傳曰。小功兄弟之服也。不敢以兄弟之服服至尊也。據經。三月。則屬小功言。喪服記曰。兄弟皆在他邦。加一等。不及知父母與兄弟居。加一等。傳曰。何如。則可謂之兄弟。小功以下爲兄弟。此則以兄弟服當加。而曰此加服兄弟何如。兄弟乃小功以下之兄弟。若大功兄弟而加。則期而太重矣。然則兩傳皆有爲而言。非謂兄弟服始于小功也。不然。祭祖以上。則助祭有叔父。或有從子。服以期。斷叔父從子。皆加期而正服大功。兩饋食禮兄弟難通矣。雖然。由父期而差祖父亦大功。而服名獨屬兄弟者。祖父至尊。上殺之服。不可主名。故主以旁殺之。



兄弟也。曾孫爲曾祖齊衰三月。曾祖爲曾孫總麻三月。服外者爲大宗子。如曾祖則大宗子于服外者。亦有兄弟服之義也。故亦曰兄弟釋親昏姻章。又曰母與妻之黨爲兄弟。所云母黨者外祖父母舅從母舅之子從母之子妻黨者妻父母。凡此兄弟士喪朝夕哭禮則加一字別之曰外兄弟母妻黨男子而外又兼姑之子及甥及壻及外孫焉。鄭注喪服。姑之子據士喪禮曰外兄弟極核。特性饋食禮。內兄弟乃婦人。鄭注喪服。舅之子乃與姑之子對。注內兄弟與士喪特性兩禮經文錯逆。不可曉。爾雅母妻黨及士喪禮所兼皆異姓小功總服。故稱兄弟士喪禮與同姓並敍。故別稱外兄弟。此兄弟皆甥舅昏因。故類弁詩曰兄弟甥舅。角弓詩曰兄弟昏因。二詩各三言兄弟。一注于篇末。一提于篇首。謂甥舅之兄弟昏因之兄弟也。然則經稱兄弟同異姓皆有之。經稱九族總無異姓。乃秦漢間人詩小序以類弁兩詩皆言兄弟。則皆以刺王不親九族當之。而兩詩則有甥舅昏因之文。歐陽夏侯之徒說虞書。遂謂九族乃異姓有服之親。父族四。高祖至元孫一。姑之子二。姊妹之子三。女子之子四。母族三。外祖父一。外祖母二。從母之子三。妻族二。妻父一。妻母二。此不可通之曲說也。陳祥道駁之曰。爾雅釋親分章標題于同姓曰族。于母妻異姓皆稱黨。兩言破的。

天子諸侯卽位以殯明日。

天子諸侯在喪卽位有定所。有定期。康王之誥曰王出在應門之內。太保率西方諸侯入應門左。畢公率東方諸侯入應門右。應門內卽路門外。立路門外庭。與內外羣臣正始。此卽康王之卽位也。路門外庭爲治朝。是康王卽位卽治朝之君位。天子諸侯三朝。惟治朝日視爲正朝。卽位於此。所以示臣民之有君定。

衆志杜奸萌也。天子如是，諸侯亦然。特天子在路門外庭，直門中，諸侯避天子。在路門外庭之左，故聘禮曰：君朝服出門左，南鄉。此卽位之所之一定者也。康王之誥本與顧命爲一篇，天子七日而殯，癸酉，伯相命須材。上溯乙丑，已九日。大夫以上斂殯，諸死事不數死日。故七日壬申殯，癸酉爲殯明日也。而受顧命于是日，卽位亦于是日，則嗣王殯明日卽位，周公之制也。諸侯亦然。春秋定公元年六月癸亥，公之喪，至自乾侯。戊辰，公卽位。喪至于癸亥，則以爲薨于壬戌者然。故丁卯殯，而公卽位于戊辰，亦殯明日。故杜注曰：諸侯五日而殯，殯則嗣君卽位。夫卽位卽所云視朝，後世謂之臨朝，其禮應門內，路門外。羣公左右序立，嗣王南面與之序，見辨上下之體，定上下之分。羣公述先王陳戒，而嗣王求助，所謂示臣民之有君者如此。而諸侯亦可推此卽位之期之一定者也。自僞伊訓暗襲舜格文祖之文，又襲太保畢公率諸侯入應門之典，而曰奉嗣王祇見厥祖，侯甸羣后咸在，似卽位必先見祖，不知格文祖者，舜已終喪親政，固宜見祖。在喪無見祖之禮。顧命篇可覆按也。又僞伊訓與見祖聯文，似卽位必于廟者然。胡文定春秋傳，蔡九峯書傳，悉本之，不知卽位所以示臣民有君，正當在治朝。經傳亦無在廟之文也。公羊以春秋元年正月書卽位者七公，遂謂諸侯踰年卽位。知天子亦踰年卽位，不知春秋七書元年正月公卽位者，皆譏也。始于桓而成于文，後遂習以爲常耳。蓋桓公作賊心虛，遲回以探衆志，至踰年而始敢行卽位之禮。故經書之志變古也。文之正月卽位者，王瑤舟曰：僖公薨于十二月乙巳，案春秋長曆，十二月無乙巳，非其月誤。卽其日誤。大抵迫歲暮，故少遼緩至春正耳。且嗣君卽位非踰年，左氏亦有明文。莊公八月薨，傳卽曰：

子般卽位而十月傳曰。賊子般。文公七年四月。宋成公卒。傳曰。昭公卽位而葬。子般、宋昭公、皆不踰年卽位。傳雖未明言殯明日。而殯則死者少安。乃喪禮一大節目。示臣民有君而卽位。不于此時何時。有康王定公。可徵。則子般、宋昭公卽位殯明日。可推也。隱公元年經前傳曰。隱公立。莊公三十三年傳曰。立閔公。閔公二年傳曰。立僖公。莊公亦必卽位于桓公十八年四月。喪至後六日。傳文無事。連及耳。然則隱、莊、二公卽位。必遵殯明日舊典。而踰年亦不復舉行卽位禮。故隱、閔、莊、僖元年正月。經皆不書卽位。而傳又各釋其故。曰。攝曰。夫人出。曰。亂曰。公出者。左氏似亦據元年正月七書公卽位者爲典。從而爲之辭。而不知適與子般、宋昭公未踰年明言卽位者自相矛盾也。夫天子諸侯在喪卽位之期之所。昧雜如是。惟顧命、康王之誥。可以正之。後人轉據伊訓、公羊。疑駁顧命、康王之誥。不幾倒置耶。

中月而禫當從鄭

韓子曰。句讀之不知。惑之不解。小學而大遺。辨理是非。固大于句讀之辨也。然學者窮經。不辨句讀。則亦將誣經惑世焉。士虞禮曰。期而小祥。再期而大祥。中月而禫。鄭康成注曰。中間也。大祥二十五月。間一月而禫。三年之喪。二十七月也。檀弓曰。祥而縞。是月禫。徙月樂。王肅以是月禫。蒙上祥縞。遂謂士虞禮中月爲大祥月之中。且據三年間。三年之喪。二十五月而畢者。據大祥除絰去杖。喪之正服也。祥而縞。禫而織。更延兩月。哀未忘之餘服也。雜記云。父在爲母爲妻。十三月大祥。十五月禫。期喪尙祥。禫異月。三年喪。豈容祥禫共月。閔百詩曰。檀弓是月禫。立文與論語是日哭同發。下徙月樂。不蒙上祥縞。如閔之說。祥而縞。

句。是月禫。讀徒月樂。句王肅固不識也。而朱子說經。又有文例焉。聘禮曰。士中日則二雙。鄭注亦曰。中日。間一日也。蓋主君饋賓。乘禽之數。視饗餼牢三等。諸侯每牢。乘禽日十雙。卿大夫每牢。日一雙。士無饗餼。大牢。日一雙。則數太少。故間一日。二雙。大射儀曰。上射先升三等。下射從之。中等。鄭注曰。中等。空一等。空亦間之意。中月。中日。中等。皆儀禮文。文正一例。中月可倒爲月中。亦得以日中。等中。訓中日。中等乎。是王肅又不諳文例也。按文例與辨句讀。實窮經之要法。然則句讀之辨。小於辨惑。爲童子循誦言。如王肅短聖經三年喪之二月。其惑亂實由句讀之淆。則辨句讀亦非小也。朱子嘗疑王說。以儀禮全文核之。是朱子未定之論。

### 父兄弟子

教者曰先生。學者曰弟子。見鄉飲鄉射禮。於今尙然。先生且無論。以四子書之。弟子言之。弟子入則孝。弟子孰爲好學。弟子不能學。召門弟子。謂門弟子。弟子惑滋甚。養弟子萬鍾。弟子恥受命。皆對教者之稱也。弟子入孝章。前人謂是述小學教法。由弟子二字見之。弟子齊宿。對大賢之前。以學者自居也。故孟子曰長者。亦以先生自居。二字倒文。則對父母兄長之稱。如率其子弟。下不言兄長。省文。又使其子弟。富歲子弟。凶歲子弟。其子弟從之。驅其所愛子弟。是也。太子申之外。惠王親屬死者。容有人。弟子子弟互易。則文義不通。然則色難章。弟子與先生對言。可知矣。雖然。子弟對父母兄長。其義顯白。若夫學者。非教者之弟。非教者之子。且弟是一人。子是一人。又行輩殊。何以合併而目學者。抑孟子曰。師也。父兄也。教者。非學者之父。非學者之兄。且父是一人。兄是一人。又尊卑懸。何以合併而目教者。曰。此由服名喪期得也。古者在功總之服。不論行輩。皆爲兄弟。小功以下爲兄弟。一見喪服傳。一見喪服記。喪服經。曾祖齊。

衰三月傳曰不敢以兄弟之服服之也。功總之人爲兄弟。故以兄弟名功總。鄭注曰兄弟服名是也。喪期子爲父斬衰三年。父爲子齊衰期。古之教者學者相爲服皆總。檀弓夫子喪顏淵子路若喪子而無服。門人喪夫子若喪父而無服。喪父子也。若喪父三年也。無服無喪父斬衰之服。但有弟服兄之總。故曰弟子喪子父也。若喪子期也。無服無喪子齊衰之服。但有兄服弟之總。故曰父兄何不父兄子弟對文。恐其混於對父母兄長也。抑先輕服而後重喪。責學者之致哀歟。先重喪而後輕服。優教者之節哀歟。以君子之義求之。樂有賢父兄亦當屬教者。若論語孟子兩入事父兄則爲生我之父。天顯之兄。孟子又云父兄百官卽中庸之諸父昆弟。特性禮有賓弟子兄弟弟子。少牢禮變文曰後生則賓黨主黨後生之同輩子行相禮者也。大射儀投壺禮之弟子亦然。此父兄弟子凡四人當隨文求之。正猶先生爲教者專稱。若孟子稱宋慳先生則又年長者通辭也。

餼主言米。殮饗主言飯。

古者王侯待朝聘賓客有殮饗餼禮。具見周官掌客而儀禮聘禮尤詳。聘禮待侯伯聘賓設殮之文曰。餼一牢。在西鼎九脔一牢。在東鼎七。堂上之饌八。西夾六。歸饗餼之文曰。饗餼一牢。鼎九。設于西階前。脔二牢。鼎二七。設于阼階前。堂上八豆八簋六。鉶兩簋八。壺云云。東西夾六豆六。簋四。鉶兩簋六。壺云云。餼二牢。陳于門。西牛以西羊豕豕西牛羊豕醢醢百饗夾碑。米百筥。設于中庭云云。注曰。小禮曰殮。大禮曰饗。餼又曰牲。殺曰饗。生曰餼。由注之說則殮饗餼皆主牢言。而豆簋筥米之屬皆從設者也。案說文形氣之

氣本作气。其加米者。卽饗餼餼字。後人以氣爲形气之气。故又旁加食字。以爲饗餼之餼。則餼主米食言。餼禮有生牲。非生牲爲餼也。中庸作既稟。稟卽古食字。古无气。通耳。知餼爲米食。而饗飧亦比類得解焉。蓋讀聘禮亦嘗有疑矣。熟食爲飧。饗本義。而牢有飪。又有腥。則與熟食之義不相應。注之訓饗以牲殺。與餼對訓。不概于心。今以氣字从米加食之意。與飧饗反覆推之。飧饗二字。亦皆从食。說文。夕食曰飧。故從夕。詩曰。有饗有飧。盛黍稷。則飧固謂飯。朝曰饗。夕曰飧。飧爲飯。則饗亦可知。乃知餼禮主中庭之筮米言。而飧饗亦主堂上夾室簠簋之飯言。其各有牢。則待賓盛其禮而加之也。夫以饋牢之盛。而禮之名主于飯若米。正如公食大夫禮。亦烹牢。而所以名禮者。獨主黍稷稻粱之飯曰食。其諸食主穀之意歟。僖十五年傳曰。晉又饑。秦伯又餼之粟。襄二十九年傳曰。餼國人粟。越語。生二子。公與之餼。王制。窮民皆有常餼。及中庸既稟。凡此所云餼。但給米而無牢者也。又有雖待賓而無牢者。哀十二年傳曰。諸侯之會。侯伯致禮。地主歸餼。周官宰夫。牛人。舍人之屬。饗餼之牢。皆稱牢禮。則致禮卽謂致牢禮。係侯伯致之。而地主歸餼。惟米餼。不謂生牲。斷然可識矣。抑周語曰。廩人獻餼。餼也。獻自掌九穀之廩人。米食爲餼。不更皎然乎。聘禮。主國大夫亦餼賓。而聘記曰。凡餼大夫黍稷。蓋主君餼賓。黍稷稻粱備。大夫之餼下于君。但有黍稷而無稻。餼訓生牲。記文何以通乎。且掌客待賓之積。亦加牢而牽。亦將曰生牲爲積乎。夫餼既誤訓生牲。則又有轉而相之之誤。僖三十三年傳曰。脯資餼牽。服氏云。腥曰餼。生曰牽。是也。蓋以餼爲生牲。則牽字贅。不得不強以餼屬腥。不知脯資餼牽四字不平。脯資者。脯之資。謂獸物。餼牽者。餼禮之牽。謂牛

羊豕。惟獸物。牛羊豕皆竭。故令客原圃取麋鹿。此傳文意也。或疑聘記曰。大夫來使。無罪饗之。過則餼之。注家皆謂烹大牢以飲賓曰饗。則此餼無米。哀二十四年傳曰。餼臧石牛。此亦更不言米。二者何說也。曰。古禮。食飲不相兼。故公食大夫。禮無尊壺。燕禮。鄉飲酒禮。無簠簋。兼之者。惟饗神。亦惟饗賓。特牲。少牢。兩饋。食禮。尸既飯。又獻尸。地官舂人。供賓客之饗米。注曰。饗兼食飲是也。雖古人不極口腹。主人食飲兼具。而以神待賓。則賓亦以神自處。而不復食飲。然饗賓之意。則主于飲之食之。饗曰餼。固以主尊壺簠簋之實之米言耳。左傳云云。則言餼而有米可知。但餼賓禮宜加牢。牢必牛羊豕具。齊餼臧石。惟有牛。故指言牛。而太史亦謝曰。牢禮不度。非謂無米。惟論語餼羊。記者以魯君不告朔。則有司供羊不殺。如餼賓之羊。生牽而陳。故借用餼字。以見不告朔之意。則義爲生牲。此實僅見。雖然。餼固主言米。殮夕食也。後鄭不從。何以殊名。禮賓何以有殮。有饗。有餼。又何以先殮後饗。餼也。天官宰夫職。先鄭注曰。殮夕食也。後鄭不從。然據聘禮設殮。則在賓始入國。卽館時。覲禮。侯氏至近郊。天子使人勞侯氏。遂從之入國。天子近郊五十里。正合古者吉行之數。一日內受勞。僎使行五十里。既入國。又入朝。請命。乃卽館。于是致殮。不日夕乎。小雅有餼簋殮。蓋亦王使徵役。徵財。始至卽館。致殮。譚大夫卽事爲興也。聘禮。賓至之明日行聘。聘日歸。饗餼。行聘凡八節。節繁事簡。質明而行。終朝而畢。賓退致饗。則在朝食時。聘義曰。日幾中而后成禮。漢人大言之。然則殮饗之禮。固卽致禮時取朝夕食本名名之也。朝聘之賓。不遽歸。致殮饗禮。賓皆拜受。送迎多儀。每日致之。則朝夕僕僕。于是餼與饗並致焉。殮饗以飯。朝夕食之熟者也。餼以米。朝夕食之生者也。筮

米或百二十。或百或八十。皆計供旬日。饗殮有餘無不足。然後更致。聘記曰。旬而稍。考工記曰。致稍餼。是也。稍餼無牢。受之之儀。亦殺于與饗。並致之餼。凡此所以曲致養賓之意。禮文雖縟。而皆有意可求者也。自生牲之訓。不得餼字之義。遂使殮饗亦不見指趣。讀書之貴識字。如是夫。

殮饗二禮。據聘禮。殮設于賓至之夕。明日朝聘畢而致饗。以爲義取朝夕食。頗非臆說。或者謂聘禮賓有侯閒之文。是主國或有事。行聘不必賓至之明日。饗致于行聘之後。則明日朝朝食之說未必然。此泥讀聘禮者也。周官司儀五等諸侯相爲賓。其臣相爲國客。致饗皆在將幣後。大行人五等諸侯朝天子禮。九牢七牢五牢。卽致饗也。皆在將幣前。蓋天子尊。禮尙舒徐。不必賓至之明日卽受朝。故覲禮賜侯氏館之下。有戒日之文。而饗則明日朝卽致。養賓不可一日缺也。此大行人所以敍于將幣前也。諸侯不敢擬天子。賓客卽館。厥明卽行朝聘。傳所謂公不留賓也。故司儀敍致饗于將幣之後。聘禮賓曰侯閒。注謂不敢奄猝主人。最允。此爲恭之辭。其實侯國朝聘禮。卽行于賓至之明日質明。就令主國果有故。不得遽見賓。而明日朝則必致饗。聘記聘日致饗。據明日行聘之常者立文。非謂致饗必聘後也。僖十五年傳曰。改館晉侯。饋七牢焉。時晉侯見獲。不在朝聘賓之列。以將爲成。故館而賓之。而館饋連文。是古者館賓卽饋牢致養。其饋朝聘賓。不必在行朝聘禮後也。其尤顯然可據者。國語襄王使太宰及內史賜晉文公命。其文曰。上卿逆于境。晉侯郊勞。館諸宗廟。饋九牢。及期。命于武宮。亦館饋連文。而敍于及期之上。是饋饗不在行賜命禮後也。而朝聘可知矣。



居處

居字之義非一。論語居吾語汝。孝經坐吾語汝。孟子坐我明語子。居坐互出。則居字有坐義也。閻氏據此及小戎詩文茵謂狐貉之厚以居爲坐褥。良是。余廣其說曰。居必遷坐之居亦坐也。遷坐之坐乃坐之處耳。寢不尸。居不容。以玉藻居恆當戶。寢恆東首。文體例之居亦謂坐。自檀弓以負手曳杖逍遙誣聖人。下文當戶而坐。後人直以當戶爲欄截戶。遂謂聖人坐亦非所坐焉。不知當戶乃對戶。謂坐室中東北隅。而對東南之戶也。又如孝經首曰。仲尼居亦謂坐。曾子侍。卽侍坐。觀下文自見。又如曲禮羣居五人卽羣坐。不可枚舉。當隨文求之。處安處也。所在可安而安之也。見旄丘何其處也。詩傳又四牡詩不遑啓處。傳曰啓跪處。居也。先儒之說曰。古人席地。兩膝著地而直身曰跪。是爲危坐。對文跪坐有別。然危坐亦得坐名。故散文危坐亦曰坐。見于儀禮極多。亦曰啓。兩膝著地而身著于蹠曰坐。是爲安坐。亦曰處。傳以居釋處。本采薇出車詩。兩言不遑啓居。處有安義。義與居通也。然此二字散文則通。連文則別。論語告樊遲之居處。對下執事與人。謂燕居無事而安處。獨居無人而安處。居以身之坐之安言。處以坐之心之安言。若告宰我之居處不安。則與上二句對。謂食嘉穀之滋味不甘而茹蔬。聞和音之鏗鏘不樂而撤懸。居當戶之穩適不安而隱廬也。講家以平常在家釋居處于居處恭可混過于居處不安。則鶻突不可通。且爰居爰處。兩見于詩。將作何解耶。

下管金奏笙奏聲詩

小雅笙詩六篇。朱子主有聲無辭。謂古經篇題下必有譜。如投壺魯鼓。薛鼓之節而亡之。諸儒據尙書詩

言志歌永言聲依永謂聲生于辭辭調爲譜說亦有理及讀周官金奏九夏儀禮管新宮禮記管象覆之經文及諸家說乃知笙奏金奏及管其爲堂下之樂同而有聲無辭亦同者也先儒據詩序以維清詩當象言凡歌詩皆三終皆次第三篇左傳歌鹿鳴之三穆叔備舉四牡皇皇者華歌文王之三國語備舉大明縣是也升歌清廟下管象則維清已在清廟三終之數豈又管之新宮之管諸家以斯干詩當之然大射儀曰新宮三終亦管無羊節南山乎國語著肆夏之三曰肆夏樊遏渠先儒以頌之時邁有肆于時夏之文而以時邁當肆夏遂以思文當渠執競當樊遏樊遏渠且勿論穆叔稱三夏天子以享元侯享元侯而樂奏時邁其邦昊天其子情事不倫況九夏之曲節行步出入爲多而肆夏乃及此宏辭大典乎且金奏曰肆夏樊遏渠頌詩篇題曰時邁執競思文管曰新宮雅詩篇題曰斯干管曰象頌詩篇題曰維清是肆夏新宮象雅頌并無其名南陔白華華黍由庚崇丘由儀雖名廟小雅亦不繫以辭例以堂下樂則皆無辭事有或然者矣且夫笙奏六管新宮三象三金奏肆夏三九夏則二十七若有詩篇當三十九其章句字亦云繁矣雖樂崩而辭不具于雅頌亦當散見十一于他書何以三十九篇銷蝕之餘而殘章零句牘字載籍極博絕無影響也何以經傳所稱工歌鹿鳴四牡皇皇者華魚麗南有嘉魚南山有臺文王大明縣清廟十五國風辭皆具在而獨不能確指一字于三十九篇也此豈得曰事之適然然則堂下樂皆無辭十得五六矣而覈之經文又有可得十九者經曰歌歌口也立文主辭也經曰笙曰管曰金管笙金器也立文主聲也嘗就諸儒辭調爲聲譜之說推之所云調者按辭之音節而以四上調爲腔曲也管笙

金不能清吐字音而奏辭。則但以腔曲著爲聲譜而教工。工但奏四上之聲而已。此其發德導和以聲爲用。無取乎辭。辭亦不存。非如歌之逐字清吐于牙齒舌喉唇而一字不磨也。郊特牲曰。歌者在上。貴人聲。言各有當。其實人聲必以關關雉鳩在河之洲者爲聲。非徒四上之聲也。文王世子曰。既歌而語。合德音之致。凡登歌則下管繼之。語但合歌而不及于管。則歌主辭而管無辭可見。而金奏笙奏無辭亦具見。伶人樂章。但有管笙金之聲譜。而曲名三十九。載籍不傳。曲中一字者亦以此觀于鄉飲酒禮。燕禮。歌笙分奏者。小雅笙奏無辭。合樂歌笙並奏者。關雎。葛覃。卷耳。鵲巢。采蘋。則又一字字具在。益信而有徵矣。雖然。南陔六曲與九夏新宮象同屬堂下樂無辭。而名獨廁于小雅者。何也。曰。詩乃樂章。孔子刪詩亦即以定樂。笙入三終。卽歌笙間。兩見元公儀禮。用樂之節也。卽元公作樂時。籍付伶人守之。孔子序詩樂。以元公用樂舊章。則笙奏之曲名聲譜。如其舊章。而廁于小雅焉。朱子曰。譜亡非懸揣也。若九夏新宮象之曲名聲譜。併不列于雅頌之中。樂崩散失。孔子無由廁之。故不同于笙奏云爾。夫堂下樂既無辭。則義更弗論。南陔六曲詩序穿鑿立之義。毛傳故曰。有其義而亡其辭。朱子曰。所云有者非真有。所云亡者則真無。千古破空之論也。束皙據序義而補之事。旣贅疣。又非常日之義。未免誣古。況肆夏併無穿鑿者之義。皮日休乃補之哉。或曰。左傳叔孫昭子賦新宮。亦非詩乎。曰。一管一賦。其名偶同。實不相涉。新宮之賦。或可以斯干詩當之。然斯干詩取首句下二字名篇。未聞賦詩篇名與三百篇異者。當亦如河水。轡之柔矣。之屬。而孔子刪之。要不可與儀禮之管相提並論也。

國語金奏肆夏、樊遏、渠。卽左傳所云肆夏之三。歌文王、大明、緜。卽所云文王之三。韋、杜、內外傳注皆云。肆夏一名樊、韶夏一名遏、納夏一名渠。非也。以文王、大明、緜爲文王之三例之。則樊遏、渠、乃肆夏之二之三。肆夏、樊、豈二名疊出。且肆夏之三曰肆夏、樊遏、渠。則九夏各別有其二。其三。肆夏之二之三。豈仍屬九夏之韶夏、納夏。此皆據傳文可推而決者。

### 大夫妻不稱世婦

古賓祭之禮。必內外官備。得備官。惟天子諸侯。世婦者。天子諸侯相祭祀賓客禮事之內官也。天子諸侯冢子稱世子。蓋天子世天下。諸侯世國。其冢子皆繼世者。世婦旣相禮事。亦以廣世嗣。其子有時亦得繼世也。天子諸侯內官之外。婦人無稱世婦者。天子世婦。見周官天官春官。又雜見禮記曲禮、玉藻、昏義。諸侯世婦。禮記十六見。其見諸喪大記者。唐以後講家可異焉。喪大記九言世婦。皆諸侯之世婦也。其記卒之文曰。君夫人卒于路寢。大夫世婦卒于適寢。內子未命。死于下室。康成注曰。變命婦言世婦。見尊卑同。蓋謂以世婦包命婦也。記又謂大夫妻不皆卒于適寢。則補言之曰。內子未命云云。適寢二字殊可疑。鄭注曰。世婦以君之次寢爲適寢。當由國君體大。路寢外二小寢。容有得稱適寢者。故大夫正寢稱適寢。本之載籍不盡存。無可徵耳。不然。記文荒謬矣。記復之文曰。復。君以卷。夫人以屈狄。大夫以元纁。世婦以檀衣。此亦以世婦包命婦者。記杖之文曰。君之喪。三日子夫人杖。五日授大夫世婦杖。子大夫寢門之外杖。寢門之內輯之。夫人世婦在其次。則杖卽位則使人執之。此則不包命婦。專言世婦矣。儀禮喪服。婦人爲

夫之君不杖期也。記食飲之文曰：君之喪，子大夫三日食粥。夫人世婦諸妻疏食水飲。記大夫士禮弔使之文曰：大夫之喪，大夫有君命則去杖，有大夫之命則輯杖。內子有夫人之命則去杖，有世婦之命則授人杖。士之喪，于君命夫人之命如大夫，於大夫世婦之命如大夫。定本下如大夫作如夫人，誤也。大夫世婦中間省之命二字耳。記君夫人視斂殯之文曰：君于大夫世婦，大斂焉爲之賜，小斂焉于外命婦。既加蓋而君至，夫人于世婦，大斂焉爲之賜，小斂焉于大夫外命婦。既殯而往，以上三條，五言世婦，亦皆不包命婦。末條言世婦，又言外命婦，益灼然矣。孔穎達據君夫人大夫世婦對言，遂謂大夫妻亦稱世婦，然而授世婦杖，則何以通。記文末條，何以言世婦，又言外命婦也。陸農師則從而附和之曰：大夫妻稱世婦者，大夫不世爵，而妻克生子，則世矣。然士庶之妻，孰非生子者，亦得稱世婦乎。吳幼清據內子未命之文，亦從而附會之曰：未命曰內子，已命曰世婦，此其說尤駁甚。郊特牲曰：婦人無爵，從夫之爵。周官司士職曰：以德詔爵。虞書曰：天命有德，先王之爵，必考德而命之。女德無由考，故爵從夫，抑寓刑于之微意焉。夫爵由于命，曰無爵則無命，何未命之云。曰從夫，則其夫受命，而婦卽被命，何未命之云。而世婦大夫妻之謬，更弗論也。然則內子未命，記文何以云然。曰：禮記非聖人，手定。周末秦漢間宏覽博物者，掇拾附會爲之。雜記曰：夫人不命于天子，自魯昭公始。夫春秋嗣君除喪，尙不覲王受命，況夫人乎。前人謂此因娶同姓而依響逐影之談，其說最允。內子未命之文，正其類也。夫婦人無爵，從夫之爵。內子未命，均屬記禮之文，但已自相矛盾。婦爵從夫，可信。學古者亦信其可信者而已矣。玉藻曰：唯世婦命于奠爾，亦庶幾可信。此言天子世婦也。婦爵從夫，則無自

升禮。天子有后，有夫人，有九嬪，有世婦，有女御，后之下凡四等。夫人擬外官三公，九嬪擬九卿，卿妻禮服鞠衣，世婦擬大夫，大夫妻禮服檀衣，女御擬士，士妻禮服祿衣。夫人九嬪，唯其人不必備，世婦德優可充，九嬪者則命之服，卿妻之服以相禮事，女御德優可充，世婦者則命之服，大夫妻之服以相禮事，春官世婦，每宮卿二人，下大夫四人，殆由奠醢之命者歟。其每宮中十八人，亦女御德較優者，命之服，其本服相禮事時，從世婦之列焉。婦人之被命者，唯此而已。故玉藻又曰：其他則皆從男子。其他謂邦君之妻，卿大夫士之妻也。內子又何未命之云。吳幼清據大夫世婦，內子未命，望文臆撰，固屬不典。魯語曰：卿之內子爲大帶，命婦成祭服。內子，命婦，互文也。鄭注：孔疏據之，遂有內子，卿妻，命婦，大夫妻之訓，徧核經傳，其說亦不的。如謂內子專屬卿妻，則魯語固稱卿之內子矣。而喪大記大夫內子連言者一，對言者二，何也。如謂命婦專屬大夫妻，則魯語命婦固在卿之內子之下，列士之妻之上矣。而周官如秋官所稱命夫命婦，不躬坐獄訟，儀禮士喪禮曰：有命夫命婦則坐，豈獨遺卿妻者乎。愚謂子者男子有德之美稱，古者卿大夫皆稱子，曲禮：大夫于外曰子，春秋如高子，詩如聚子，是也。內子之稱，本其夫之爲卿大夫而言，正猶邦君之妻稱小君耳。命婦之稱，則本其夫之受爵而言也。然則內子命婦，卿大夫之妻通稱，祭義曰：卿大夫相君，命婦相夫人，尤卿大夫妻通稱命婦之顯據。內子豈專屬卿妻，命婦豈專屬大夫妻乎。或曰：士亦有爵命，命婦當兼士妻。曰：古者大夫以上乃稱貴，士與大夫貴賤相懸，雖亦受爵命，其妻不在命婦之列。喪大記曰：大夫士拜卿大夫于位，于士旁三拜，大夫內子士妻特拜命婦，汜拜衆賓于堂上，衆賓士妻也。大

夫內子士妻與大夫士對。特拜命婦。與拜卿大夫于位對。汜拜衆賓。與于士旁三拜對。命婦不兼士妻。此記明徵矣。大抵考禮皆一枝一節。必會通三禮。參之左國。爲說方不刺繆。內子命婦。注疏說雖不甚遠。然小疵不免。說經豈容有疵。唐以後講喪大記世婦。最易惑聽。然亦最駁。故考論之如是。曲禮曰。天子有后。有夫人。有世婦。公侯有夫人。有世婦。舉公侯以該伯子男也。否則諸字誤爲公也。否則公侯概謂諸侯也。或乃泥公字。遂謂公侯降天子一等。但有夫人世婦。則伯子男降公侯一等。但有世婦。而世婦爲伯子男正妻之稱。然則論語邦君之妻。君稱之曰夫人。孟子引禮。諸侯耕助。夫人蠶繅。所云邦君諸侯。不數伯子男者耶。春官世婦。有卿大夫士之目。賈疏以奄人當之。則婦人而男子矣。柯氏謂卿大夫士妻之有齒德者。亦泥于卿大夫士之目耳。此亦皆講世婦之異說。顯然駭聽。不足堅學者之信。總之周官禮記。世婦數十見。可以一言蔽曰。天子諸侯內官。相禮事兼廣世嗣者之號而已矣。

皮弁服

儀禮士冠禮。士喪禮。皮弁服皆不著何衣。古者衣冠同色。五冕皆元。則皆元衣。元冠則元端。諸侯朝服。元冠緇衣。染緇多元一入也。爵卽五入之緇。爵弁之衣。則七入之緇。至于黃冠。野夫草服也。禮不下庶人。不在司服九服之列矣。而黃冠亦黃衣。皮弁色白。故鄭康成注士冠禮。以十五升白布當皮弁之衣。然玉藻。季康子朝服縞衣。孔子謂諸侯皮弁告朔。卒告朔事。然後服縞。以視朝。然則縞衣。皮弁之衣也。縞。生絹。非布。康成注玉藻亦云然。注王制縞衣。亦云皮弁之衣。先儒或謂告朔聽朔皆在廟。或謂聽朔在朝。據玉藻此文。則在朝爲確。古人禮事。終事不更衣。亦于此可徵。王制曰。

殷人壽而祭。編衣而養老。祭舉冠該衣。養老舉衣該冠。郊特牲。殷爵與夏收周弁。冠子三加之服也。再加皮弁。則夏殷周共之。祭重于養老。是尊于皮弁。乃皮弁而縞衣。故鄭注縞衣爲皮弁之衣。而士冠禮皮弁服。獨不引玉藻。王制。縞衣注之。諸侯朝服十五升緇布。皮弁服爲天子朝服。遂附合而以十五升白布當皮弁衣。殊不可曉。士冠禮注曰。皮弁以白鹿皮爲弁。象上古也。疏曰。上古未有麻絲。以白鹿皮覆冒頭。夫皮弁不忘古。故冠禮再加三王共之。則皮弁服縞衣素積。由來已久。久則人人習知。故但曰皮弁素積。而四字相傳日熟。故祭統郊特牲亦屢見其文。歟。雖然。皮弁之用。天子視朝。諸侯告朔。聘禮主賓。皆服之。而郊特牲皮弁素服。有送終之義。素服白布。縞衣亦白。奈何以近凶之服。行視朝諸禮也。曰。白者。五采之一。先王制禮。五色比象。不以白爲凶。麻色本非皓白。將爲布。必先有事其縷。而水濯之。又灰治焉。旣爲布。又必有事其布。如縷而白。乃著五服之衰布。以縷之粗細別重輕。布縷兩無事。而斬衰之經。且用黑黯色。老麻是凶服。主疏黯質素。而不主白也。故旗有大白。而商人且以白爲一代所尙焉。或曰。冠弁冕。其衣各有屬。何以皮弁有時爲素服之冠也。曰。取其質素也。故小記諸侯弔服皮弁錫衰。司服天子弁經。亦同之。與視朝諸禮所服縞衣皮弁正服。絕不相蒙也。

### 拜主手言

古人拜法。覈之經傳及儒先。男拜尙左手。先以右掌據地。乃以左掌交其上而俯伏焉。故郊特牲曰。拜服也。加敬焉。則俯首至手。周官太祝曰。空首者也。對頓首。稽首。首至地。而此但至手。首猶空者。然彌加敬焉。則俯首頓地曰頓首。首頓地卽舉也。稽首。則首至地而稽留小頓。乃舉。視頓首益敬。故郊特牲曰。稽首服。



之甚也。遭喪拜謝賓，則尙右手。父母之喪，哭而以首觸地，無容遲遲舉首曰稽顙，致哀也。稽首以致敬，稽顙以致哀。其情既大殊，稽首者先拜，稽顙者後拜。其節遂相反。元公制禮如是，後人以謝賓故拜，則後稽顙焉。孔子曰：拜而後稽顙，頽乎其順也。稽顙而后拜，頽乎其至也。謂先謝賓，後致哀，于人事之序爲順。先致哀，後謝賓，尤微哀痛惻怛之至。二者皆凶拜。後稽顙則周衰之變禮，孔子從其至，猶之衆拜乎上，違而從下之意，所以復元公之禮也。士喪禮曰：拜稽顙，謂拜禮用凶，卽先稽顙而立文。先言拜，初制禮時，不知後人有後稽顙之變。哀喪易稽首爲稽顙，則言稽顙而先稽首可知。不嫌于先拜也。康成以先稽顙者釋太祝之凶拜，誠是不以後稽顙者爲周衰變禮，而以爲殷禮，而引以釋太祝之吉拜，則非。夫稽顙則不得云吉矣。所云吉拜者，賈疏引雜記：父在爲妻不稽顙者是。他如舅姑之主婦喪，凡男婦之攝喪主者，皆不稽顙，而變手之左右上者以別之。但別以左右手之上，無大遠于吉。故曰吉拜。原拜之義，字從兩手。凡言拜皆主手言。故禮經有尙左右手之文。兩手據地俯伏者，拜之正。卽尙書之拜手。玉藻之據掌，太祝之奇拜也。褻拜以拜之數有加而別。振動以拜之容色變而別。吉拜以拜時手異尙而別。空手以拜而首至手而別。頓首、稽首、稽顙，以拜而首至地，又各異而別。空首、頓首、稽首、稽顙，皆拜時有爲而爲，非拜義所主也。若肅拜，則更以立而俯下手，手不至地而別。拜主手言，益可見矣。朱子曰：拜而后稽顙，先以兩手據地如常。然後引首向前，叩地稽顙而后拜。開兩手先引首叩地，卻交手據地如常。兩言手據地，拜字畫沙印泥。檀弓：秦穆公使弔重耳，重耳稽顙而不拜，曰：稽顙矣。而又曰：不拜。尤拜主手之鑿證。太祝注引尙書拜手。

當空首。是謂首拜至手而拜屬首。則頓首、稽首、稽顙皆誤。認經文爲正言拜。此差毫釐繆千里者也。至於振動之拜。施於事變不常。若後世所謂誠惶誠恐。頓首頓首意思。或乃謂恪恭之極。如聘賓三退負序之屬。不拜而致敬。更甚於拜。夫旣云不拜。卽敬甚於拜。安得列九拜中。且以不拜而拜。而列九拜。是更不問拜義所主也。此作時文弄筆伎倆。不可以說經。約經傳之旨。衆說之醇疵。拜之義法。可詳者如此。自太祝注以拜手當空首。而拜屬首。因謂拜手稽首者。先作空首一拜。再作稽首一拜者也。至吳幼清又混稽首、稽顙爲一。謂以凶禮故易首字爲顙。以別於吉。遂謂先作稽首一拜。再作空首一拜。爲稽顙而后拜矣。故稽首再拜而不受。再拜稽首而受。孟子之文。偶有倒順。閻百詩據康成吉凶拜之注。幼清稽顙卽稽首之說。遂謂先稽首者爲凶拜。後稽首者爲吉拜。子思以凶拜示不受矣。嘻。以閻氏讀書有識。而承誤不辨。且勿復論。抑子思當日不受則不受耳。而乃以喪禮處。豈有此情事耶。閻氏又講論語拜而受之。曰。若今之折腰一揖而已。再拜而送之。曰。兩揖而已。夫折腰則尻高首下。俗所云打恭者也。以此當拜。皆沿拜屬首之誤。不知古無折腰禮。古之揖。身微俯。手心平推向前耳。見鄭康成禮注論語。上如揖。集注曰。手與心齊。亦其徵也。左傳成公十六年。卻至肅使者。杜注曰。肅。手至地。若今揖。大誤。夫手至地則折腰矣。甲者將爲兩手據地俯伏之拜。則札葉羹其肢體。而有所不便。故用婦人肅拜。立而身微俯。斂兩手當心。少下移而已。方氏三禮析疑。亦沿杜氏之誤。而謂下其首而俯首至地曰肅拜。總緣不識拜主手言而不屬首也。一字不得指歸。以閻方之淹博。亦不免于冥冥決事矣。考古豈不難哉。

文章据采帛言

禹貢織文。大東詩織女不成章。此文章二字本義也。專据采帛言。蓋文章稱織者。染采絲織之經緯。參錯而文也。經緯參錯成物象。明白顯著而章也。帝舜欲觀古人之象。會繡日月云云。亦曰十二章是也。傳稱火龍黼黻昭其文。則會繡亦有雜五采之文。而無經緯。惟織有之。故謚法。經天緯地曰文。是織文爲文之本意。章亦織章爲本義。莫分曉於六月詩織文鳥章一語。曰鳥。已見鳥隼之旗。織字不必讀幟。幟字不見三代載籍。史記乃見之。自秦漢下滋多之字。豈可轉改古經。左氏最近古。隱公五年傳。蒐苗獮狩治兵。所以昭文章。明貴賤。此文章與六月詩同義。謂如春官司常。王建大常。諸侯建旂云云也。杜注旂旗二字極合。然語焉不詳。又連言車服。則蒙混兵車革路。田車木路。兵服章弁。戎服冠弁。貴賤不殊。何文章之昭貴賤之明之有。大約言文可以該章。文不徒文。必有章也。言章可以該文。章有由章。文所爲也。文以施功言。章以成功言。章非文不成。故二字連言。先文後章。不可倒也。以上所陳。皆文章本義。論語。孟子。兩成章。皆借喻學業。此章字猶言品格。論語借用章字。并借用裁字。則文章專言采帛。蓋可見。易傳。六位成章。借喻卦象六爻。陰陽疊用。如經緯參錯。成物象然。此章字猶言體段。又以章字該文而借言之者。則爲章于天。追琢其章。出言有章是也。又以章字有明著意而借言之者。則平章百姓。五服五章。俊民用章。不見而章。憲章文武。闡然日章是也。祖述、宗其道而傳述之。憲章、守其法而表章之。刪詩書、定禮樂、皆表章之實。文武之政一章、亦表章之概。聖人修道立教。禮樂刑政之屬。經緯條理昭著。則借章字訓法。假樂詩。率由舊章。抑詩。維民之章。載見詩。曰求厥章是也。裳裳者華詩。

維其有章。諸侯求天子之章而率由之。故有也。論語稱堯。又並言文章。文不在茲。又但言文。而文字借言尤多。點畫參錯成字。曰文字。句參錯達意。曰文。仁義禮智爲文德。詩書禮樂爲文教。其餘文武。文質。文明。文理。不可枚舉。皆經緯參錯之義。轉轉相生。此文章二字之源流也。若考工記。畫繪之事。青與赤謂之文。赤與白謂之章。便不甚可曉。又秦月令曰。婦官染采。黼黻文章。必以法故。不論染絲染帛。豈有二采雜染者耶。祭義曰。夫人纁。三盆手。布于世婦使纁。遂朱綠元黃之。以爲黼黻文章。與考工記之色絕不類。均不可曉。

### 車制

夾車兩旁圓轉者曰輪。上古聖人觀轉蓬而制之。輪字从侖。侖。敘也。命字。从人一册。命知也。車輪三十輻分也。揚雄。許脊。皆以輒爲輪。其實輒所以拄輪使不行。離騷。發軔。謂去軔。車乃可發也。合轂。輻。牙。三者爲之。輪之周郭踐地者曰牙。齒。齧曰牙。車取似風一木爲之。當用火採取曲也。亦曰輞。如繩之四圍也。輪之中空受軸利轉者曰轂。長三尺二寸。視大車轂尺五寸爲長。詩曰。暢轂。轂受軸之大穿曰賢。小穿曰軹。輻湊處其穿曰藪。穿。擊轂空中。空中若轂。故轂字从藪。賢之義爲大。大則能容。小轉同。軸端曰轆。轂末軸端在一處。故有軹。轆。二名。藪。案也。三十輻湊聚其外也。轂出輻外一尺九寸者曰軹。以皮覆之曰幘。幘而急束曰篆。詩曰。約軹。考工記曰。幘必負幹。陳篆必正。春官曰。孤乘夏篆。束。轂皮急。其形填起如篆刻。轂端凸曰鎡。士喪禮曰。木鎡。鎡。轆端無凸。軸端少出轂外。受鍵則有之。以近轂端。轂穿賢。軹。藪。與軸相磨。以金固之曰釭。亦曰鍋。亦曰鞞。亦曰過。遂通之轂。故士喪禮注曰。鎡。古文作鑿。鑿。轂過有脂塗。炙史記曰。炙轂過髡。四字聲之轉。髡。甚口似之。輪之轂牙間直指。上樵入轂。下樵入牙者曰輻。攷工記曰。

輪幅三十象日月也。輻字从富，言富也。三十之數富也。輻近穀稍粗者曰股。近牙稍細者曰散。散，脛骨。人股大散小，取似之。輻樵入穀者

曰蓄。入牙者曰蚤。立曰蓄。蓄亦曰弱。弱同。樵鑿之合。如物立水中，所謂如生也。又即爪字。穀牙受蓄，蚤者曰鑿。鑿有櫟以固之者曰鑿。鑿，孔也。

入鑿，削小木固其隙也。入牙樵缺內，使牙偏外，而輻股內向隆起者曰綆。漢人曰輪輦，輦底鑿輦，四方漢人曰輪輦，輦底鑿輦，四方

車身受載者曰輿。廣六尺六寸，輿之縱曰隧。詩曰：收縱四尺四寸，視大車八尺者為淺。詩曰：淺收。輿字从

虛而下有度之，薦物之象。陸義未詳收。詩傳曰：斂所載。輿後橫木曰軫。全輿四面亦通曰軫。攷工記曰：軫之方也，以象地也。又曰：蓋

弓四尺，謂之庇軫。軫義為轉，輿載物于此。轉于彼也。輿兩旁闌者曰鞵。鞵之植者橫者曰軹。鞵又曰較。接較前一尺三寸

強，揉曲而周于當面，人可俯憑為敬者曰式。式高三尺三寸，較高五尺五寸，如兩層然。故詩曰：重較。式之

植者橫者曰鞵。式中曰鞵，挽以去毛之皮固之，又覆以獸皮。詩曰：鞵鞵淺幘。巾車曰犬襪。然襪、鹿淺襪。玉

藻曰羔。辟、鹿、辟、公、羊曰以。辟為席、幘、襪。辟三字音義並同。故注皆曰覆。筇、筇同。鞵、鞵內也。三面鞵

鞵植如櫺，覆式則由前視之，輿內皆不見也。式上環有舌，納驂馬內兩轡者曰籠。詩曰：鑿以籠。鞵式上有

鈴曰和。鞵之言倚，人可倚也。車闌亦有名鞵，同鞵末。義未詳。較字从交，前與式交。式、法也。敬則有法之意。鞵字从對，與人對也。復、豈音之轉。鞵字環之右，鞵、義未詳。前軫樹式者曰軹。

以版橫側掩之曰陰。陰上有環係驂馬頸之鞵者曰續。詩曰：陰鞵鑿續。軹、本作軹。其義未詳。輿下乘輿出輿上曲

又下句衡縛軛，駕馬引車者曰軛。對文。大車曰軛，小車曰軛。散文。軛，亦通言軛。古袁爰通。爰、引也。軛所

特其有軛之前鉤衡者曰頸。軛之後承軛者曰踵。輿下當軸之伏兔處曰當兔。亦曰任。正出輿上曲四尺

弱處曰胡。如頷也。頷即喉。大行人立當前疾，疾字喉之誤。軛上曲如梁，五分其處束革有文。詩曰：五檠梁

輶。輶頸鉤橫木曰衡。長六尺六寸。上有采錯焉。詩曰：錯衡。縛衡下。又兩服馬頸者曰軛。軛形如矩，不正方。亦曰軛。傳曰：射兩軛。輿，尤有力焉。軛字从唇，扼持馬頸牽車也。軛字从句，則以軛形句中鉤。傳又曰：蘇胸汰軛，乃字誤。

兩端貫轂，中持輪輿。下伏兔鉗之承輿者曰軸。軸字从由，由，從也。行也。軸貫輪轂承輿，車從是行。軸末出轂端少許，以鐵止輪外。

軼者曰鞶。鞶同轄，亦作鑿。鑿轄字皆从害，輪勢外軼，此禁害之。鞶則象形，此即所云轄，官守也。守輪使不外軼也。鞶亦名同輿內曰軻。曲禮曰：僕展軻。

上承輿，下鉗軸，為駕脫之用者曰鞵。亦曰伏兔。亦曰軻。易曰：輿說軻。壯大輿之軻。子夏傳曰：軻，車下伏兔也。軻義未詳，伏兔狀如之。軻、鞵、音近歟。

車合輪輿，輶、軸、鞵、五者為之。輿廣六尺六寸，皮諸軸，兩相去輪各七寸。所謂轍廣八尺也。兩轂出輻外。

又各一尺九寸，輻內窪各一寸。通計一車之廣一丈一尺六寸。轂出輻外各二尺弱，故公羊傳曰：御擊者不得入擊，擊挂礙也。野廬氏曰：車擊互，謂兩車相值者。戰國策亦曰：車擊。大車之牙曰渠。傳曰：江淮之浦，貝如大車之渠。渠，巨、通。大車牙過二丈七尺，視小車一丈八尺九寸，一丈九尺八寸者為最巨。大車

之輿曰箱，廣六尺，長八尺。詩曰：睨彼牽牛，不以服箱。大車直轅，牛低車身，高五尺四寸強也。小車輶，上曲四尺強，車身高四尺，馬高也。小車兩馬夾一輶，大車兩轅夾一牛。

### 車前馬

夾轅兩馬曰服。詩曰：兩服上襄。亦曰中。詩曰：騏驎是中。服外兩馬曰驂。詩曰：駟驪是驂。兩服兩驂則駟。詩曰：載驂載駟。服，負也。負軛也。中，對驂在外言。驂字从參，參，古三字。左驂于中兩馬，則三。右驂于中兩馬，亦三。馬非駕車而牽之者曰韁。亦曰韁。士喪禮

曰革鞮鞮亦作繼左傳作絛亦曰鞞晉語執羈鞞而從亦曰鞞晉語注曰鞞鞞也白駒詩傳曰繫其鞞即

謂此此鞞引馬也小戎詩之鞞引車也一馬一鞞鞞字从量量界限也鞞牽馬使不得越路也鞞義未詳馬

駕車而御之者曰轡轡首曰鞞革革上有金小環曰厄可以纏搯詩曰鞞革金厄一馬兩轡轡字从害从絲

曰約轡敷氏曰凶轡以繩爲之古轡或以絲爲之轡以御馬行車動馬口鉗曰銜銜外兩旁鐵曰鑣鑣飾曰

轡詩曰朱轡鑣鑣鑣上有鈴曰鸞鸞亦作鸞銜口銜鐵鉗也鑣字从馬从武貌轡字从巾从

有飾巾車曰朱勒駟勒士喪禮曰貝勒勒亦曰鬲鬲亦作羈勒字从力羈字从馬頭絡刻金飾曰錫馬胸帶

刻金飾曰鈎巾車玉路有錫金路有鈎詩曰鈎膺鏤鏤鏤字从眉上鈎刻金如鈎馬頸絡曰鞅亦曰靳亦曰

纓馬腋帶曰鞞馬腹帶曰樊馬後帶曰鞞皮二條前係驂馬之頸後係陰版之上曰鞞左傳曰鞞鞞鞅鞅

樊飾惟王侯得有故左傳衛許于奚樊纓以朝孔子惜之鞅、纓、靳、鞞、義皆未詳削革爲纓飾以五采屬

相附而車行故抽劍斷鞅則車止纓鞅鞅之轉也樊讀作鞞鞞又大帶之若條自十二就至三就其就之餘上係于衛馬衛

名左傳作繁鞞亦曰纓攷工記曰纓其牛後纓亦作鞞鞞馬後使不蹀躞也皮爲環當服馬背上驂馬外轡

貫環而執之游移前卻制驂馬不外出曰游環皮二條前係衡兩端後係軫兩端當服馬外脅驅驂馬不

內入曰脅驅詩曰游環脅驅左傳王猛謂東郭書曰吾從子如驂之靳靳即鞅在頸當胸詩曰兩服齊首兩

集傳曰游環鞞環也本毛傳此難曉集傳驂馬後于服馬而當其胸故猛以比不敢先書也靳與詩游環陰鞞二者皆無涉

以左傳兩鞞將絕證陰鞞又以斬當鞞亦難曉兵車馬皆被甲詩曰駟介傳曰不介馬而馳甲以淺薄之金爲

車上器

馬杖曰策。竹爲之。士喪禮曰：御以蒲葦。蒲柳，敷氏曰：遭喪，馬杖不以竹。策長五尺。攷工記曰：軌前十尺，而策半之。木末垂

革曰鞭。尊者之車有之。教令誓戒，執以聳聽也。曲禮曰：載鞭策。左傳：公子重耳曰：晉楚治兵，遇於中原，左

執鞭。弓囊曰鞬。詩曰：虎鞬。盛矢曰服。詩曰：魚服。士喪禮曰：犬服。扞蔽自固者曰干，亦曰盾。詩曰：龍

盾。大盾曰櫓。記曰：禮義以爲干櫓。中干曰伐。詩曰：蒙伐。句兵枝子者曰戈。攷工記曰：戈秘長六尺六寸，

八棱無刃者曰殳。攷工記曰：殳長尋有四尺。句兵三鋒者曰戟。攷工記曰：車戟常刺兵三鋒者。詩曰：公矛

一鋒無枝，長二丈者曰酋矛，長二丈四尺者曰夷矛。詩曰：二矛。攷工記注曰：戈殳戟矛皆插車輪，疏曰：以

鐵圍範之。師之耳目曰旗鼓。申警士衆曰丁寧。將車則有之。傳曰：及鼓跗，著于丁寧。又曰：衛侯不去其

旗。又曰：秦子、梁子，以公旗辟巾車。革路建大白。太僕：軍旅贊王鼓。手挽升車者曰綏。尊者之綏曰良，御

者之綏曰散。少儀：負良綏以散。綏升散，綏亦曰貳綏。曲禮：取貳綏。良綏以絲爲繩，散綏以麻爲繩。士喪禮曰：約綏，約麻爲者也。吉禮當用良者，亦用散。

車之上蔽者曰蓋。若今傘。攷工記曰：蓋之圓也，以象天也。蓋又謂之弓。傘骨。記又曰：蓋弓二十有八，象星

也。又曰：蓋已崇，則難爲門也。已卑，是蔽目也。是故蓋崇十尺。人長八尺，蓋崇十尺。弓末四周，下垂二尺。弓有長短，蓋有大小，或庇

輒，或庇輪，或庇軫。隨事之宜。庇，覆也。輒，轂末。記又曰：字卑則吐水疾。字，弓末四周下垂者，吐瀉也。注曰：車蓋主蔽雨，巾車五路

皆建旗，則皆無蓋。惟田路以省耕斂有之道。右王下，則以蓋從。注曰：蓋之用二，一蔽雨，一表尊。巾車，王喪

及葬，執蓋從車。注曰：柩車設帷荒，不得設蓋。巾車執而從，象王生時所有也。三注語殊不相應。旣曰：王生

時所有當象，故柩車設蓋不可，亦執而從，則王在車卽有是。關於顯庸，故以車工之輪人爲之，列有制度。



考成。豈僅僅省耕斂蔽雨而已哉。蓋已崇難爲門。已卑蔽目。豈沾沾雨說也。田路卽木路。亦建大麾。何以有蓋蔽雨。道車爲象路。亦建大赤。又何獨有蓋表尊。愚謂象路有蓋。經有明文。則五路皆有。夫王行不可露處。雨當蔽。風日亦當障。故在道止息。則張帷幄。在車則張蓋。蓋不礙旗者。禮緯。天子之旌曳地。博雅。天子十二旂至地。諸侯九旂。七旂。至軫。大夫五旂。至軾。此軾謂較樹軾。上中間橫木。士三旂。至肩。車上尊處在左。主是車者之位。惟將車則在中。旗旂取節。自地而至。主是車者之肩。是地軫。軾。皆謂左。則旗建于左。轎外旁軾。而五路皆張。庇軫之蓋者也。漢時。黃屋左纛。黃屋卽車蓋。纛卽旌。其遺制歟。向疑節服氏六人。維王大常立處。乃知在車下也。傳稱笠轂。車右有時下推車。遇雨用之者歟。其庇軾庇輪之蓋。則雨有甚否。所張張之。當脫旗。雨則可脫也。抑古蓋常張不可合。而柄有兩節。上節二尺。以士喪禮。潦車載簣笠例之。潦車爲從車。庇輪庇軾之蓋。側載從車。雨則取蔽歟。否則兵車外有時不必建旗歟。車有蓋以蔽上。譬以蔽前。簣以蔽後。詩曰。簣篚魚服。是也。男子車蔽如此而已。婦人則不然。士昏禮。婦車有蔀。謂上屬于蓋。下垂至較者也。詩曰。漸車帷裳。謂屬蔀上少許。下垂至軾者也。與蓋如重檐然。蔀。帷裳。皆在車箱內。不掩其外。合二者則曰容。所以蔽婦容也。巾車職曰。王后重翟。厭翟。安車。皆有容。于貴者備言之。昏禮之蔀。詩之帷裳。皆賤者則各舉其上下者。偏言之。實則皆備。蔀上。帷裳下。見雜記。巾車。五喪車概言蔽。則其蔽亦四周。遭喪不欲見人。亦不欲人見也。車四面蔽者。缺御者前少許。然則載驅詩。但言簣篚。則不加容也。故言豈弟。言遊敖。言翱翔。言行人。著其無忌。憚羞恥之甚。

# 鳳氏經說卷二

非以君命使。則不稱寡大夫。士則曰寡君之老。士相見禮。

禮。小聘使大夫。其介皆士。大聘使卿。大夫爲上介。餘介以士。非以君命使。謂去君適他國。非復奉君命爲使也。不稱寡大夫。謂擯贊通辭於所適國之君也。當如傳稱羈旅之臣某。士有士爲介而聘也。以君命使四字變文。擯贊通辭於主國君。則曰寡君之老。寡君之老。卿也。卿有大夫介。而但舉士介者。此四句乃互文。上二句言大夫以見卿。下二句言卿以見大夫。於卿介舉士介。斯可以該大夫也。合而觀之。卿大夫去國。非奉命爲使。大夫則不稱寡大夫。卿不稱寡君之老。有士作介而奉命爲使。卿則曰寡君之老。大夫則曰寡大夫。所以然者。卿大夫。君之卿大夫也。爵本於君。故奉命爲使。則尊者繫以君。卑者稱爵。去君而有適。則向者大夫。此非復大夫。向者寡君之老。此非復寡君之老。無所繫屬。稱羈旅之臣某而已。玉藻曰。大夫私事使。私人擯。則稱名。公士擯。則曰寡大夫。寡君之老。卽述此經。而非以君命使。則易其文曰私事使。緣不連讀。君命使三字。而君命下襯一而字故也。然而絕不可通也。大夫無公事不出疆。無論已。凡云使。必有命之者也。大夫私事自有往。又誰命之。而云使耶。康成求其說而不得。則曰私事使。如晉侯使韓穿來言汝陽田之類。以君命私行。非聘也。旣曰以君命。何又曰私行。且曰以君命。顯與儀禮背矣。劉原父則曰。如趙襄子使楚隆弔吳夫差。是爲私事使。亦大謬不然。儀禮原文。玉藻誤文。其所謂使。卽謂此大夫自

往。豈謂大夫遣人耶。總緣不知玉藻述儀禮而錯解之。直以爲先王別一經制。故輾轉求解。愈解愈迷也。

餼之以其禮。上賓太牢。積唯芻禾。聘禮

陳於門外之車米禾薪芻曰積。陳於中庭之筥米曰餼。其各有牢。待賓加禮也。車米賤者所食。筥米貴者所食。周官舍人共賓客之車米。筥米。此積米。餼米之別也。注約後文解餼曰米百筥設於中庭。極核。李心傳乃据積唯芻禾。謂本文無米。駁注米百筥何耶。本文但無積之車米耳。若并無筥米。則餼字無下落矣。雖然。注以生牲爲餼。李氏故以牢當餼。其誤固自注啓之。

賓皮弁。聘至於朝。賓入於次。乃陳幣。公皮弁迎賓於大門內。賓入門左。聘禮

諸侯三門。曰庫門。曰雉門。曰路門。本文所云大門。卽庫門。旣曰賓至於朝。又曰公迎賓於大門內。賓入門左。則賓至之朝。乃周官小司寇詢萬民之外朝也。天子外朝在庫門外。治朝在路門外。燕朝在路門內。諸侯實同之。然則前乎此。而次介假道。束帛將命於朝。下大夫勞者以賓至於朝。後乎此。而賓拜饗餼於朝。拜夫人禮於朝。拜饗食於朝。拜乘禽於朝。上介樞造於朝。皆謂外朝。與本文無異。賈疏就賓拜饗餼於朝。謂其無入門之文。而斷諸侯之外朝在大門外。不知此章早有明文可据也。論語過位。近日講家皆以爲外朝。而其文乃繫入公門之下。不旣倒乎。

公一拜送。賓以几辟。北面設几。不降階。上答再拜稽首。公側受醴。賓不降。一拜。進筵前受醴。聘禮  
臣與君行禮。當拜於堂下。然禮有質文。則降拜不降拜亦異。醴之禮。質不若酒之禮。文士冠禮可見本文。

几因醴授。故受几受醴。拜皆不降。而受醴以先拜。且但一拜矣。至于用幣。則其爲禮也文。所以降辭降拜也。注以醴質之義。訓一拜而不降。則以禮未成釋之。然公食大夫禮。亦用幣。方其拜至。賓輒降拜。此何義乎。

擯者執上幣以出。禮請受。賓固辭。公答再拜。聘禮

鄭注曰。禮請受者。一請而聽之也。此說茫昧不可曉。所謂聽之者。在擯者意中耶。人何由知之。在擯者口中耶。何以致詞。且近於不恭矣。竊謂古人禮請禮辭。固請固辭。其致詞各不同。經蓋謂擯者禮請受耳。而賓已固辭。故公達其意。不更請而卽答拜也。注又据後文私面亦言禮請受。而但言賓辭。不言固辭。遂謂本文固字爲衍字。亦非也。經文正在禮請固辭見意。私面不言固。乃脫文耳。觀記文私獻亦曰禮請受。賓固辭可見。

設飧 歸饔餼聘禮

飧饔。熟食也。主堂上夾室簠簋之飯。言其牢禮豆壺。則盛其禮而加之。故有腥牢。不礙熟食之義。餼亦主言中庭之筥米。其牢與醯醢亦加之。賓禮重養賓。飧設於賓至之日。夕食曰飧。以爲供賓之夕食也。饔設於明日朝。朝食曰饔。以爲供賓之朝食也。致饔之禮。辭讓拜受。迎送多儀。周官諸侯相爲賓。致飧亦然。若每日致之。則朝夕僕僕嘉賓矣。故餼與饔並致焉。周官儀禮。皆先言飧。後言饔餼。義蓋如此。康成乃云。小禮曰飧。大禮曰饔餼。非也。饔餼本二禮。故賓之拜受於館。拜禮於朝。皆殊拜之。以二禮並致。記雖有大

禮之文。然亦就饗餼言饗餼。非必對飧言。而以飧爲小禮也。豈可以小禮盡飧之名義。大禮盡饗餼之名義。注又曰。牲殺曰饗。生曰餼。其說更混。饗之牲固殺。飧之牲非亦殺乎。餼之牲固生。積之牲非亦生乎。不知饗。餼三禮。當飧與饗對訓。飧饗與餼對訓。飧禮簠簋具陳。饗禮簠簋具陳。一夕食。一朝食也。飧饗禮。簠簋陳黍稷稻粱之飯。餼禮。宮陳黍稷稻粱之米。一朝夕食之熟者。一朝夕食之生者也。

脚臚臚蓋陪牛羊豕聘禮

蓋字。先後鄭皆不訓。賈疏亦未之及。而敖氏乃以爲發語辭。誤也。此所謂蓋。乃謂脚臚臚鼎有蓋耳。與上正鼎之鬯對文。且公食大夫禮曰。士羞庶羞皆有蓋。脚臚臚已盛於豆。而將進於賓。尙畏塵而不去蓋。況盛於鼎而陳於階前。則必有蓋可知。

醢醢百饗夾碑聖禮

敖氏以醢醢敍於饗之末。餼之上。且夾碑而居。腥飪鼎之中央。遂謂此爲腥飪總設。亦誤也。醢。豆實也。醢以和醢。此乃屬餼禮。蓋餼既陳米而牽牢。則豆實亦以饗致。公食大夫致食禮。豆實實于饗。陳于楹外。簋實實于筐。陳于楹內。簋實米也。此醢醢饗與宮米類。陳于庭。正略相似。若飪牢則堂上饌八豆矣。腥牢則東西夾各饌六豆矣。九鼎則九俎而八豆。七鼎則七俎而六豆。其體已備。又安用此饗之總設爲。堂上既饌飪牢之豆。簋則餼之米。宮醢醢饗。自當退而陳于庭。安得以饗夾碑而近腥飪鼎。遂臆爲屬饗也。周官掌客。五等諸侯醢醢。皆繫牽牢之下。與米宮類言。下文上介饗餼。亦曰。宮及饗如上賓。本文先言醢醢。後

言餼文字偶然有逆順耳。卽筮及饗之文亦在餼一牢之上。則將以筮屬饗乎。大約此經文繁義密。皆當互證旁推。庶或得之。

門外米三十車。禾三十車。薪芻倍禾。聘禮

此門外之米。禾薪芻。殮禮亦有之。賓客在道路候館時。有司供之。則曰積。亦有加禮之生牢。以禮賓。而米禾薪芻。則以供賓客之車馬僕從。致殮致饗時。車馬僕從之資。亦不可少。故兩有之。然與殮饗禮無涉。與餼禮亦無涉。經不另目之。殮饗餼禮盛略之不數也。

賓朝服卽位于大門外。如聘。公如賓服。迎賓于大門內。公食大夫禮

賓卽位。公迎賓。其事相屬。經雖間以具饌之文。乃一面具。一面迎。非停賓於門外。具畢乃迎也。下文賓升。公當楮拜至。及賓降階。升成拜。公降盥亦然。所以甸人之屬。與公迎賓並爲者。以示我有嘉賓。中心好之。如此其備物。以致殷勤也。所以羣臣卽位。與公拜至並爲者。以示主人養賓。如此備官。以致殷勤也。所以舉鼎匕肉載俎。與降盥並爲者。以示主人養賓在庭。各舉其職。如此。以致殷勤也。若下文公之設醬設醢。設梁三節。則旣設而公立序內。賓立階西以俟。經著之矣。

嗇夫承命。告于天子。覲禮

經不著所承何命。按下文天子之詞。蓋謂予一人所以廟受伯父之禮者。非有他。嘉伯父之順命。王所而來也。伯父不必執謙而不入。予一人將親受伯父之禮焉。以此推之。則嗇夫所承之命。乃天子陳摯納侯。

氏而侯氏爲恭不敢入廟面至尊親與爲禮之辭如傳所云歸事于宰旅之類

侯氏升致命觀禮

經凡言致命皆謂使者致主人之命也此侯氏自覲而亦曰致命命論語爲命之命辭也致命釋辭二字變文也上文嗇夫承命亦卽謂受侯氏之辭也

君視大斂主人六出士喪禮

喪大記曰出侯于門外謂于門外侯君出也本文之出凡六注以爲不敢畱君固也然每節亦各有義焉始之哭而出也當斂而君入臨則已致哀死者之意尊者禮可以已也卒斂而出也君視斂則已致所爲來之意尊者益可以已也撫尸而出也于視斂禮已備尊者又可以已也蓋棺而出也于視斂禮彌備尊者又可以已也卒塗而出也于視斂禮加厚尊者又可以已也卒奠而出也大備矣至厚矣爲賜甚矣褻尊極矣

君出門廟中哭主人不哭辟士喪禮

上文主人出侯于門外至此君出門而辟猶始之君入門而辟也皆致其不安之意但君出門下有廟中哭句主人下又有不哭字合離斷續辟字遂急切不得見意

卜人及執燹席者在塾西士喪禮

注曰在塾西者南面東上以涖卜宗人之屬位于門西所云東上意取統于人也然上文奠燹旣在龜東

下文抱龜而又燂先。則塾西之上當統于神而西上。

爲燎于門內之右士喪禮

門內之右當在西階之南。柩車既祖。男女又終夜守于庭。不可以暗。故又爲燎。然不爲于中庭者。時婦人位階間。在柩車之北。燎光隔而不及也。亦不于阼階南者。時主人位柩車東。西面。衆主人及衆兄弟皆少東。而在其後。既皆背燎光。而位階間者。亦不免隔焉。惟西階之南。于階間。婦人既燎光無隔。而柩位東者。亦皆得向之。注謂爲燎爲哭者爲明是也。而以鬼神尙幽暗。燎宜遠。尸柩釋門右之義。則婦人更在柩北。與爲明之說自相左矣。不知尙幽暗自一義。而于此正不必牽附。不然。既襲之夜。尸猶在室。男婦皆在。將謂室中不設燭。而終夜暗中乎。而下文讀贈遺。又何以執燭俠輅乎。

其二廟。則饌于禰廟。如小斂。士喪禮

謂適士有二廟。則祖廟如殯奠之外。又饌于禰廟者如此。注以爲祖尊禰卑。誤也。未啓殯前日。有朝夕奠。啓後葬前亦如之。所以依神者。不可暫去也。經文遷祖奠。卽朝奠。祖奠卽夕奠。葬日朝遣奠。亦此意。祖奠三鼎。將行盛之。遣奠五鼎。遂行攝盛焉。此饌于禰廟之奠。卽以當一廟者之遷祖奠。遷祖奠。脯醢醴酒。率朝夕奠之常。而此乃如小斂。亦將行盛之之意。以適士殊異之也。所以奠之意。依死者之神。與祖禰無涉。何祖尊禰卑之有。

荐車荐馬。士喪禮



柩將祖。故荐車馬。其不與明器俱陳。而荐于遷祖正柩之後者。荐車馬以象將行。陳駕當先于載柩也。車馬相將。馬不繼車而荐。而間以設奠者。遷祖乃禮之一節。馬踐污廟庭。荐卽出而不停。故荐于奠畢。以要一節之終也。唯其然。故旣祖而還車。又宜荐馬。亦在還重設奠之後。以要祖之終。至於明日將葬。則馬且荐于出重之後。旣荐卽車從而出矣。

側亨于廟門外之右。設洗于西階西南。陳鼎于門外之右。士虞禮

吉祭亨于門外東方。設洗于阼階東南。陳鼎于門外東方。本文喪祭皆與之反。此非相變之義也。洗。主人所以自潔也。犧牲。主人所以供神也。吉祭。主人所以升降自阼階。堂上位在阼階上。故亨與設洗陳鼎皆在東。喪祭。主人升降自西階。堂上位在西階上。故亨與設洗陳鼎皆在西。記文殺于廟門西。與犧牲、少牢、殺于門外東方者亦反。其義亦同。

饔饔在東壁。士虞禮

棗盛。主婦職也。犧牲饋食。饔饔在西壁。主婦位在房。月生于西之義。本文反之而在東壁。亦緣婦人位在阼階上也。而少牢饋食。廩饔在門外東方。雍饔之北。豈以大夫禮辟國君不親七鼎。故主婦亦不視饔。而饔亦與雍饔同其所歟。

饌兩豆。菹醢于西楹之東。醢在西。一鏹亞之。從獻豆兩亞之。四籩亞之。士虞禮

吉祭。豆籩鏹。皆饌于房中。三者亦皆主婦事也。喪祭。主婦不執事。故饌于西楹東。

匱水在西階之南。士虞禮

西階之南。卽特牲禮門內之右。變文。吉祭喪祭。尸皆入門左。升降自西階。故皆設于西。以便事。少牢亦設于西階東。注誤以特牲門內之右爲門東。敖氏遂以本文西階之南爲變于吉者。非也。本文喪祭。少牢吉祭。皆在西。特牲亦吉祭。何以獨在東乎。東左西右。其一也。經于門內之左右。有時側之。皆據入者爲言。若不言入。則左右如其常。

尸左執爵。右取肝。搗鹽。振祭。嚼之。加于俎。士虞禮。

祭禮。凡舉牲體。尸既至齒而嚼。本篇喪祭。則實于筐。特牲。少牢。吉祭。則實于斝。以歸尸。神俎尊。不可以尸口齒之餘復加之也。況本篇及少牢。不賓尸。俎釋三個。祭畢。又當改設西北隅乎。本文主人從獻之肝。尸嚼而加俎。下文主婦從獻之燔。亦曰如初。則改設時。神俎有尸嚼餘之一肝一燔。其斷斷不然。有可以理決者。蓋上文曰賓長以肝從。實于俎。下文獻祝。又有兩加于俎之文。經文當是加于筐。因上下文而致誤耳。又按特牲。尸嚼肝。則加于菹豆。以嗣舉奠。將食之也。少牢。賓尸。不賓尸。亦皆加于菹豆。大夫辟國君。雖無嗣舉奠禮。亦將以此擬之。然至獻畢。則佐食亦必舉而加于斝。且肝燔類也。特牲。少牢。燔既嚼。皆加于斝。本文喪祭。肝既無別用。則必與燔既嚼。皆加于筐無疑。斷無加于神俎之理。

漉酒。士虞禮。

漉。當卽聘禮之醲。醲酒。昔酒也。酒之久而白者。

舉肺脊以授尸。尸受。振祭。嚼之。左執之。乃食。食舉。主人羞斝俎于腊北。特牲饋食禮。

經意。蓋左執之。乃食爲句。食舉。主人羞斝俎于腊北爲句。執之乃食。正謂食舉。又言食舉。著羞斝俎之節。

也。敖氏則乃食爲食黍。禮家皆以少牢饋食。兩言三飯。五言又食爲十一飯。乃大夫禮。本篇三言三飯。爲九飯。乃士禮。如敖說。士禮不又十飯耶。敖氏于少牢饋食。食舉之上。以本文例之。謂脫去乃食二字。若然。則大夫禮又十二飯矣。不知少牢羞胛俎。不以食舉爲節。而羞鉶且在羞胛俎之後。大夫士禮節不盡同也。則少牢食舉之文。乃正謂食舉。與本文文同意異。

尸實舉于菹豆特性饋食禮

注曰。爲將食。載也。是殆不然。舉幹後固當羞載。然尙未羞尸。何爲預釋舉乎。且舉幹而祭之。膾之。及祭。膾獸。幹魚。皆左手執舉。而右手爲之。載。何必釋舉而食也。且凡舉牲體。尸既祭。膾。則佐食受而加于胛。此肺脊。何不卽加于胛。而先實于菹豆也。竊謂周官大行人。食禮有九舉。七舉五舉之文。謂食時舉牲體之數也。周官注九字。殊蒙混。每舉牲體。皆祭。膾爲禮。而不食。脊爲體之正。肺爲氣之主。故先舉而祭。膾食之。自始食至

卒。食常執之。每舉牲體。則食舉以見意。少牢禮可徵。以始食至卒。食常舉在手而食之。故肺脊獨得名舉。禮文散逸。公食大夫禮。禮宜三舉。而前後兩食黍稷。不見舉禮。若本篇篇末餽禮。及少牢餽禮。尸俎餘不可舉。則以膚爲舉。而就席卽舉之。答主人拜。暫釋。既拜。又舉之。以至卒食。是古人食禮。手常有一物執之。以爲舉。此亦略可見矣。以大行人九獻。九舉。七獻。七舉。五獻。五舉。差之。士禮一獻。但當一舉。祭禮盛之。亦得三獻。三舉。經文舉幹。後又舉。膾。舉肩。是也。肺脊統食禮之始終。不在舉數。士禮既但有一舉。故舉幹。後則釋舉。以示禮節焉。而盛禮要不可不俟其終也。故先實于菹。以見禮未畢。至舉肩後。然後舉而加于胛焉。

士虞禮舉幹後不實舉于菹彼不食舉無所嫌也大夫禮三舉則少牢自始食而執之食之以致卒食矣  
長兄弟及宗人折衆賓及衆兄弟內賓宗婦若有公有司私臣皆殺齊特牲饋食禮

齊升也烝同殺烝見左傳亦見國語皆統言一牲體解二十一也本文殺烝則專言體解之脊脇蓋一牲體解前脛骨三曰肩臂臠後脛骨三曰胛肱脊三曰正脊脰脊橫脊三曰短脊正脊代脊左右脊各三左右脛骨各六十二脛骨六脊三脊是爲二十一脛骨貴於脊脊右脛骨貴於左肩貴於臂臂貴於臠臠貴於胛胛貴於肱最賤者脾右肩臂臠胛爲尸俎右脾爲祝俎胛俎宜用左肩尸俎始右肩嫌敵尊避不用用左臂主婦宜用左臠特牲士妻避內子用踐地之右穀左胛爲賓俎左肱左脾則長兄及宗人折爲俎焉折破一爲二也長兄弟之次曰兄弟長賓之次曰衆賓長皆得折也至是脛骨盡矣脊脊之大名三而骨甚多雖宗人以上諸俎皆以脊脊副之然尚有餘骨則爲衆賓以下之俎曰殺齊者肉帶骨曰殺時脊脊外皆無骨之肉有骨可殺者惟脊脊故但曰殺齊而脊脊可知是與左傳國語統脛骨言者異也衆賓以下何以不得左肩臠左肩臠主人主婦正俎物有所避不用他人安得折用之且左肩臠與臂將以饋君或饋友也少牢賓尸獻衆賓禮曰其齊體儀體卽本文所云折儀卽本文所云殺齊

### 少牢尸食少牢饋食禮

本文五又食皆謂食舉大約每舉牲體魚腊則一食之牲體魚腊每舉輒加斫牢肺正脊獨卒食乃釋每舉但曠肺氣主脊正體每舉每食之以見意此其所以與牲體魚腊均爲所舉而獨得名舉也注以又食

爲食黍謂大名曰食。小數曰飯。非也。散文則黍亦言食。對文則飯言黍。食言肉。本文五又食。承上食舉言。一又三飯。承上三飯言。義例畫然也。如注說。是以又食承三飯。無此文例。卽無此文義。且又食旣爲食黍。祝侑之下。旣曰尸又食。何又曰尸不飯告飽耶。又禮器曰。大夫士三。謂三飯告飽。大夫士禮然也。此禮三飯不告飽。至舉幣乃告。告之節雖異。特牲實卽亦三飯告飽也。自注以又食爲食黍。疏遂謂士三飯告飽。大夫七飯告飽。推之諸侯當九飯告飽。天子則十一飯告飽。十一也。九也。七也。天子諸侯降殺以兩。大夫七而士三。此何說耶。

主婦取籩于房中。執棗糗坐設之。棗在稷南。糗在棗南。婦贊者執棗脯。主婦受設之。棗在糗東。脯在棗東。有司徹。

周官籩人。醢人。朝事籩豆。加籩豆。羞籩豆。數皆相配。則饋食籩豆亦宜然。而醢人饋食之豆。八籩人饋食之籩。經止列五。敖氏据本文四籩。棗糗。棗脯。及旣夕禮四籩。亦棗糗。棗脯。謂周官籩人職文。饋食籩。棗下脫糗。棗下脫脯。此讀書別具慧心者也。嘗就其說而推之。籩人職曰。凡祭祀。共其籩。薦羞之實。注曰。尸未食。未飲。進籩曰薦。朝事饋食之籩是也。旣食旣飲。進籩曰羞。加籩是也。腊人職曰。凡祭祀。共其羞。脯。薦。脯。籩人加籩。固兩用脯。朝事饋食。籩皆無脯。饋食籩物。旣缺其三。若非脫脯。腊人何以云薦脯耶。而周官膳夫。亦有王之稍事。設其薦脯。醢人之文。亦屬薦籩有脯之證。此饋食籩脫脯之一徵也。儀禮全經。凡用一籩一豆者。皆籩脯而豆醢。醢人之醢有六。曰醢。曰羸。曰臚。曰蜺。曰雁。曰魚。渾言醢。不知何屬。据士冠禮。禮冠

者及醮。皆一籩。脯一豆。醢醮若殺。則一籩一豆。加而兩籩兩豆。其文曰。兩豆。葵菹羸醢。兩籩。棗脯。醢加以菹。脯加以棗。脯不改。則醢亦不易。是配籩脯之豆。醢固用羸醢。而士喪禮大斂奠。遣奠亦皆以葵菹羸醢配。棗脯。夫葵菹羸醢。饋食豆也。而棗脯配之。則棗脯。饋食籩之棗脯也。此又饋食籩文。棗下脫脯之徵。棗下果脫脯。則棗下脫糗。亦非臆說歟。或曰。周官籩豆之物。序亦相對。饋食豆首葵菹。次二羸醢。饋食籩如敖說。則棗脯屬次三次四。與葵菹羸醢不對也。曰。既夕禮曰。東方之饌四豆。脾析羸醢。葵菹羸醢。四籩。棗糗。棗脯。奠豆。南上。精籩羸醢。南北上。精席。東向。設豆。南上而精。而籩在羸醢南。則脾析最先設。在羸醢南。羸醢在脾析北。葵菹在羸醢東。羸醢在脾析東。最後設羸醢。故棗籩繼而南。不繼脾析南者。酒禮位也。既夕禮。饋食四豆。其饌其奠。皆先脾析羸醢。則葵菹羸醢。固屬饋食豆之次三次四。與饋食籩棗脯之序正對。儀禮詳周官略。又疑周官有倒文之訛。蓋以經核經。固有如是者。夫据儀禮。周官旁推互證。敖說洵不易矣。然饋食籩物。猶缺其一也。竊謂賓尸禮。主婦獻尸。其從獻籩糗與腰脩。糗即本文及既夕禮之糗。而腰脩則籩人職亦無文。又不應籩人職外。別有所用。內則配食之法。有腰脩。蜺醢之文。蜺醢屬饋食豆第六。則腰脩亦當屬饋食籩第六。意者周官饋食籩。桃下亦脫腰脩歟。蓋賓尸正籩。既攝用朝事首四籩。而從獻籩。則雜取饋食首四籩之次二次四籩之次二。以見等殺也。然則既夕禮。賓尸禮。及本文之糗。注皆以糗餌釋之。非也。糗與糗餌。爲物各殊。用亦殊節。糗爲饋食籩。故賓尸不賓尸。皆從主婦之獻進之。糗餌爲羞籩。與粉餈醢食糝食。謂之房中之羞。賓尸則于主人酬尸。後特設之。不賓尸則於賓長致爵于主人。



滯設于醬西。設鉶四于豆西。聘禮歸飧饗具三牲之鉶。而不及太羹。滯。陳禮于館。非賓主正行禮也。夫然。故庶羞之牲肉。當有致香美之腳、臠、臠及炙。及載牛。別有鱠及魚膾。及雉兔鶉鴛。則亦不盡備。但以首三豆之腳、臠、臠。見意入小鼎。而與正鼎並陳西階前。饗禮曰。陪鼎副正鼎而陳也。飧禮曰。羞鼎將入。豆爲庶羞也。然則腳、臠、臠皆香美之肉也。太羹不和之肉汁。鉶羹鹽菜和之肉汁也。了不相涉。祭祀賓客正行禮。腳、臠、臠亦不入鼎。於饗則陳之以豆。而羞之席前。公食禮。特牲少牢禮。可見。特牲庶羞有臠。少牢有臠臠。本文賈疏乃鉶羹陪鼎混而爲一者。何也。秋官掌客積禮注曰。不殺則無鉶鼎。謂無鉶羹。飪鼎、腥鼎、陪鼎。据飧饗禮而推也。疏則連讀鉶鼎二字。曰。鉶鼎卽陪鼎。故飧禮疏曰。鉶器名。所以盛腳、臠、臠三者之羹。而公食大夫禮疏曰。据羹在鉶曰。鉶羹。据在鼎曰。鉶鼎。與正鼎並陳爲陪鼎。當入庶羞爲羞鼎。其實一也。然則公食大夫禮。正饌設四鉶羹。加饌設十六豆。而首腳、臠、臠當作何解。不殺無鉶鼎。鄭注積禮本謬。而賈疏錯解之。又添一重障焉。

### 條狼氏秋官

春秋宣十二年左傳曰。屈蕩戶之。杜注曰。戶止也。釋名。戶所以閉護室也。閉護不得擅入。故義爲止。故前漢王嘉傳亦曰。坐戶殿門失闌。免扈亦通戶。昭十七年左傳曰。扈民無淫。杜注亦曰。扈止也。是也。秋官條狼氏。鄭康成注曰。條讀爲滌。狼。狼扈道上。康成所云狼扈道。猶云豺狼當道。停止阻闌道路礙行也。蓋條狼氏執鞭辟行人爲王清道。故康成以滌除狼扈道上釋之。謂行人當道如狼扈。條狼氏以鞭辟除之也。



賈疏乃謂狼扈道上不獨之物在道猶今言狼藉非也。狼藉藉字蹂躪之意。王介甫所云狼善殘物者也。蓋狼善當道亦善殘物。殘物而蹂躪固有穢汚之意。當道而阻闕則爲停止之義。狼扈安得以狼藉當之。且除道不獨乃蜡氏之事。蜡氏職有明文。又不獨宜豫除不當在王行時。條狼氏執鞭趨辟。王已在道矣。賈疏誤會注滌字未究扈字之義也。而後世史書又有扈從之文。此扈字卽條狼氏之辟字。扈從呵止行人以從衛天子也。注家以隨釋扈亦誤。司馬相如上林賦曰扈從橫行。郭景純曰跋扈從恣不安鹵簿以。不安鹵簿釋橫行。良是。跋扈之扈謂藩亦以闕出入。故梁冀無人臣禮號爲跋扈將軍。以跋扈從恣釋扈從亦非。然則離騷扈江離與辟芷乃力學之辭。離芷芬芳可以禁止穢惡之氣。蓋謂扈惡以離辟穢以芷。閑邪存誠之喻也。注家以被釋扈以幽釋辟亦非。凡一字數義皆從本義轉輾相生。相去不遠。未有一見一義而風馬牛如扈字者。

上公五積皆眡。殮牽殮五牢。食四十簋。十豆。四十鏹。四十有二。壺四十。鼎簋十有二。牲三十有六。皆陳饗餼九牢。其死牢如殮之陳。牽四牢。米百有二十筥。醢醢百有二十。饗皆陳。車米眡生牢。牢十車。車乘有五。數車禾眡死牢。牢十車。車三秬。芻薪倍禾。皆陳。掌客

上章詳敘上公積殮饗餼之物數也。車米禾芻薪積之正物。有牢待賓客加之。若出漢以下文士之筆。其敘積必曰上公五積皆牽四牢。米四十車。車乘有五。數禾五十車。車三秬芻薪倍禾。皆陳。敘殮旣畢必曰車米芻薪如積。敘饗餼旣畢又必曰車米禾芻薪如積。如此非不立文有體。然辭費矣。而米禾車數十生

死牢。其例尙不可見。筆勢無由見也。而下文侯伯子男兩章。其物之數各殊。又必逐節印板如本章。而不勝其複疊也。經文敍積。則以眠殮二字虛括之。車米禾芻薪。旣沒而不出。當必於殮出而實之矣。猶沒其文。而於饗餼乃出之。旣出車米禾薪芻于饗餼。則章首當云眠饗餼也。然殮實有車米禾薪芻薪如積如饗餼。使云積眠饗餼。而不云眠殮。則殮之如積如饗餼者不見也。是敍積之虛。當實於殮。而敍殮又虛。反實于積。此文章虛實出沒之極奇變。絕無而僅有者也。雖然。米禾車數。眠生死牢。而生死牢惟饗餼具。不嫌于積。但有車米。殮但有車禾乎。非也。積物。車米禾芻薪。殮物。豆簋簠。壺。餼物。宮米。饗醢醢。及四者之牢。死生。遺人。委人。廩人。舍人。倉人。饗人。烹人。酒人。醢人。醢人。牧人。牛人。羊人。各有典章。官成。掌客。但掌其用物之數。賓客尊卑有差別。職首所云等數是也。凡文前詳後略。敍積但曰牽。敍餼乃曰牽四牢。而前略後詳者。積旣不出。車米禾芻薪。則牢亦以一牽字括之。餼則當詳米之宮數。醢醢之饗數。亦必并言牽之牢數。且饗餼死生牢數。合言九牢。則牽牢又當殊言四。筆墨有類。則變詳略之常法。而自適于文耳。而積之牢數。所以見其著于餼之牽四牢者。殮饗皆五牢可知。上公死牢例皆五。則生牢例皆四亦可知。而文之最絕特者。則莫如車米禾芻薪。以一見三。并得著米禾車數之例也。聖人豈有意爲文。以經天緯地之胷。其下筆自然如化工之肖物。此非惟不能學。又豈易識哉。鄭康成不辨乎此。其注眠殮也。曰。如殮所供。夫殮所供者。豆簋簠。壺。飴。腥。鼎也。則約公食大夫致食禮注之曰。簋簠之實。其米實于簋。陳于楹內。豆實實于饗。陳于楹外。車米禾薪芻。陳于門外。牽牲不殺。則無餼鼎。壺之有無未聞。每物就殮禮。而以

生易熟注眠字。若然則經正宜詳列安得略之。且其物與餼無殊而二禮亂矣。其於車米禾芻薪亦据聘禮設殮有此而本文又曰眠殮故聊一及之意初不專指爲積。固謂筐米饔醢醢爲積亦有車米禾薪芻如殮也。若無聘禮設殮經文注并不言車米禾芻薪矣。天官宰夫鄭注委積曰牢米芻薪給賓客道用米連芻薪言則該禾必指車米而非筐米必不謂有饔醢醢。今于本文不知眠殮眠字在空際而以殮物實之豈宰夫之積車米禾芻薪掌客之積筐米饔醢醢耶。康成一時讀書之泥聖經絕世奇文亦遂沒不可見。積眠殮牽四字注當云積車米禾薪芻也。車米禾薪芻及數言于饔餼而曰眠殮殮亦具有此。若云眠饔餼則殮有此不見也。牽對下殮牢死而言不言數死牢皆用五則生皆用四于餼著之賈疏謂積牽五牢亦如注之錯會眠字也。疏又有錯會注者積禮注曰不殺則無鏹鼎謂鏹與飪腥陪鼎也。疏混爲一曰鏹鼎卽陪鼎殮禮注曰鏹羹器疏又曰鏹器名所以盛腳臠臠三等之羹謬甚。古者祭祀賓客之羹有二見天官享人。一曰太羹儀禮曰太羹滂煮肉汁不和盛于登。一曰鏹羹儀禮及掌客本文皆但曰鏹肉汁而有鹽菜之和者盛以鏹。特牲少牢兩饋食禮公食大夫禮二羹言之甚詳。若陪鼎之腳臠臠則牛羊豕肉烹和致香美之稱盛以豆列于庶羞之首詳公食大夫禮腳臠臠肉也。公食大夫禮爲加饌鏹羹汁也。公食大夫禮爲正饌非難辨者不知疏何以混爲一也。

上公殮五牢食四十簠十豆四十鏹四十有二壺四十鼎簋十有二牲三十有六皆陳。注曰四十有

有八牲當作腥

侯伯殮四牢食三十有二簠八豆三十有二鏹二十有八壺三十有二鼎簋十有二腥

二十有七。皆陳子男。飧三牢。食二十有四。簠六。豆二十有四。鏞十有八。壺二十有四。鼎。簋十有二。牲十有八。皆陳。注曰。牲亦當作。掌客。

飧饗禮同。以本經核聘禮。歸饗聘禮其目。本經其綱也。而本經之誤文非一。又有變文。本經所云食。飯也。卽聘禮之黍稷。簋變簋言食也。注乃以爲庶羞。夫惟公食大夫禮。主君不親食賓。而生致賓館。乃有庶羞。飧饗禮則但有腳。臠。臠。三陪鼎。爲庶羞之首。見意而已。本經爲儀禮之綱。飧饗具物。豈有獨異者耶。注謂牲皆當作腥。良是。謂公鏞四十二。當作三十八。則不的。且鏞數之誤。亦不但公也。一牢九鼎者六鏞。七鼎者四鏞。見聘禮及公食大夫禮。經三等諸侯。腥。皆牢一而鼎九。則惟子男之鏞十八。爲不誤。侯伯之二十八。當作二十四。公之四十二。當作三十。注不據儀禮用鏞成例。而據本經之子男十八。侯伯誤作二十八。遂謂降殺以十。亦非。凡用簋之數。一牢九鼎者八簋。七鼎者六簋。亦見聘禮及公食大夫禮。故本經五牢則食四十四。牢則三十二。三牢則二十四。正與儀禮一牢九鼎八簋者合。則以十二簋概五牢四牢三牢。皆牢九鼎者。亦文有誤也。聘禮。腥。鼎九皆有。兼。陪。鼎三皆有。兼。亦可通言。蓋是十二鼎皆有。蓋也。本經。鼎。簋。字當是。蓋字之誤。簋。蓋聲相近。字相似。正猶牲三十有六。牲十有八。皆腥。誤牲也。夫。腥。鼎者。蓋肉既熟。陳于階前。所以禦風塵。鼎言蓋。明其熟也。故下文蒙之曰腥若干。亦并不言鼎。若以爲鼎。則句有二物。下文專蒙鼎。而但言腥若干。則文義隔闕不可通。且經文。食物各有類。豆。簠。鏞。壺。皆在堂。及兩夾。故先序。腥。腥。鼎。在階前。故末言之。簋與豆。簠。鏞。壺。同處。而乃與階前之鼎并言耶。聘禮。設饗堂上。八豆。

八簋、六鉶、兩簠、八壺、爲西階前飪牢九鼎之饌。東西夾六豆、六簋、四鉶、兩簠、六壺、爲阼階前腥牢二七鼎之饌。一牢一饌七鼎者。六豆、六簋、四鉶、兩簠、六壺、九鼎則八豆、八簋、六鉶、兩簠、八壺、縷縷分明。聘屬臣禮。故飪牢鼎九而腥牢鼎七。本經飪腥牢鼎皆九。君禮盛之也。以聘禮推之。本經五牢者當五饌。堂上一饌。東西夾各二饌。四牢者當四饌。亦堂上一饌。東夾一饌。而西夾二饌。聘禮。飪一腥牢。則西夾一饌。三牢者當三饌。而如聘禮之饗。堂上一饌。東西夾各一饌。然則本經之食。卽如注謂庶羞亦當各從其饌分陳。而每饌八物。然而公食大夫禮。上大夫庶羞二十。下大夫十六。三等諸侯止八庶羞。萬不可通也。注則併爲一饌。曰陳于楹外。十以爲列。東西毋過四列。而于天官膳夫。羞用百有二十品。注曰。公食大夫禮。上大夫庶羞二十。下大夫十六。物數皆備。天子諸侯有其數。其物未盡聞。賈疏引本經之公食四十。侯伯食三十二。子男食二十四者。申注諸侯庶羞之數。于是本經之食數。遂與天子百二十品。上大夫二十。下大夫十六。並爲庶羞之典。据矣。然而膳夫職。自六穀六牲說下。則百二十品者。乃于此選用之。非謂一饌畢具也。夫上大夫庶羞二十。下大夫十六。是實典。天子百二十。是虛境。既非一例。而据本經之食數。爲諸侯之庶羞數。實按之。經亦不止此。何也。腳、臚、臠。王侯以下庶羞之首也。而本經尙列西階前十二鼎之三陪鼎。中合之注所云。陳楹外者。則公食四十。乃四十三。侯伯食三十二。乃三十五。子男食二十四。乃二十七也。注何乃忘之。遽以合爲一饌者。定其數耶。夫食旣錯解。而臆撰爲合陳楹外矣。而豆、簠、簋、鉶、壺之陳。又不据聘禮而推。而据禮器上公之豆十六。諸侯十二者。謂是堂上豆數。而中分其餘。屬東西夾。是五牢四牢皆三饌。旣與聘

禮一牢一饌者大殊。且禮器自天子之豆說下所云二十有六。乃朝事之豆八。饋食之豆八。加豆八。羞豆二。備舉醢人全物也。則所云上公十六。乃朝事八豆。饋食八豆。所云十二。乃朝事六豆。饋食六豆。若聘禮設饗。則堂上東西夾每饌之豆。皆從韭菹。始鑿有明文。是本經上公豆四十。乃朝事八豆者五。侯伯豆三十二。乃朝事八豆者四。子男豆二十四。乃朝事八豆者三。與禮器云云千里月也。如注之說。則堂上東西夾。豆物重疊分裂。成何品節。既亂豆之例。而簋鉶壺之屬。亦以意推排。無復條理。儀禮周官一綱一目。不幾于汨亂不可識乎。大抵禮食之饌。本經所列。物數已爲極盛。雖天子之饌。亦不過此。蓋嘗綜儀禮全經差次之一。饌之鼎數。始于三而極于九。周官膳夫。王舉十二鼎。亦謂正鼎九。陪鼎三也。一饌之豆數。始于二而極于八。三鼎者二豆。如士喪禮。大斂奠。士虞禮。特牲饋食禮。是也。五鼎者四豆。如既夕禮。遣奠。少牢饋食禮。是也。七鼎者六豆。聘禮。腥鼎二。七。東西夾兩饌皆六豆。公食大夫禮。甸人陳鼎七。宰夫薦豆六。是也。九鼎者八豆。聘禮。飪鼎九。堂上之饌八豆。公食大夫禮曰。上大夫八豆九俎。是也。九俎則九鼎也。雖天子九鼎之祭。亦獻腥。薦朝事豆八。饋熟。薦饋食豆八。醢尸。薦加豆八。分節各薦。每節止薦其八。記曰。籩豆。凡殺一牲而一鼎。其用豆。則以籩偶豆。所謂脯醢也。如冠禮。禮子。及殺而始醢者。是其再醢兩豆。則盛冠禮而用之。此禮之變也。若禮之常。則如鄉飲禮。燕禮。皆有一狗牲。亦皆用脯醢。一饌之簋數。亦始于二而極于八。三鼎者兩敦。敦。亦黍稷器。士虞禮。特牲饋食禮。是也。五鼎者四敦。少牢饋食禮。是也。七鼎者六簋。聘禮。兩夾室之饌。公食大夫禮。是也。九鼎者八簋。聘禮。堂上之饌。公食大夫禮曰。上大夫八簋九俎。是也。小雅伐木詩曰。陳饋八簋。毛傳曰。天子八簋。亦謂用簋數極于八。孔疏則据本經三等諸侯皆十二簋之

誤文而謂詩之八簋。乃天子待族人之禮。然詩明言諸舅。則其說不可曉。且此十二簋。据注亦分三饌。疏乃概以十二之數。差等詩之八簋。尤誤之誤。明堂位。虞兩敦。夏四璉。殷六瑚。周八簋。謂黍稷器。始于兩敦。夏殷周。漸增至八簋。而極。魯皆備有。孔疏謂魯所得惟此。亦誤。一饌之庶羞數。始于四而極于二十三。鼎者四。庶羞。士虞禮。特牲饋食禮。是也。五鼎者。八庶羞。少牢饋食禮。是也。佐食薦四。司士薦四。七鼎者。十六庶羞。公食大夫禮。是也。九鼎者。二十庶羞。公食大夫禮曰。上大夫九俎。庶羞二十。是也。三鼎五鼎。庶羞登以四。七鼎九鼎。亦登以四。五鼎七鼎。則登以八。所以數始于四。登以四。而中間又或登以八者。庶羞主牲肉。三鼎者一豕牲。公食禮。豕有臠。有炙。有載。載。切肉未鹽和食之。宜有醢。適爲四豆。五鼎者。羊豕二牲。公食禮。羊有臠。亦有炙。有載。有醢。加豕之四豆。適爲八豆。二禮不得刪一豆。所以始于四而登以四也。七鼎者。三牲具。公食禮。牛有腳。亦有炙。載。醢。加羊豕之八豆。則十二豆。以牛大牲。異之。又獨加一鱠。內則亦當有醢配。則十四豆。設庶羞之法。四豆一行。十四豆三行。餘二不成行也。則從以非牲肉之芥醬魚膾。爲十六豆。三牲具之庶羞。牛有獨隆。故其數獨登以八焉。然庶羞之節。本登以四。故九鼎亦登以四。第加以雉兔鶉鴛。內則。四物。而鼎數極于九。庶羞數遂亦極于二十。或曰。公食大夫禮。安見王侯亦然。顧大夫之祭。不過五鼎。四豆。四敦。八庶羞。今優其爲賓。斯得用王侯之九鼎。八豆。八簋。公食禮。就食大夫。故言大夫庶羞二十。若獨爲大夫禮。則九鼎。八豆。八簋。亦獨爲大夫禮乎。且古者敷地之筵。長丈六尺。席長八尺。饌于席前。東西準之。而設饌皆方。雖不必整。要亦不遠。公食禮。設庶羞于西末一行。四物自北而南。東當簋。簋之設。二以

並亦自北而南。六簋三行。八簋四行。十六庶羞四行。二十庶羞五行。大約相稱。若如本經注。以公食四十爲庶羞。及周官膳夫天子之差百二十。則簋四行。而庶羞十行。或三十行。豈得復爲方設乎。若廣庶羞之行。而每行八物。或十二物。則不準八尺之席。而方丈且有餘矣。夫周官庖人。掌拱王膳羞之物。六畜六獸六禽而已。卽据內則。人君燕食之庶羞。或不止庖人所供之物。而其禮食之饌。則止于庖人所供。公食禮之二十無疑也。白虎通。一穀不升。徹鶉鷄。二穀不升。徹鳧雁。三穀不升。徹雉兔。此通言王侯也。雖第十五豆至十八豆。肉物位置微不同。而鶉鷄爲末二豆。則不改。此武周之典禮。軼見于漢世之書。亦庶羞全數止于二十之一微。一饌之鏹。極于九鼎之六鏹。降爲七鼎之四鏹。見聘禮。公食大夫禮。再降爲五鼎之兩鏹。見少牢饋食禮。鏹亦取偶。用則始于五鼎者也。故士昏禮。三鼎無鏹。特牲饋食禮。三鼎以祭。禮盛之則有鏹。亦用兩鏹。始于兩則亦窮于兩。窮則通也。士虞禮。三鼎止一鏹。喪祭變禮。不尙味。不在此例。一饌之簠。不論九鼎七鼎。聘禮。公食大夫禮。其數皆二核之特牲。少牢兩饋食禮。五鼎三鼎。蓋無稻粱。一饌之壺。九鼎者八壺。七鼎者六壺。大約如豆如簋。然五鼎三鼎壺數。未見經文可据。讀周官者。識得鼎以九爲極。則本經所列物數。皆配九鼎。是爲禮食饌之極盛。但庶羞未備而已。

坐如尸。立如齋。曲禮

鄭注。如尸。視貌正。齋。謂祭時。如之。馨且聽也。孔疏。祭前齋於寢。坐而無立。今日如之。則齋是祭時立於神前。祭義。出戶而聽。是祭有聽法。立神前必馨折屈身。故曰馨且聽。愚謂如尸。如爲尸然。爲尸不言不動。而



貌極矜莊。君子坐如之。坐主敬也。如齋。如致齋然。致齋無二無雜。而心極齊一。君子立如之。立主敬也。言尸舉外以該內。言齋舉內以該外。兩如字形容之詞。不可鑿求。注之釋齋。以祭時釋之。而曰聽固以心言。然出戶而聽。偏指不該全祭也。曰磬則又以容言。夫所謂磬折者。僂至背而倨句。但視整方之矩稍舒。而身之曲已近於矩。其爲容甚勞。侍神則宜然而謂主敬君子。居常不立則已。立則如之。似不近情事。而釋齋必指祭時。核之文義。亦非自然。

四十曰強而仕。七十曰老而傳。曲禮

平列中獨加兩而字。各有兩意。上而字。謂學非強立不反。屆時而成。不可淑世也。學既強立不反。屆時而成。不可遺世也。下而字。謂精非久勤而敝。老衰甚憊。不敢避事也。精既久勤而敝。老衰甚憊。不可輕事也。大夫七十而致事。亦此意。人生百年。惟此兩候。關係尤要緊。故加兩而字。低徊頓折之。令人分明自處。然亦就人德器精力之常者。大概言之。

下卿位曲禮

卿位在朝。据周官樂師注。天子登車於太寢西階前。下車於阼階前。則無下卿位之禮。故講家以屬諸侯。其出也。過卿位而登車。其入也。將至卿位則下。然而助理之義。天子諸侯同。則其體貌亦同。不當諸侯獨異。且据禮記。君爲下車者。爲君尸者。及宗廟國君敬大臣。其位例諸祖考。似太過。竊謂卿字疑誤。當是神字。周官少宗伯。建國之神位。國以外有山川諸壇壝。諸侯亦然。此則禮所當下。且本文之上曰式黃髮。下

曰入國不馳入里必式。語言有類。上下文皆言道路間不應中間忽言門內。

介者不拜。爲其拜而夔拜。曲禮

周禮太祝九拜之末曰肅拜。拜法必兩手据地俯伏肅拜。則立而不跪。但俯下手而已。此婦人拜也。而甲冑之士亦然。故成十六年左傳。鄢陵之戰。郤至三肅使者。本文釋其所以肅之意也。夔枝拄也。言介者所以不跪拜者。爲其跪拜而身披甲。枝拄其拜故也。古者之甲。雖非鐵鎧。然犀兕重札。必不若衣之隨身屈曲也。

載鞭策曲禮

鞭。木末垂革。鞭人之具。策。截竹爲杖。策馬之具。尊者在車。常執鞭以教令。見左傳。楚子狩州來。篇注。乘路馬。考。鞭載於車。不敢擬君而執也。策亦載之。君不在車。路馬以策擬杖。亦此不敢也。

於外曰子曲禮

子者。男子有德之美稱。古者以稱大夫及王子公子。大車詩曰。畏子不敢。正月詩曰。駉子內史。稱大夫之徵也。春秋。季子來歸。天王使南季子來聘。季者其字。子則美稱之也。此公子王子稱子之徵。其餘春秋。如蘇子。單子。溫子之屬。亦皆大夫稱子之徵。記曰。於外曰子。尙拘於內焉。方氏謂記者。但据春秋書齊高子來盟。非也。且曰。此春秋仍魯史之說。而不能正也。夫孔子作春秋。乃有訛不能正而仍之耶。

季武子成寢。杜氏之葬。在西階之下。檀弓

方氏曰。謂苑囿中也。周衰禮廢。魯公薨於臺下。吳夫差宿有妃嬪媵嬙。鄭伯有在壑谷。此說甚允。

孔子蚤作。負手曳杖。逍搖於門。檀弓

此記者誤也。聖人與道爲體。動容周旋中禮。豈有知將死而少縱耶。方氏謂全受全歸。知將死而志氣甚自得。何言之鄙也。

朝不坐。燕不與。檀弓

周官。王侯三朝皆無堂。故雖公卿大夫亦無坐禮。儀禮燕禮。獻亦及士。然則本文之朝。謂燕見於路寢之堂也。路寢則有三公坐而論道之禮。燕不與。亦當謂坐燕禮。大夫亦堂上有席而坐。士則受獻於西階上。獻畢仍立於堂下。而不與坐也。不然。則核之典禮。皆不可通。

大飲。烝月令

鄭注曰。烝有牲體。爲俎實也。大飲。十月農功畢。天子諸侯與羣臣飲酒於太學。以正齒位。黨正屬民飲酒於序。亦在此時。邠詩。十月滌場以下。頌大飲之詩。愚按玉藻曰。饗野人皆酒。謂蜡也。爾雅。朋酒斯饗。兩尊皆酒。正與玉藻合。當是蜡禮之嚆矢。蜡飲。黨飲。禮制禮意判然。但同月不同地。不同日。鄭注雜記。誤合黨飲於蜡飲。卽微見端於注本文。本文曰。大飲。義主樂酒。鄭卽引爾雅詩近蜡者證之。鄭謂蜡飲卽黨飲。故注大飲先鑿空曰。于太學正齒位。又引黨正文以證之。然而鄭注黨正正齒位曰。爲民三時務農。將缺于禮。故歲晚務閒。飲酒正齒位。教民孝弟也。雜記曰。百日之蜡。一日之澤。今鄭解本文云云。則天子諸侯與羣

臣亦缺於禮。而孝弟待教耶。亦終歲勤。而待澤於一日耶。夫天子諸侯與羣臣。大飲爲樂。周禮所無。秦人之制。半由逞臆。卽下文以臘代蜡可見。本文之解。不如陳東匯大飲於烝祭之說爲得。不足深究也。且鄉飲酒禮。燕禮皆有狗牲體俎。本文烝字如鄭注。不贅極乎。月令制度欠師古。其屬文尙未至無聊也。



# 鳳氏經說卷三

關雎

左右流之。謂苜菜生水中。或左流之。或右流之。未及采也。以興淑女在浴陽。或寤求之。或寐求之。未即得也。流只貼水說。無取字意。抑言取則預奪下采字。抑言取亦興不起未得意。流可言左右。采可言左右。采不得言左右。而采承采說。則左右采之四字。中間自該得采。此三語之次也。采之義爲菜。死字活用。但有熟義。無薦義。集傳上章流字已及取。則未章采字。取必兼擇。而采字熟乃及薦。

麟之趾

姓。但訓生。詩言公姓。承上公子。則爲公子所生。故集傳曰公孫。儀禮特牲饋食禮。禮記玉藻。皆言子姓。禮者曰子姓。孫也。子所生也。儀禮喪服。緦麻三月者。爲族曾祖父母。族祖父母。族父母。族昆弟。注曰。族曾祖父。曾祖父之昆弟也。族祖父。族曾祖父之子也。族父。族曾祖父之孫也。族昆弟。族曾祖父之曾孫也。族。屬也。緦麻則服窮。親盡恐相疏。故以族言。著其親也。詩言公族。集傳以同高祖廟未毀有服親釋之。本此。

采蘋

此詩漢儒皆以爲祭事。而蘋可生蠶。故後儒又以爲蠶事。集傳亦姑存之。其實于以用之云云。不合蠶事。

措辭。且左傳澗溪沼沚蘩蘋藻薦鬼神。周人說此詩已屬祭事也。王后以下祭服首飾。周官追師有三曰副。編次內子當服次而少牢饋食禮曰被。則被卽周官之次。此詩公侯夫人祭服言被而不言副。若編箋疏遂謂詩言夙者祭日朝視饋。詩言夜者祭前夕視濯。祭畢釋祭服而還歸。故皆服被。然詩人舉夫人服以表敬祭事。乃不舉正祭時而舉其前後耶。且主人視殺與主婦視饋對。特牲少牢視殺皆正祭服。安見主婦有殊。特牲主人視濯不著其服而與爲期同一時事。少牢爲期仍宿尸之祭服。則特牲視濯可知。是公侯夫人視濯視饋皆祭服也。祭禮畢事亦不釋祭服還歸。孔子膳肉不至不稅冕而行。冕祭服也。然則此詩言被柰何。曹氏曰此文王時諸侯商制與周禮不同。一言可空箋疏之說矣。匪直夫人祭宗廟被爲商制也。周官醢人七菹無蘋蘩藻。元公制禮菹豆實亦易其物矣。蘋藻不可知。商之蘩乃傳自夏者也。夏小正曰二月采蘩。傳曰蘩豆實。

墉牆

古者屋下柱間牆曰墉。屋外四周牆曰垣。垣卽所謂宮牆也。垣墉皆得稱牆。而墉不得稱垣。垣不得稱墉。又凡經傳言牆皆垣。惟禮記負牆而立。乃堂上東西柱間牆。別詳論語宮牆。

在前上處

凡樂舞廟則在廟堂之前庭。寢則在寢堂之前庭。庭中禮事立處。以北爲上。舞位始於北。而復綴亦於北。故曰在前上處。下章曰公庭萬舞。

將仲子

古者作室先築周垣。庶人一畝之宮。環堵之室。折桑言于踰牆之下。則桑樹宮牆之內。七月詩。微行。牆內桑下小徑也。讀小弁。而知園有梓。讀此詩及鶴鳴。又有檀。材木之用。不獨山林也。且讀魏風。又有桃。七月詩。又有棗。有鬱。有瓜。瓠。葵。茶。周官載師。宅種桑並種麻。則古人布帛果蔬蔬菜。竝取給五畝之宅焉。食貨志。二畝半在田。漢人臆說。

叔于田

第一章之仁。承居人爲愛人。則第三章之武。承服馬爲材勇。第二章之好。承飲酒爲溫克。

羔裘

裘曰如濡。曰晏。曰三英。粲與召南之五紵。五緘。五總。檜之如膏。有曜。皆袒裘也。召南固曰退食。此詩美賢大夫亦同。而檜君在堂。以朝。則好潔衣服而無禮者歟。

著

著。宁通說。左傳者曰。著。所立處也。綜核經傳。言宁者。乃有禮事立此以待之通名。惟王侯塞門有屏。故宁以門屏連言。而帷薄蔽門者。門內亦稱宁。立此待事同也。此詩所云著是也。朱子儀禮釋宮曰。門之內。兩塾不言屏。集傳門屏句。當以儀禮釋宮易之。蓋此詩未嘗有謂齊侯不親迎也。俟於著。揖婦延之進也。既則前導之庭。西階之前也。又俟揖婦延之升也。既又先升焉。堂室戶外也。又俟揖而延婦入也。昏禮。升階不言揖。升堂不言入室。省文。集傳。呂氏引昏



禮俟于門外。婦至揖入。證詩第一俟非也。著在寢門內。昏禮門外。乃大門外也。詩正以俟于寢門不合禮。見其非御輪先歸。俟于大門外者也。又引昏禮及寢門揖入。證第二俟亦非也。夫寢門也。安得曰庭。又引昏禮升自西階。證第三俟。然墻方在階下。揖婦升。則不得云堂。素青黃一統絲具三色。華瑩英。一瓊玉三形容之也。爾雅曰。木謂之華。草謂之榮。華而不實謂之英。是華榮英之形容。皆取諸草木者也。則瑩字亦當从木作榮。淇澳詩曰。琇瑩都人士。詩曰。琇實實字亦屬草木。則琇瑩之瑩亦當作榮。琇說文曰。美石。廣韻曰。玉名。淇澳詩集傳曰。天子玉璜。諸侯以石。此詩及淇澳都人士詩。瓊琇皆玉。當更考。意者璜之爲物小。取數少。或無等歟。

猗嗟

春官大司樂。詔諸侯以弓矢舞。樂師帥射夫以弓矢舞。注曰。舞。取矢于次于楅。與其耦執弓挾矢。揖讓進退。有儀熟嫻如舞也。地官鄉大夫。鄉射禮五物之五曰興舞。亦卽謂以弓矢舞。此詩稱嘆魯莊公藝能之美。三章三舉射言。則所云舞不在射外。若樂舞則賓客無其事也。二章曰不出正。則賓射之畫采布侯禮射也。故三章曰四矢。禮射布侯皮侯皆貫的。鄉射禮大射儀皆曰不貫不釋是也。熊虎豹豻皮貫之不必強有力。故亦貫的。禮射雖不尙力。射事取有獲也。此詩云貫。謂貫采侯的。集傳曰。貫革。革。犀兕皮。至堅厚難貫。故角力之射用之。鄭康成謂武射無侯。張獸皮射之。朱子謂布侯棲革。於中爲的。二說不同。總之貫革乃武射。此詩則禮射也。行葦詩集傳亦誤有貫革之文。

# 十畝之間

論語老農老圃其人判然。天官太宰。一曰三農。生九穀。二曰園圃。毓草木。其職判然。地官載師。以廩里任國中之地。以場圃任園地。此場與圃。風登禾黍者不同。除地爲場。藝植果蔬。有當築其根者。有先築畦而後種者。有播種而築堅其地者。除地事爲多。故地樹果蔬。而曰場。人掌國之場圃。孟子曰。場師。白駒詩曰。場苗。又東山詩曰。町疇鹿場。踐踏多亦稱場也。蔬菜之植。乾則水之。瘠則糞之。草則芟之。密則疏之。淺則培之。熟則采之。旣又植之。家人婦子。朝夕往來。如織成蹊。不但桃李下。故園地稱場圃。歟。是園廩又判然兩地。田百畝。廩五畝。農人所受。見孟子。周官。圃人受地。經傳不見其數。則此十畝。當農百畝乎。圃事用力繁。獲利厚。故家十畝。橫渠曰。周制。國郭之外。有聽爲場圃地者。家受十畝。意蓋謂古今情事不遠。後世附郭多圃民。供城中官府士商之需。卽古之場圃任園地者。東萊以爲最合古制。集傳郊外所受。本橫渠郊字疑郭字之訛。

## 伐檀

集傳曰。一夫所居曰廩。地官。遂人曰。夫一廩。田百畝。注曰。廩。五畝之宅。田百畝之禾。納于所居之廩。此詩以廩見田也。三百廩。田三萬畝。計以邑四井。則七十五邑。此仕者食邑七十八十者。舉三百成數而言。古者中州沃壤。畝獲一鍾。當今九斗六升強。三百廩者。三百困。是古者一困所容百石弱。而三百億。但言數而無所指。孔疏以爲若釜斛之數。則視三百廩太多。不類。而以大田詩刈禾把之秉當之。最允。古者百畝。

當今五十畝弱。今南方刈禾把。舉其中數。大田詩言。穡者爲乘六畝。三百六十穡。其乘二千一百六十。則一廛億乘弱。古今東西南北。適符詩。不指言乘者。上言三百廛。下言三百困。其三百億爲乘。可推而知也。曹氏謂三百億與三百廛。遼絕。詩人性情之言。不拘名數。豈不信疏說耶。抑未習識農事耶。詩言雖不甚拘。亦豈隨口說出。但押韻而已耶。集傳曰。餐。食也。散文通耳。餐。食。對文似有分。狡童詩。亦先餐後食。卽其言之次。則餐似爲朝食。韓信傳。令其裨將傳餐。上言夜半傳發。下言平旦建旗鼓。則傳餐乃天未明。古人朝食爲餐。于此亦略可見。先鄭注周官曰。飧。夕食也。末章飧爲夕食。首章餐爲朝食。則二章食爲晝食。一日三食。古人日食大數。亦可見於此。

椒聊

古量小。今一合五勺強。當古一升。服傳曰。歡粥。朝一溢米。夕一溢米。注曰。一手之盛謂之溢。一升二十四分。升之一也。而其大數則一升。一手一升。則兩手之剎二升。此詩先升後剎。剎倍於升。益蕃衍之意。小爾雅曰。剎四謂之豆。豆容四升。則剎亦一升矣。剎二誤剎四歟。

羔裘

故。故舊好。情好。與遵大路詩所云同。

小戎

梁驪駕兩服。而兩驂之駕獨難。故游環制其外出。脅驅制其內入。又陰鞞使之得力。則駕驂者備矣。其內

兩轡不待手調。故有艘輓焉。詩所以言轡皆六也。六轡在手。則御者也。曰朶矛。曰虎韞。有弓則有矢。此偏將之車。右持矛。左射而中御鼓。則在元帥之車。故不及。鏤膺飾韞說似勝飾馬。

### 終南

周制五冕服曰衮、鷩、毳、絺、元。謂服冕而服此五者之衣也。上公衣裳九章曰衮。衣畫龍、山、華蟲、火、宗彝。裳繡藻、粉米、黼、黻。九章之衣始于龍。龍首衮然。章分衣裳。舉衣以統裳。又舉畫始以表衣。故曰衮衣。侯伯七章者曰鷩衣。衣畫華蟲、火、宗彝。裳繡藻、粉米、黼、黻。鷩。雉也。卽華蟲。七章之衣始華蟲。故曰鷩衣。子男五章者曰毳衣。衣畫宗彝、藻、粉米。不可畫。則繡于衣。而裳繡黼、黻。宗彝、虎、雉也。皆毛蟲。五章之衣始宗彝。故曰毳衣。孤卿三章者曰絺衣。絺。紵以爲繡也。三章者。衣繡粉米。裳繡黼、黻。衣裳皆繡。故曰絺衣。大夫一章者曰元衣。五冕服皆元衣。纁裳。一章者。但繡黼于裳。而衣無章。故曰元衣。然五衣皆章服也。章以衣爲重。故亦得以繡之裳者名其衣曰黼衣。此詩所以曰黼衣也。其實黼不在衣也。故又著其實曰繡裳。若曰君子服一章之冕服。其章爲黼。則衣曰黼。而黼繡于裳。語勢與衮衣繡裳者等。而虛實不同。五冕服皆祭服。秦爵自七章以下。一章者祭羣小祀。豈秦君至終南下。舉小祀事。故詩人云爾歟。錦衣狐裘。在道服之。而止者也。黼衣繡裳。至止易之而舉禮者也。玉藻。錦衣狐裘。諸侯之服。本此詩爲言。又曰。狐白裘。錦衣。鄭注以衣裘同色。狐曰白。故錦釋以素。然而織五采。絲曰錦。無素錦也。孔疏遂附會到天子。眠朝皮弁服。內錦衣狐白裘。而謂錦衣狐裘。諸侯朝天子之服。讀此詩。秦君錦衣狐裘。至終南之下。安見爲天子眠。

朝諸侯服此朝之者耶。諸侯告朔亦皮弁服。何必朝天子于治朝耶。

無衣

玉藻曰：纁為繭，縵為袍。兩衣一貴一賤，不在通稱之例。軍士衣繭，以與袍同為有褚之衣。詩人故亦曰袍。集傳故以繭釋袍，澤一作禪，即鄉射大射所云襦也。

宛邱

翻纁同。地官鄉師執纁御匱。注曰：纁，羽葆幢，路有高低，左右傾。執纁者居匱前，抑揚左右，其纁使引匱者，豫知防也。御匱，王侯以纁，大夫以茅，士以功布，狀皆如麾。此詩驚翻以驚羽為翻，舞人起伏進退，執翻者在旁以翻指麾之也。一佾一翻。春秋魯仲子宮用六佾，獻六羽，即此驚羽之翻也。與舞人干羽之羽為雉羽者不同。值，植立之義。雉羽之舞，低昂翔側不定。驚羽起伏進退，有需乎麾。麾時少，不麾時多，不麾則如植立。故曰值。春秋六羽為此詩驚羽指麾舞人說。本毛大。最典核。餘冊年讀春秋經傳之疑。

七月

詩言朋酒，兩尊皆酒。樸也。見玉藻。集傳引鄉飲酒禮，尊兩壺，證之。但證設尊之兩，若尊中之實。鄉飲酒禮，則一尊酒，一尊元酒，元酒，水也。

四牡

啓，危坐也。處，安坐也。古者之坐皆跪，安坐，坐而著于蹠也。危坐，坐而直其身也。

皇皇者華

左傳叔孫穆子曰。訪問于善爲咨。咨事爲諏。咨難爲謀。咨禮爲度。咨親爲詢。周人說此詩如是。歐陽公曰。但取叶韻。

常棣

集傳曰。况發語辭。或曰當作悅。後說勝。悅。愴。愴也。下章烝字。或曰衆也。

蓼蕭

冲冲、雝雝。有儀也。儀。德之符也。德。福之基也。

淇露

路寢而曰宗。宗。尊也。主也。天子勤政之所。天下所尊所主也。于此而成厭厭之飲。不避淫湏之名。明此燕樂君子之德。禮遇非常也。

彤弓

此篇體制首章渾說。下二章析言之。凡藏弓必載之囊之。而後爲藏也。既有功必喜之好之。而後有賜也。凡饗賓必右之醕之。而後成饗也。飲酒之禮。主人獻賓。賓受爵。奠于脯醢西。于賓爲右。是爲右之。此飲者也。君子不盡人之歡。主人醕爵。賓不復飲。則受爵。奠于脯醢東。于賓爲左。是爲左之。故鄉射記。有于左于右云云。左之者不飲。右之者飲。則此詩右字。卽獻字變文。左之右之。賓之禮也。惟其右之。主人之心也。

菁莪

此詩所云喜有默默自幸君子之得見而人皆不得見之意故樂且有儀此以下章申上章也若喜字如常解則淺于樂矣況又有儀曹丕立爲世子抱辛毗頸曰知我喜否乃快慰之極之辭雖豚犬語正可想見此詩喜字

采芑

錫亦名鉦周官注也錫以節鼓鏡以止鼓謂錫鏡皆得名鉦詩疏也似宜從周官注六月采芑北伐南征宣王中興之烈也而吉甫則文武方叔則顯允命將皆丈人

正月

馬注曰輔所以佐車可脫張之物今人縛杖于輻防輔之脫也則輔是一物杖是一物集傳本之而曰縛杖于輻以防輔車則杖卽輔故又曰輔所以益輻愚按輻隨輪轉輻是動不止者棄輔輸載輔乃止不動者縛物于動以防不動事理難曉故集傳變其說焉然大車任載考工記最詳並無益輻事竊謂車載積中不敗恃外有闌考工記曰牝服大東詩曰箱卽小車之較本文之輔當屬此在車兩旁輔車載而不輸故曰輔後世縛杖于輻不當取況員乃方員之員謂周完無缺陷將駕時察車之輻如是也周完之說本張氏上章單說輔下章兼說輻說僕三者皆車載要事也員訓益似不然車輻有定制必不待車行求益也輔傍从車制字本義人之牙骨取象于車頰骨取象于輔乃轉義也卽此可想車闌曰輔之象之義矣

雨無正

爾雅曰。夏爲昊天。謂天氣廣運也。秋曰旻天。謂天心闕下也。萬物至秋。天闕之。而嚴肅以成其生長。如降威然。人遭禍敗。而無所歸咎。則以疾威屬旻天。此詩故變言旻天。繼昊天也。三事。卽周書立政之三事。詩書同文。當時成語。僞孔書傳曰。天地人之事。蔡傳卽指任人。準夫。牧。三宅所司之事。二說皆可通。正大夫。集傳據周官八職。一曰正。六官之長。皆上大夫。極核。而三事大夫與正大夫對。正大夫主言離居之六卿。三事大夫則統言未離居之六卿。及中下大夫作三事之人也。鄭箋以三公釋三事。未安。三事不專指何官。三公又不在作而行之之列。僞古文尙書周官篇曰。三事暨大夫。三事大夫殊爲二。則三事指三公。漢晉間有此訓。周時不然。

小弁

大雅無易由言。箋曰。由於也。此詩則箋曰。由。用也。用之意爲出。皆通。集傳從於。而此詩貼一其字。大雅則但有其字。無於字。當是脫文。

大東

此詩。王使徵役徵財于譚。譚大夫覲。縷告病。皆當時實事實景。殮七。汎薪。取興有因。天漢以下。亦非憑空幻語也。周官儀禮。凡賓禮。賓始至。日已夕。則饋飲食于賓館。曰殮。供夕食也。其具。鼎。簋。簠。豆。鉶。壺。酒。壺。盛。故首以盞殮棘。七起興。而五章末章。兩言酒漿。諸侯相爲賓禮。使大夫束帛致殮。王使或加玉焉。故佩璫云。



云不用璧而用珉。見財殫也。而杼軸其空。亦感于致殮之束帛。而及下民之乏。內藏之竭也。殮禮亦有薪芻之供。故有穫薪之興焉。而及汎泉之浸。見憚人平日重困于役。今者賓館門外車載薪矣。不知尙有穫而在浸未及載者也。古者卿行旅從舟人。私人王使之介從徒役也。作詩大夫卽日晚致殮。大夫禮畢而歸。則昏暮矣。財力交病。徵求無已。搔首問天。驀見雲漢之光。則冀其有以監我。又因杼軸之空。見七襄織女。而有不成報章之嘆焉。箱者大車。役時所將。嘆牽牛之不服。亦困于役者甚也。而于是傀儡畢集。懷來恐後。啓明先日而出。長庚後日而入。不能使日加長。勞役速已。在外無淹久也。禮賓加豆庶羞。用兔鼎腊非麋卽兔。嗜彼天畢。但與啓明長庚施行。而無掩兔實用焉。今夕致殮。明日朝又當饋饗以供朝食。二禮皆有壺。而需乎斗之挹。饗與饋同饋。簠簋飯之米。中庭之筥米。門外之車米。皆有需乎箕之簸揚。而南箕北斗。何爲者耶。區區什器亦病。顧瑣屑而及于斗箕。愁思無聊極矣。而精神替亂。遂有箕吸舌。斗西柄之怨焉。集傳曰。北斗西柄則秋矣。愚謂秋盡建戌將冬也。熊羆裘葛屨。亦是當時實事。葛屨履霜者。卽佻佻公子。時適見役有所往。而其來也。已際霜寒。但職勞而已焉。粲粲衣服。百僚是試。東人之子。非所望也。而徵求小大東。益復不已。砥矢周道。是烏得不陔焉。顧之而出涕哉。

甫田

此詩首章言夏耘。末章言秋收。第三章曾孫來止。承首章適南畝。禾易長畝。承首章耘籽。終善且有。承首章黍稷薿。第二章田既臧。介稷黍。亦承黍稷薿。社方。追言寅月之祈穀也。迓田祖。追言巳月之雩也。集傳

祭四方報成。則社亦然。下又接說祈雨。則文字不倫。意亦辟戾不順。穀士女應烝髦士。穀訓善者。是詩意。若曰。今者黍稷薿薿。則田既臧。而爲農夫慶矣。由我寅月。社方祈穀也。髦士。士之穀者也。今則可烝矣。而士女非黍稷不穀。黍稷非甘雨不介。我又於巳月。迓田祖。祈而介以穀之。髦斯士也。

### 類弁

古人小功以下。不論同異姓。皆爲兄弟。此詩末章。集傳曰。甥舅。母姑姊妹妻族也。此五族。皆異姓小功以下兄弟。則此篇兄弟。專謂甥舅。首二章。渾言。末章乃指言之曰。兄弟甥舅。謂甥舅之兄弟也。故首章集傳曰。君子兄弟爲賓者。若同姓兄弟。不得云賓。兄弟卽甥舅。薦蘿松柏之比。十分精切。

### 車輦

古者燕有德之人。則必擇有德之人與燕。以明樂其德焉。與吉甫之燕者。張仲孝友是也。此詩燕樂德音。來括之。季女所云好友。卽謂有德音者。而新昏無與燕之禮。故云云。以見其意。先儒有謂德以友助成。季女德音來括。自足以助成我德。亦得爲一說。然與雖無字且字不合吻。

### 賓筵

彤弓詩曰。鐘鼓旣設。不及奏樂。饗賓奏樂有成禮。卽以鐘鼓之設。該之。詩體與記禮之文異也。大射儀。賓及庭。奏肆夏。賓拜酒。主人答拜而樂闋。公拜受爵。而奏肆夏。公卒爵。主人升受爵。以下而樂闋。未射之前。奏樂有成禮。故此詩亦以鐘鼓旣設。該兩奏肆夏焉。舉醴。大射儀。公醴賓。而舉旅。又醴賓。若諸公卿而舉

旅也。詩辭設鐘鼓舉臚聯文。謂賓及庭至拜酒。公受爵至卒爵。其儀皆鐘鼓節之。而莫愆。至兩舉旅。而賓及諸公卿大夫。亦往來各有序。摠之射前飲酒有禮。承飲酒孔偕而申言之也。樂器縣于射前一日。鄭箋泥經文既設二字。以爲指當下。而謂將射改縣。然大射儀之文具在。鐘鼓縣不礙射者。並無改縣之事也。集傳樂人宿縣。厥明將射。遷樂於下。以避射位。亦與禮經不符。夫禮經所云遷樂于下。乃工歌位西偕上之東。射者往來有礙。故鄉射則繫綱而降。遷于阼階東南。大射則卒歌降。遷于東楹東南。而宿縣鐘鼓。本縣于堂下。將射固無改鐘鼓縣之事也。說文湛沒也。字从水甚。故義爲沒。沒則有深意。故史記曰湛思沒。則有浸意。故內則曰湛諸美酒。沒則有久意。故鹿鳴常棣詩言和樂且湛。然湛繫樂言。則爲樂之久。單言湛無樂意也。沒則有沉溺意。若抑詩荒湛于酒。是爲廢百事而沉溺于酒。北山詩湛樂飲酒。亦爲沉溺于樂事。酒最可樂。而抑詩湛樂從。承湛酒言。則沉溺于樂事亦兼酒。而樂事不但酒。書無逸湛樂從。則沉溺于樂事。專爲縱逸言也。沒則有漸漬潤澤意。此詩子孫其湛是也。文繫錫嘏之下。謂尸嘏主人。其多福之致子孫。亦漸漬潤澤焉。既醉詩公尸嘉告曰。君子有孝子。從以孫子。少牢嘏辭曰。眉壽萬年。勿替引之。楚茨詩子子孫孫。變眉壽萬年之文者也。古人頌禱之辭。必及子孫。繼之曰其湛。曰樂。謂子孫多福潤澤而樂神賜也。故朱子說此二句。亦曰錫爾純嘏。及爾子孫。子孫獲福而湛樂也。及字卽上句湛字之意。獲字卽下句湛字之意。曰獲福而湛樂。但賸一湛字。集傳以樂訓湛二句。辭復疊而義難曉。湛字本音持林。反鹿鳴詩與琴心韻。常棣詩亦與琴韻。此詩與林能韻也。古湛字不與耽通。無逸耽樂從。王充論衡引之。

耽尙作湛。與抑詩同。今本誤刻耽耳。衛詩無與士湛。上與甚韻。亦誤刻耽。此所云湛沒溺也。皇矣詩傳曰。溺于人欲之流。而不能自濟。衛詩湛溺之欲。則爲宴私昵比。未必無樂意。然湛字不正訓樂。卽耽字从耳。尤其義爲耳大垂。亦非樂也。耽湛之通。不知所由。當以音訛耳。論衡引書湛樂從而說之曰。長夜之飲。糟丘酒池。是必病。以詩言湛樂飲酒。而荒湛于酒。又繼以湛樂從。故說書專以飲酒說湛。不知逸樂之事。傷生不但酒。詩書兩湛樂從。書並未及酒。詩亦不專言酒。鹿鳴常棣和樂且湛。其言樂之久。一專指鼓瑟琴。一專指兄弟翁也。若專言縱酒。則當言酣言醕言涵。而湛非其義。夫淫字有時亦繫酒言。若單言淫。亦得說之以酒哉。

### 魚藻

古豈愷。凱字通。南風曰凱。其氣大和。長養萬物也。軍勝之樂曰愷。服敵而心平也。此詩曰豈樂飲酒。四海和親安平。天子中心和平。樂而飲酒也。又曰飲酒樂豈。飲酒而樂此和平也。天下安于磐石矣。故末章曰有那其居。

### 采菽

九章之服。始于龍。終于黻。此詩元袞及黼。舉其始終而言也。不言黻。變言黼。叶馬韻耳。集傳曰。平平。辨治。相禮給事供幣。辨之而各有條。治之而各得理也。左右如此。君子可知矣。與有客詩。萋且敦琢同意。桑扈詩曰。交匪敖。此詩曰。交匪紆。皆敬事天子也。敬事天子。則殿天子之邦。萬邦之屏翰。而萬福來求。萬

福攸同者也。葵，卽揆其所以予之命之也。申之，攸同，皆所以聽之。此章提起說，在未來朝之前。天子預揆而厚之，而君子果優游，不先不後，亦于是而適至。紼，纜維。大索，一頭纏其舟，一頭維于岸，以待汎也。蓋天子預待之興。

隰桑

孔膠、德音縝密無間也。故旣見而樂，心愛不忘。

都人士

綱直如髮，或曰如而通，或曰如猶言其皆欠豁，或曰作髻如其髮而止，不用髮髻，樸也。與笠撮同意。

緜

胥字从疋，疋，音疏，足也。管子曰：問疋何止，或曰疋卽古胥字，或曰卽古足字。足則有相並意，相合意，相共意。故胥之義爲相，相卽合也。並也，共也。真古文尙書，胥字四見者，盤庚、無逸、兩見者，梓材、多士、呂刑。一見于康王之誥，皆爲相義。多方，胥惟虐，亦然。惟胥，伯爲官名。春秋胥命于蒲，公羊傳曰：胥命者，何相命也。左傳曰：胥命于弭，學經文也。孟子：瞞瞞胥讒，亦相義也。帝將胥天下而遷之，謂天下之士多就之。帝將合天下而遷之，不但所居三年成，都也。卽見于詩者，如淪胥以鋪，無淪胥以敗，無淪胥以亡，無胥遠矣。民胥然矣。民胥效矣。載胥及溺，不胥以穀，惟予胥忌于胥樂兮。總無異義。君子樂胥，侯氏燕胥，以于胥樂例之。倒文未可知。夫胥但有相之義，若相字从目，木讀去聲，而義爲視，胥義之相，斷不可轉其聲轉其義者也。

公劉詩于胥斯原。以篇內于京斯依。于豳斯館。文體例之。胥當屬地名。此詩胥字。乃謂共居耳。詩必及此二句者。太姜與太王。共起艱危。贊助多力。周之子孫不忘。故皇矣詩亦曰天立。思齊詩又與太任總稱。徽音。歐陽公說。自正義以去聲之相訓胥字。以爲相度宇居。後人并謂太姜亦預相焉。周官府史之下有胥。掌官敍以治敍。注謂傳官吏之命于朝者。胥下有徒。掌官令以徵令。則承胥所傳命而奔走徵令于外。胥若今副役。一胥皆十徒。徒字从彳从走。胥徒皆供役使趨走。走爲足之用。足爲走之體。胥傳官命。吏奉胥傳。相與共爲一事。而胥則往來出入于朝。其奔走者簡。徒則奔走于外而繁。奔走繁簡不同。實則一事相共。故十承一者。目以从走之徒。一統十者。目以卽足之胥。至如地官五比之閭胥。二肆之胥。春官大胥。小胥。皆不外乎趨走傳宣相導率之義。大小胥有府史徒。無胥。宣行上官之令已職也。小司徒田與追胥。竭作。注曰。胥伺盜賊也。則亦相率奔走之義。迺疆迺理。與信南山詩疆理正同。彼詩傳曰。理者定其溝塗。此似當仍之。上文迺左迺右。已有布散而居意。迺宜卽左傳昭元年宣汾洮之宜。集傳導其溝洫之說似勝。畝卽南東其畝之畝。溝塗定而水勢得。則畝可南東矣。自西徂東。猶言自右及左。言左右該前後。言東西該南北。東西若粘水澣言。恐混上率西水澣來時路。以虞芮質成爲文王受命而改元稱王者。漢人之誣說也。此詩集傳曰。九章遂言文王受命之事。乃淘汰未盡處。似當云。九章遂言文王受方國之事。文王有聲詩曰。文王受命。近人謂受弓矢鈇鉞。專征伐之命。極核。

### 械櫜

天子六師。其將皆卿。武王伐紂。牧誓但有司徒、司馬、司空、三卿。此詩歌文王。乃六師耶。正義謂大雅作于武王有天下之後。六師据後而言。非也。文王既追王。詩歌可言王。至典章制度。則屬文王當年實事。不可以後之所有。誣前之所無。夫文王三軍正卒也。于邁而民奮往樂從。則羨卒亦及焉。集傳所云不令而從也。合正羨卒。故曰六師。

皇矣

安安者。其人在所當誠。縱之去而安然無恙。非一人也。但訊不誠。下文所云致附也。集傳云不輕暴。卽謂不輕用殺而縱之歟。天子祭天。出征類上帝。王制。天子禮也。文王方伯。伐崇而亦類者。虞書類上帝。舜奉天子命。攝行天子政。告攝卽可攝類。則文王受天子弓矢鉞鉞。專征行天罰。亦可攝類而告事者也。如周公奉成王命。營洛邑。用牲于郊。時成王在西都。則周公亦以天子命攝郊。是古制有如此。漢人以稱王。誣文王。大雅言文王受命。言六師。言類。俱宜令有下落。

靈臺

此詩言經。如周官經野。孟子經界之經。經畫臺之位處。度其崇廣也。而囿之方廣。沼之深廣。沼囿位處亦存焉。孟子集注所云量度是也。營。如左傳士彌牟營成周之營。以臺之崇廣。而物土方。量事期。計徒庸之屬也。沼囿之事。期徒庸亦存焉。孟子集注所云謀爲是也。凡土功之始。皆有此二事。故召誥作洛都。亦曰得卜則經營。此詩集傳曰營表。又曰經度。營表。本詩箋營表其位。正義以繩度立表定位處也。而經營二

字無別矣。不如孟子集注分明。孟子集注後于詩集傳也。詩首二句下經字疊文。前二章對時育物之樂也。後二章化民成俗之樂也。篇末二語似未了。蓋所以實論字。鼓鐘之論。矇瞍之奏見之。集傳呂氏本孟子樂其有麋鹿魚鼈。以此詩爲述民樂之辭。當日文王之民樂其有而周公追述民樂而爲之詞。則在武王或成王時也。

生民

正義曰。月令稱高禘。蔡邕章句曰。高禘。神也。高。猶尊也。禘。猶媒也。毛傳此詩及元鳥詩。皆讀高爲郊。而文作郊。鄭箋從之。正義又衍之曰。祭天于郊。而以先媒配之。然則高禘自有專祀。專祀亦不在郊。變高爲郊。毛讀出也。郊。天作配。正義衍出也。集傳姑存之。史記殷周本紀。有簡狄吞元鳥卵。姜嫄踐巨人跡之文。竊以爲三家村爨嫗。亦不爲此。乃出之殷周二代生民之聖母也乎。雖曰天地之初。氣化生人。聖賢之生。異于常人。然柰何得氣于此二物。著異于此二事也。殷周子孫皆聖賢。願作歌協律。焜耀當時後世哉。而鄭箋此詩及元鳥詩。皆据之。不概于心。然元鳥詩首二句。吞卵事固無憑。此詩則有履帝武句。似非鑿空者。轉輾百思。則以爲姜嫄。帝嚳之妃。當是姜嫄禋祀時。行禮步趨。帝嚳克敏也。歆。卽居歆之歆。下章所云。康私心。頗謂文義兩順。及見朱子引毛傳。果以帝爲帝嚳。敏爲將事齊敏。而其講履武曰。姜嫄出祀郊禘。履帝嚳之跡而行。出字行字。則讀高爲郊之衍說耳。乃知以郊易高。亦由索武字之解少滯。又少泥于弗之言。祓除于水上。則出國門。如鄭詩之溱。洧。論語之沂也。按經文而求之。帝爲帝嚳。敏屬行禮。二千年



下有合于二千年上說經者之心。則決知史記之謬也。雖然。毛公騰聲河間。在子長前。子長非不見毛傳者。其謬說從何得哉。漢人經師。各自名家。說經大都不按情理。逐字鑿求。如祇載見瞽瞍。史記舜本紀祇載二字。解作載天子旌旗。亦其一徵也。兩詩之謬。史記不知本何經師。而簡狄吞卵。乃經師由元鳥詩。生商生字鑿出也。曰行浴見墮。或毛之出祀郊禘啓之。或亦泥于周官禘除有釁浴事歟。帝武。帝字最難曉。而以巨人當之。其鑿亦不外乎出郊禘除兩端。攸介攸止。亦見于甫田詩。博求介字之義。或亦訓小。揚子雲曰。升東嶽而知衆山之崩。施也。況介丘乎。是也。如擯介之介。則又有副義。副亦近小。如介于石。不易其介。則又側畔限際意。八蜡之祭。有郵表。如郵亭在田界側畔連綴處。田峻勸農草止焉。此則甫田詩所云攸介攸止也。有田祿者。來田間憩于此。亦其所小止之處。甘棠詩集傳曰。芟草舍也。謂草舍息也。卽小止之意。王宮后妃有側室。生子及月辰居之。此詩攸介攸止之謂也。非后妃所常居。則爲其所小止處。一句兩言攸風雅頌之體。有促節。有曼聲。桑扈詩不戢不難不那之類。促節也。甫田生民詩。攸介攸止之類。曼聲也。震有娠而動也。正是月辰。夙仍訓早。姜嫄之娠。年早未晚。見神歆捷應也。如此則無人道不見矣。生子何以棄之。曰。生子有坼副蓄害之疾。常也。鄭莊公之生。其母死而復蘇。疾之過也。故驚而惡之。姜嫄先生如達。竟無疾也。故怪而棄之。疾之過。竟無疾。皆反常也。非人心之所安。故蘇黃門說此詩二章末三句曰。生子無疾苦。上帝于姜嫄。豈不安之乎。然姜嫄反以禋祀之故。而居然無疾。生子不安而棄之。大戴帝繫篇載帝嚳元妃有郃氏女曰姜嫄。生棄。次妃有娥氏女曰簡狄。生契。三妃陳鋒氏女曰慶都。生

堯四妃。姬訾氏。女曰常儀。生摯。鄭康成曰。姜嫄。高辛氏之世妃。世。世子之世。世妃。鄭卽謂元妃也。孔穎達乃以世妃爲後世子孫之妃。不能定其世。故曰世。左傳。高辛氏才子八人。杜注。旣謂中有稷契。又曰八人皆高辛之苗裔。如孔杜二說。稷契非堯時人耶。杜蓋據傳。世濟其美。以至於堯之文。然則大戴五帝德篇。所稱帝堯者。帝嚳之子。殆不足據也。然而蘇列四凶。八愷。地平天成者。禹也。而曰世濟其美。此則何說。帝系。顓頊生鯀。又何以曰世濟其凶。則皆誣說矣。前人謂行父舉去云云。故意跌宕。張皇舜功。爲自己張本。然則此對乃肆爲誣罔。不顧事實。良然。諸太史劫持篡君。左氏仍之。所以著其惡乎。集傳本詩箋。以房訓方。謂孚甲之合如房。此漬種之初。生意內含時也。苞蘊也。漬中間甲坼。微露生意。則見其中有苞種。如天官內宰。詔王后生種。種之種。漬之久而苗其芽可種也。鄭注。月令曰。甲解。孚甲卽此所云苞。又曰。乙。奮軋而出。卽此所云種。若苞尙爲甲未坼。則同于方矣。方字亦見大田詩。謂秀而孚甲開者合也。蓋苗將華。孚甲開而不合。旣華乃合。合乃以漸而實。實乃以漸而堅。故下文曰。旣阜旣堅。兩詩言方。其中虛中實微異。其外孚甲之合則同。同故皆曰方。大田詩集傳亦以房訓方。誠是也。又據詩箋曰。孚甲始生而未合。夫未合則不得爲房矣。

### 行葦

此詩。鄭康成謂養老大射擇士。王肅謂燕射。呂東萊是王肅。朱子以詩言曾孫維主。易爲祭畢。燕父兄者。老。然楚茨諸父兄弟燕私。燕私無異姓。則無賓。此詩有賓。則不符。故亦疑其辭而不定。愚謂此蓋禮記文。

王世子篇。與族燕。異姓爲賓。膳宰爲主人者歟。曰曾孫者。燕族之義。原于祖宗。主人義得稱曾孫。然詩辭又有微異者。似以族燕之禮。選賓專燕父兄耆老而未六十者。堂上無席位者。然首二章言授几以安老者之坐。言緝御以供老者之使。燕禮無醴。末章醴酒兼設。明是爲老者而酌醴以祈黃耆。鮐背致意再三。已情見乎辭。又凡射禮。賢不侮之序。賓黨主黨同之。詩獨言序賓。是父兄耆老筋力衰而優之不射。但賓射以樂之。天子雕弓。則天子亦射以樂之。如太學食老更。而天子總干也。堂下父兄未六十者亦射。凡行禮。主堂上。序賢不侮者。堂上惟賓。故但曰序賓。意者祭畢而燕。在行大禮之後。我孔熯矣。禮又不當再。特殺其燕。但薦脯醢。成獻酢。略致恩私。釋祭之明日。又立賓。特燕父兄耆老以盡歡歟。此詩特殺而有燔。有炙。有脾臠。不類祭日事。不但有賓。又射非燕私也。春官大宗伯以飲酒之禮。親宗族兄弟。其禮繁多。今記傳可見者。載籍殘缺之餘。不可謂盡于所見也。以賢。序數射。算以見之。又飲豐上。觶以見之。投壺。禮令弟子。固亦有常爵。有浮。然此詩義。專言射事不侮。似不指撫。敖。偕立。踰言。蓋舍矢既均。射法之參連也。四鏃如樹。射法之井儀也。太史數算序之射法。皆不侮。然後得列于賢。經文以賢承均。不侮承如樹。互見之。

假樂

匹。耦也。合也。有相須意。有相助意。有相成意。禮記緇衣曰。惟君子能好其匹。注曰。知識朋友。匹。偶己心。此詩言羣匹。正是此意。羣匹。卽下章之朋友。故集傳以類訓匹。兔置詩集傳曰。公侯善匹。猶曰聖人之耦。桑扈詩曰。之屏之翰。此詩曰。之綱之紀。一承上章之末。四方之綱。一承上章之末。萬邦之屏。疊語排語也。

然既分章分句矣。則句兩之字皆無承。何以截爲句。而竟截爲句。皆朝廷大著作。奇文奇筆。十三經僅見。印盛于豆。于豆于登。語勢亦同。然于字較之字。之字則奇矣。鼓瑟吹笙。吹笙鼓簧。以祈黃耆。黃耆。鮐背。疊排亦其類。

### 澗酌

行潦。兩見詩。一見孟子。說文。潦。雨大貌。孟子集注。行潦。道上無源之水。本詩疏。行道上雨水所聚也。此以道釋行。風雅兩行潦。集傳皆曰流潦。則以流釋行。謂流聚天雨。故左傳以潢汗冠之。潢。積水池。汗。濁也。來聚言。只說潦水。結引澗酌詩可見。据采蘋詩。采藻于行潦。則流潦之解爲核。若傍山之地。固有暴雨。則道路滅沒不可行者。然而立澗。豈有聚藻之生。餽。糝。字同。儀禮三饋食皆有餽。注曰。炊黍稷之竈。其亨羊豕魚腊。則曰雍饗。是餽專謂黍稷飯也。故元鳥詩。大糝。集傳亦曰黍稷。天保詩爲餽。及本詩餽。集傳則本爾雅釋訓。而餽兼酒言。夫餽專言食。儀禮鑿有明文。元鳥詩。糝曰大。義尤不可通于酒。爾雅多後人僞竄。似未足据。且水沃一烝之米曰餼。沃黍稷食。亦沃酒乎。或曰釀酒初亦烝米。顧下章曰灌。及儀禮皆就祭時言之。經義並不及酒。少牢禮曰。雍人概鼎。七俎。廩人概甑。甑。七敦。司宮概豆。籩。勺。爵。觚。觶。几。洗。筐。概。拭其塵也。以上諸器。有當濯而概者。有但用概者。亦必以水濕巾概之。濯。溉。概。字義當同概。古字多通。上章單舉。下章又以濯概該用水諸器也。若溉訓滌。則濯滌文疊矣。

### 卷阿

下武集傳曰媚愛也。此詩集傳曰順愛也。與論語王孫賈集注曰親順也同。然論語言媚私利也。詩言媚公義也。公私義利薰猶判若天淵。此說春秋者所云美惡不嫌同辭者耶。詩之興率以二句興二句。小雅如小宛小弁車牽諸詩。則間有四句興二句者。此詩鳳凰鳴以下乃六句一章。興下章上四句。皆昌黎所云氣盛則言之短長與聲之高下皆宜者也。

板

大宗卽孟子之巨室。彼集注云世臣大家。古者卿大夫貴戚異姓各立之宗曰大宗。已該同姓。又曰宗子與儀禮所稱文同意異。左傳曰君其修德而固宗子。則詩似謂王世子城之關係尤甚于藩垣屏翰。故又獨申二句。

崧高

崧高一詩。申伯淵源悠遠。顯功碩德。弁冕周室中興。可謂盛矣。一再傳而驪山構禍。人道滅盡。家聲毀盡。可勝嘆哉。無父之平王。戍之未幾而滅于強不義之楚。蓋亦有天意存焉。以作爾庸。鄭箋似勝。

常武

古如而二字通。此詩如雷如霆。如震如怒。如飛如翰。如江如漢。四句每句下如字。皆而字也。疾雷曰霆。霹靂曰震。如雷而霆。故下文曰徐方被震而驚。如震而怒。故下文曰進厥曰虓虎。蟲飛于空。其振作之翼。或非羽焉。不能奮迅厲疾也。王旅則如飛而翰。江行而東。其來入之水。皆非敵也。已極汪洋浩淼矣。王旅則

如江而漢。若下如字非而字。則奮武既曰如震矣。下曰如怒。不可通。如翰單言。亦義無所屬。

載芟

章首耕耘。乃闢萊地而反土去草。不播種。尙須水火之變。如周官柞氏。薙氏。云云也。疆。以詩集傳併言。仍鄭箋也。

闕宮

集傳曰。太羹。太古之羹。澆。汁之別名。少牢禮。有羊肉澆。羊七澆。豕七澆。澆魚之文。爾雅。肉謂之羹。羹澆。肉汁也。不和五味。太古如是。故曰太羹澆。周人祀賓用之。與元酒同意。不忘古也。三字見士昏禮。公食大夫禮。士虞禮。特牲饋食禮。周官。左傳。禮記。從省。謂之大羹。則羹字兼肉汁二字。

元鳥

章首曰武湯。中間曰武王。不殆也。靡不勝也。字法皆從武字生。集傳曰。域。封境也。謂四裔起封爲境界。外內也。

濬哲

集傳曰。曷。誰何也。說國語者曰。古者軍法。夜則去壘五十步。前後左右。列兵。曷弩注矢以誰何。謂人至前。則問姓名爲誰。何等人也。過秦論曰。陳利兵而誰何。陳利兵。卽曷弩注矢意。曰曷。

春秋討賊

隱公四年。經書衛人殺州吁。公羊傳曰。稱人。討賊之辭也。何休注曰。明國中人人得討之。以廣忠孝之路。弑君之賊。人人得誅。其說始諸此。說春秋家。皆據以爲春秋討賊之法。然而周官大司馬九伐之法曰。放弑其君。則殘之。人人得誅。大司馬之法。贅矣。且以此爲春秋討賊之法。則此法孔子作春秋所立也。春秋明王道。卽夢周公之志。而自立一法。易周公之法乎。且書有之。惟辟作威。兵刑者天子之威。討賊不由天子。甲兵鈇鉞而散之。人人咸何典型。事理殆有不然者。然而夫子請討陳恆。何也。曰。夫子當日請哀公討而得請。又必請哀公請于天子。如程子說也。蓋弑君大逆。本國臣子不請天子討。則鄰國諸侯得請之。鄰國諸侯又不請。則鄰國大夫得請于君。而請之。如說春秋家。專據人人得誅之義。文宣以前。以不討賊責鄰國諸侯。文宣以後。以不討賊責鄰國大夫。爾時征伐自諸侯出。自大夫出。是責其不出矣。然而殺州吁者。石碯。齊無知。則雍廩。殺之。陳夏徵舒。則楚子殺之。其書人何也。曰。人者。國君卿大夫皆得通稱。當時史體有如是者。說春秋家人字非一義。總屬滑稽舞文。經書衛人殺州吁。齊人殺無知。楚人殺陳夏徵舒。憫王法之不行。而殺自衛人。齊人。楚人也。豈曰人人得誅乎。夫人人得誅。不由天子。其弊必誣上行私。齊宋可賂。陳可入。蔡可滅。又必至如吳季子所云。父子兄弟相殺。終身無已也。人人之義。至是乃盡也。然而吳季子不請討光。何也。曰。平桓以降。天子不討賊。孔子所以作春秋。季子時。天子益擁虛名。吳又以淫名聞于天下。季子知古知今。知微知著。知此事有斷斷不行者。故以終身不入吳國者。聊自處。此賢者之難也。禮記檀弓。邾定公曰。臣弑君。凡在官者殺無赦。子弑父。凡在宮者殺無赦。鄭注曰。弑君父之罪無赦。凡

在官在宮。諸臣子孫。皆得殺之。此亦本公羊稱人討賊之辭說。與何休人人得誅之義符。然曰子孫得殺行弑之人。明是父子相殺也。孔疏曰。當指族姓卑幼在子孫行者。夫族姓卑幼。非復同宮。曲說顯背。陳澹又曰。惟父爲弑逆。子不得殺之。此亦背凡字。抑終無解于兄弟相殺也。陸農師以父子兄弟相殺。無已駁康成。而謂在官在宮者。連坐極是。吳草廬則以爲連坐若不知情。則濫。易曰。弑君弑父。非一朝一夕之故。同室處。同曹署。非同謀。卽坐視。何不知情而濫之有。且殺無赦。上施于下之辭。殺其人。壞其室。洿其宮。君踰月。舉爵。緊承殺無赦。一氣說下。草廬本康成意。以毋令縱逸。釋無赦。非文義矣。



